

Hechos De coz ily nu bicy de aposht nu nac Espiriit Yon

Jesuuz mniim nu cuez dey Espiriit Yon ni Ñgyoozh

¹ Shi Tioj, gyicy nu pcaa loga la, lo gyicy ze' pcaa dela coz nu bicy Jesuuz gal nu de coz nu blyuum nese nu bzuub mi gyi' de riiñ nu bicy mi ² gal pshuub la dzi nu gup mi gyibaa. Anzir nu gyam gyibaa, orze' nu nac Espiriit Yon ni Ñgyoozh mniim lo de yu nu pcuim nu gac aposht de coz nu gyicy dey. ³ Lat cyuu dzi despuees ornu bi byabañ mi nu gut mi, zañ tir bruu zac mi lo dey. Nu mod ze' briic mi nu gad lagy dey nu mbañ mi. Lat nu bruu zac mi, orze' bzat mi gyel gubier ni Ñgyoozh lo dey. ⁴ Ornu gabee rded nu ru'm dey, orze' mniim lo dey nu cue' ruuy Jerusaleeng. Gaze' nu nam rab mi dey:

—Cuez der gashtal cuic la Ñgyoozh biñ nu bi mniim nu segur la cuic mi ni der. Ya bi mnee lo der nu ni gyicy mi, gun ⁵ Waa rishli nu nis zi'l briib nis yu mbecy, tees na de ru gal nu bgo nis too der ornu bzu' nis ru nu nis, ni' zi'l sñuu ga gyet Espiriit Yon ni Ñgyoozh lat der nu cyiiñ num espiit ni der —nam.

Jesuuz gup mi gyibaa

⁶ Na lat nu yu' tublaazh dey nuy mi, orze' bdugyi' dey lom. Gaze' nu na dey:

—Shuaan de, ¿a na pshuub tiem nu gzu nap ru lat de mbecy Israeel gal nu bzuuñ gulas? —na dey.

⁷ Gaze' nu na Jesuuz rab mi dey:

—Walab cuen ni de ru nu gad lagy ru ca dzi o ca tiem nu gyicy Ñgyoozh de coz nu bzeen mi nu gac cuen ni ub zi'l mi. ⁸ Tees ornu Espiriit Yon nim gyet mi lat der, orze' gyicy mi nu cyiñ der nu gzat ru ya lat de mbecy nu yu' Jerusaleeng, lat de mbecy nu yu' dutuub la lo yu ni Judea, lat de mbecy nu yu' dutuub la lo yu ni Samaria, nunu dela lugaar nu byazet zir ni gyishlombecy —nam.

⁹ Despuees ornu blazh mnii Jesuuz de nde', orze' lo rgüii la dey wes nañ mi yam gyibaa. Byoow mi lat tub nac za yam. Orze' wangaca' zac dey mi.

¹⁰ Lat nu yu' dey ta' loy baa rgüiiy nu yam, orze' bruu zac cyup mbecy shab caacy gusuy lo dey.

¹¹ Gaze' nu nay rab yu dey:

—Der mbecy Galilea, ¿lagu ni yu' der rgüiir baa? Laab Jesuuz bruum lat der yaam gyibaa. Tees ni' zi'l mod gal nu bzaac der yam ni' zi'l mod zac der ornu cyid mi tuuba' tir —na de anc ze'.

Pcui dey Matías par nu gac yu losa' Aposht

¹² Bicy nu la Bicy ni Ya Oliva, ze' yu' dey. Bicy ze' gaab ga byeen ñi nu Jerusaleeng, tub la be metr nu ca lo cuen ni leey ni dey nu rac rza mbecy sab dzi nu rzu lagy mbecy Israeel. Gaze' nu gush nez dey yay par lat gyedz Jerusaleeng. ¹³ Ornu bri dey lat gyedz, orze' gup dey gal shily cyup ni yu' ze', ze' nu rzu' dey. Ze' ri Bed, Santiag, Waa, Ndrees, Lip, Bartol, Mateo, Santiag i'ñ Alfeo, Simoo, yu nu nash leey Caneneo, nu Judas, bicy Santiag. Dela de yu ze' yu'y ze'. ¹⁴ Nunu zaab rnii nu laa dey Ñgyoozh

nu tub zi'l shcab: gaza' de biñ mña'a yu'm lat ze', gaza' Li ñaa Jesuuz, nunu gaza' de bicy Jesuuz.

¹⁵ Na ornu bded la be dzi, orze' byatublaazh dey. Byatublaazh nu rnii tub gaynal zub gal de mbecy ni Crisht. Orze' wes su Bed. Gaze' nu nay rab yu dey:

¹⁶ —Der bicy na, Espiriit Yon ni Ñgyoozh bi mniim lo Dabi nu caay de coz nu bicy Judas, yu nu blyuu Jesuuz lo de yu nu gua num pres. Rlagy ñi gac ñii gal nu bi cañ. ¹⁷ Ni' Judas guc yu tub losa' de aposht. Gaza'y bdugyiy riiñ, laab riiñ nu bdugyi de ya. ¹⁸ Tees despuees nu bicy yu coz cyi nu bgu'y Jesuuz yaa de yu nu rzi lagy lom, orze' laab nu tiñ nu byash niy ze' wiyy tub lugaar ze' nu biit yu ub yu. Orze' bet lag yu tub lugaar gya. Bzu tooy lo yu. Orze' briich ñi nañ yu. Orze' bruu za dela coz nu yu' nañ yu. ¹⁹ Orze' ornu dela de mbecy nu yu' Jerusaleeng gud lagy dey coz nu guc lugaar ze', orze' bloo la dey ñi Lugaar ni Reñ. Benu nu riidz dey, orze' Acéldama lañ. ²⁰ Gun Dabi bi pcaay coz nu gac lugaar ni Judas lo libr ni Salmo, ze' nu mniiy:

Yu'y gyac ñi gal nu na tub lugaar ub zi nu sac la mbecy.

Orze' waruu su ga' la mbecy nu cyiiñ yu nañ ñi, nay. Orze' nay tuuba' lugaar ni libr ze':

Orze' tuuba' mbecy gyub ic yu riiñ nu bdugyiy, na Dabi.

²¹ Na lat na ii yu' mbecy nu gusa nu de ub na dub laa lat nu gusa dun Shuaan na Jesuuz. ²² Brugyi' rded nu dey de ub na nese dzi nu briic Waa nu zu nis mi, gashtal dzi nu yaa lam gyibaa. Na rlagy ñi

nu chu' ca na tub dey lat na par nu niyy nu bzaac den nu byabañ mi —na Bed.

²³ Orze' bloo su dey cyup mbecy. Tub yu lay See, laab yu ze' lay Barsabás, nunu laab yu lay Jusht. Bloo su dey yu ze' nu tuuba' mbecy nu la Matías.

²⁴ Gaze' nu brugyi' rnii nu dey Ñgyoozh. Orze' na dey:

—Ñgyoozh, ru rad lagy ru la na lardoo dela mbecy. Na lo cyup de yu ii, blyuu lo de ca na dey bi pcuiir ²⁵ par nu gac yu aposht. Chu'y lo Judas. Gun Judas nu nac nu bicy yu coz a' nap, orze' bzeeñ yu riin nu zuy par nu yay lugaar ze' nu byap yu gyay —na dey.

²⁶ Gaze' nu bloo dey suert ben ca na de yu ze' chu'y. Orze' Matías bruu suert niy nu chu'y lat de trotub aposht ze'. Yu ze' gu'y lugaar ni Judas.

2

Bet Espiriit Yon ni Ñgyoozh

¹ Ornu pshuub dzi ni sa' nu la Pentecostés, dela de mbecy ni Crisht yu' dey tublaazh la tub se' zi'l.

² Orze' derepent la brugyi' rzigy baa. Gal rac nu yad tub bi ily ni rac. Nunu dutuub la nañ yu' ze' nu nguaa dey bzigy. ³ Orze' bruu zac gal nu na lyush gyi na bruu zac. Gul ñii tub ga la dey. ⁴ Orze' dela dey gutib ic za' la Espiriit Yon ni Ñgyoozh dey, nunu brugyi' rnii dey riidz reña' mbecy. Dub gal lac na riidz nu briic Espiriit Yon ni Ñgyoozh nu nii dey dub ni mod mniiy.

⁵ Tiem ze' zañ mbecy Israeel nu zu shcab nu nac de coz ni Ñgyoozh yu'y Jerusaleeng. Zañ lugaar ni gyishlombecy bruu dey. ⁶ Ornu bzigy ze', orze'

tona' la mbecy zigy byatublaazh yu. Nunu guton la dey yu'y, gun tub ga la de mbecy ni Crisht ze' brugyi' rniyy riidz de mbecy nu bde' ze'. ⁷ Dela mbecy bdzo'w laa dey, nunu za nu la ic dey. Orze' nay:

—¡Güii ñuu! Ze' ¿a walab mbecy Galilea nac dela mbecy nu rnii ii? ⁸ Ze' ¿lac guc nu rac rnii dey de riidz guledz tub ga la den? ⁹ Gun ii yu' mbecy nu bruu zañ lugaar. Yu' mbecy nu bruu Partia, yu nu bruu Media, yu nu bruu Elam, yu nu bruu Mesopotamia, yu nu bruu Judea, yu nu bruu Capadocia, yu nu bruu Ponto, yu nu bruu Asia, ¹⁰ yu nu bruu Frigia, yu nu bruu Panflia, yu nu bruu Egipto, yu nu bruu de lugaar ni Libia nu yu' par lo Cirene. Dela ze' bruu de mbecy nu yu' ii. Nunu gaza' de mbecy nu bruu Rom nu rcyiiñ laab ii. Yu' de yu nu nac mbecy Israeel nese nu gul laa dey, nunu yu' ga' de yu nu byac mbecy Israeel. ¹¹ Nunu gaza' mbecy nu bruu Creta, mbecy nu bruu Arabia. ¡Dela ze' bruu tub nac ga den, tees dela den reñ na coz ily ni Ñgyoozh nu riidz na! —na dey.

¹² Dela mbecy bdzo'w laa dey, nunu guton la dey yu'y. Se nu rgugyi' zi'l dey lo losa'y yu'y:

—Ze' ¿lac yaruu de nu nii? —rnii dey.

¹³ Tees yu' ga' mbecy canu rgubdzaa dey. Orze' nay:

—¡Ni ricy dey gun rzugy yu! —na dey.

Bed mniyy lo de mbecy zigy

¹⁴ Orze' wes su Bed nu de' zir de trotub aposht gaze' nu brugyi' ye la rniiy. Orze' nay:

—De ru mbecy Israeel, gal nu dela de ru mbecy nu yu' gyedz Jerusaleeng, rlagy ñi gad lagy der de coz nu rac ii, nunu nap bzuub gyidag der de coz nu nee. ¹⁵ De mbecy ii walab nu rzugy dey gal nu rnii too de ru. Gyiib gaa zi or napor yu'n na. Walab i or gzugy mbecy. ¹⁶ Sinu na ricy yac ñi coz nu pcaa Joeel, yu nu mnii por cuen ni Ñgyoozh. Ñgyoozh nam:

¹⁷ Ornu bi yad lazh tiem,
ya rica Espiriit ne ni de lo la mbecy.
Orze' dela de yu nguzh ni dey,
gal nu dela de fiñ nguzh ni dey,
gnii dey por cuen ne.
De yu feñ gyicya nu de' lo dey de coz nu gac.
Nunu de yu bel lat pcaal dey rica nu gad lagy yu de
coz nu gac.

¹⁸ Laab tiem ze' rica Espiriit Yon ne ni yu nu ricy
coz nu rnee,
nunu rica'm ni de biñ mña nu ricy de coz nu rnee.
Orze' gnii dey por cuen ne.

¹⁹ Ya gyicya zañ coz ily baa.
Ze' lo yu gyicya coz par nu gad lagy mbecy la tiem.
Shu reñ; grib gyi; nunu grib dzeeñ nan.

²⁰ Gyet cow lo doo.
Ze' lo beey gyet ña gal na reñ.
Dela nde' gac ñii anzir nu shuub dzi nu bi pcui
par nu gyicya gyel fushtiz ne.
Dzi ze' tona' la dzi ily.
Nunu dzi ze' tona' la cyit gac.

²¹ Nunu dela mbecy nu nish baa lo nu gloo mbaña
dey,
de yu ze' gruu mbañ yu,
nam. Ni pcaa Joeel gulas.

²² 'De ru mbecy Israeel, bzuub gyidag der de coz nu nee na. Ñgyoozh naal la briic mi nu gad lagy der nu Jesuuz, biñ nu pcyiñ Nazaret, bdu' gyim riiñ ni Ñgyoozh nu nac de coz ily nu bicy mi lat de ru. Ñgyoozh bicy mi nu bicy Jesuuz zañ coz ily. Bicy mi nusuriidz. Bicy mi zañ coz par nu gad lagy der cyu nac mi. ²³ Tees Ñgyoozh nil nese gulas bi mne' ic mi, coz nu gyicy mi. Nunu bi gud lagy mi nu gyet lag mi yaa der. Orze' de ru gua nu der mi pres. Gaze' nu bicy der nu de mbecy nu wagyicy yac de leey ni Ñgyoozh biit dey mi lo cruuz. ²⁴ Tees Ñgyoozh bicy mi nu byabañ mi. Bloom mi lat de mbecy gut, gun ze' nu yu' mbecy gut wac soow ñi lom. ²⁵ Gun Dabi laab mi bzat yu ornu pcaay:

Ya rad lagya nu zaab zu gala Ñgyoozh lo.

Zub mi par yaa bee,

gun orze' mas lac ru' wagyicy deet mbecy nuy ya.

²⁶ Nde' nu tona' la gusu cyit lagya,

nunu mnee riidz nu rnii mbecy nu zu cyit lagy.

Nunu drish lo lo Ñgyoozh nu nac cuerp ne.

²⁷ Gun ru wazaan ru nu gyiyeen lardoo lat de mbecy gut.

Ni wazaan ru nu gadz cuerp ni mbecy yon nir.

²⁸ Ru mniir lo mod nu gyicya par nu cui mbaña.

Ya tona' la chesu cyit lagya, gun nac nur ya,

pcaa Dabi.

²⁹ 'Der bicy na, naal la za de riidz ii. Gyitoo bel ni den Dabi gut yu. Orze' pcach dey yu. Nunu baa niy rzac den ñi mas gal dzi na. ³⁰ Tees Dabi guc yu tub mbecy nu mnii por cuen ni Ñgyoozh. Gud lagy yu nu Ñgyoozh mniim nu waded la nu lat ca na

tub nez yu, ruu biñ nu pcuim nu gac Shuaan den gal nu ub yu guc yu rey nu byub ic den. ³¹ Nde' nu Dabi gud lagy yu coz nu gyicy Ñgyoozh. Mniiy nu biñ nu pcuim nu co mbañ de mbecy nim gat mi. Orze' gyabañ mi. Mniiy nu lardoom wayiyeeñ ñi lugaar ze' nu ryeeñ de mbecy gut, nunu mniiy nu cuerp nim wadz ñi. ³² Mi ze' laab Jesuuz. Bicy Ñgyoozh nu byabañ mi, nunu de ya bzaac urlō la de nde'. ³³ Na Ñgyoozh bicy mi nu zub mi ze' nu zub biñ zub lo zir par dela. Zub mi par yaa beem. Orze' Ñgyoozh Uz mi briic mi Espiriit Yon nim ni mi ze'. Gal nu mniim, ni bicy mi. Na dela coz nu rzac der ii, nunu dela coz nu reñ der ii, dela nii bruuñ gal lom. ³⁴ Gun Dabi walab ub yu gup yu gyibaa gal nu gup Jesuuz. Sinu ub lay mniiy ornu nay:

Ñgyoozh nam rab mi Shuaan na:

Bzub par yaa beë, se' mbecy zub lo zir,

³⁵ Lat nu gyicya nu gyicy ru gan de losa' yuur, nam, na Dabi.

³⁶ 'Nde' nu dela mbecy Israeel rlagy ñi nu gad lagy dey nu Jesuuz, biñ nu biit dey lo cruuz, Ñgyoozh bicy mi nu nac mi Shuaan den, nunu nac mi biñ nu bloo sum nu co mbañ den —na Bed.

³⁷ Ornu güeñ de mbecy de riidz ze', orze' tona' la bicy dey sentiir nañ lardooy. Gaze' nu na dey rab yu Bed nu de' zir de aposht:

—Der bicy na, ¿la coz rlagy ñi nu gyicy de? —na dey.

³⁸ Orze' na Bed rab yu dey:

—Mne' der dela de cyi nu ricy ru, nunu dela der bzu nis der par nu gabe nu nac der mbecy ni Jesucrisht, gun orze' gyicy sulagy Ñgyoozh de

cyi der, nunu gaze' nu cuic mi Espiriit Yon nim ni der. ³⁹ Gun Ñgyoozh bi mniim nu segur la cuic mi Espiriit Yon nim ni de ru nu ni de i'ñ ru nu chu' par lo, nu ni dela de mbecy nu yu' zet, de yu nu bi blosum —na Bed.

⁴⁰ Dela nde' mniiy, nunu zañ zir riidz mniiy lo dey. Briic yu consef ni dey. Nunu mniiy lac gyicy dey. Orze' i mod mniiy:

—Bicy der nu glar ni cashtig nu cuic Ñgyoozh ni de mbecy a' nap nu yu' na —nay.

⁴¹ Orze' de yu nu “O” mnii ni de riidz nu mnii Bed, dela dey bzu nis yu. Dzi ze' chon miily mbecy brugyi' ricy cup yu consuel lo Jesuuz, reñ de yu nu nil bi ricy cup consuel lom. ⁴² Orze' dela dey fert la zu dey shcab nu nac de coz nu rlyuu de aposht. Nunu yatublaazh dela dey nu ro nuy losa'y riidz. Nunu yatublaazh dela dey ricy yu che nu losa'y gal mod nu bzeen Crisht. Nunu yatublaazh dey nii nuy Ñgyoozh. De nde' coz nu zaab bicy la dey.

Mod nu gu' de mbecy loga la ni Crisht

⁴³ Dela de mbecy za nu ic dey nu nac de coz nu bicy de aposht, gun de aposht bicy dey zañ coz ily. Nunu zañ nusuriidz bicy dey. ⁴⁴ Dela de yu nu ricy cup consuel lo Crisht ze' tona' la nap byap riidz ni dey nu losa'y. Nunu dela dey rlew yu de coz nu cyiñ lat de losa'y. ⁴⁵ Rut dey de coz nu yu' niy. Orze' rlew dey ñuu ga tiñ nu losa'y dub gal lac tant nu cyiñ ni tub ga dey. ⁴⁶ Orze' de dzi la yatublaazh dey nañ yu' nu driib zily mbecy Ñgyoozh, nunu yatublaazha' dey yu' losa'y nu ricy dey che tublaazh gal mod nu bzeen Crisht. Nap zu lagy dey. Nunu dub gal ri lagy dey bicy yu de nde'.

⁴⁷ Ryabic dey gyel mbecy ni Ñgyoozh. Nunu dela reña' mbecy, nap yu' nuy dey. Nunu Ñgyoozh tub dzi ga rcyaañ zir mi mbecy nu ricy cup consuel lo Crisht.

3

Tub mbecy coj byac yu

¹ Tub dzi Bed nu Waa rca dey zay par ic tublaazh la. Za dey ze' nu zub yu' nu driib zily mbecy Ñgyoozh. Bi yu'n tub gyiib chon or gudze. Nde' or nu rnii nu mbecy Ñgyoozh. ² Orze' tub mbecy nu nil coj la ornu gul, de dzi la rza nu mbecy yu. Rzuub dey yu gyero' nu la Ro' Cyit Na. Laab ro' ni yu' nu driib zily dey Ñgyoozh. Rza nu dey mbecy coj ze' rzuub dey yu ze' par nu rgyiĩ yu gun lo de mbecy nu rzu' nañ yu' ze'. ³ Na ornu bzaac yu Bed nu Waa nu se nu chu' zi'l dey nañ yu' ze', orze' bdiĩ yu gun lo dey. ⁴ Orze' rgüii dey loy. Gaze' nu na Bed rab yuy:

—Bgüii lo de —nay.

⁵ Orze' mbecy coj ze' mbi la bgüiiy lo dey, gun psa' lagy yu nu la zi coz cuic dey niy. ⁶ Tees Bed nay rab yuy:

—Rila sac tiñ ne nu ricā nir, tees coz nu ricy cupā gac ricā nir. Nu rishbeey ni Jesucrisht, biñ nu pcyiĩ Nazaret, ya rnee dū ru wes su nunu bza —nay.

⁷ Gaze' nu bdu' yaa Bed yaa bee mbecy coj ze' pshes suy yu. Orze' lueg la byanap lab yu, nunu byanap yeñ gyi'y. ⁸ Orze' rzab lay wes suy, nunu brugyi' lay rzay. Gaze' nu gu' nuy dey nañ yu' nu driib zily mbecy Ñgyoozh. Rza lay, nunu yes nañ

yu, nunu brugyi' ryabic yu gyel mbecy ni Ñgyoozh.
⁹ Orze' dela de mbecy zigy bzaac dey nu rac rzay, nunu ryabic yu gyel mbecy ni Ñgyoozh. ¹⁰ Se nu za nu zi'l ic dey, nunu bdzo'w laa dey nu nac coz nu guc nu yu ze', gun byu' lo dey yu nu laab yu nu rzub rgyiñ gun gyero' nu la Ro' Cyit Na ni yu' nu driib zily mbecy Ñgyoozh.

Coz nu mnii Bed ru' coredoor nu la “Coredoor ni Salomoong”

¹¹ Ze' mbecy nu guc coj ze' waglaa ga' la yaay Bed nu Waa. Nunu dela de mbecy za nu la ic dey. Nunu orze' lueg la byatublaazh dey par ru' tub coredoor ni yu' nu driib zily mbecy Ñgyoozh. Coredoor ze' lañ Coredoor ni Salomoong. ¹² Ornu bzaac Bed de nde', orze' nay rab yu dela mbecy:

—Der mbecy Israeel, ¿lagu dzi za nu ic der nu nac nii? ¿Lagu dzi rgüii der lo de? Walab nu dzi rcyiiñ de ub zi'l de, nunu walab nu dzi nac du de Ñgyoozh, walab nde' nu rac rza mbecy ii.

¹³ Ñgyoozh, biñ nu guc nu de gyitoo bel ni den, Abraham, Isaac nu Jacob, laab mi ze' ricy zily mi I'ñ mi Jesuuz tiem na. De ru bgu' der mi yaa de mbecy nu riib ic. De ru mnii zi der nim mas tiem nu ngulagy Pilato nlaay mi. ¹⁴ Mi ze' biñ yon, biñ nu sac cyi, tees de ru mne' der mi. Lugaar nu nii der nu ndulaa mi ze', ca tub yu nu rut mbecy mnii der nu dulaay. ¹⁵ Orze' biit der mi ze', biñ nu rbic gyel mbañ. Tees Ñgyoozh bicy mi nu byabañ mi. ¹⁶ Laab nu nac Jesuuz ze', byanap gyi' mbecy ii, gun de ya ricy cup de consuel lom. Nunu yu ii, yu nu nil rzac der, nunu yu' lo der yu. Nu nac nu ricy

cup de consuel lom, nde' nu byac nap lay lo rgüii la dela der.

¹⁷ 'Der bicy na, ya rad lagya nu de ru gal nu de yu nu riib ic ni der, ornu biit der Jesuuz, rishli gaal wangyet lag nap der cuen coz nu bicy ru. ¹⁸ Ni guc gun byu' ni de coz nu gulas bi mnii Ñgyoozh nu nac de yu nu mnii por cuen nim. Mniim nu Mesías, biñ nu ca lo cuen nu co mbañ mbecy rlagy ñi nu zac zim. ¹⁹ Nde' nu na mne' der dela de coz cyi nu ricy ru. "O" mnii der ni Ñgyoozh, gun orze' cyib mi dela cyi der. Gun orze' gyicy mi nu cyid tiem nu gad nu zu lagy der nañ lardoor como nac num der. ²⁰ Nunu zeed mi Jesuuz. Mi ze' Mesías, biñ nu nil nese gulas bi bloo sum par de ru. ²¹ Mi ze' rlagy ñi cyiñ mi gyibaa gal shuub la dzi nu gzu nap Ñgyoozh dela coz gal nu bi mnii de mbecy nu bloo sum nu mnii por cuen nim gulas. ²² Gun Moisees nay rab yu de gyitoo bel ni den: "Ñgyoozh, Shuaan den, gzeed mi tuuba' mbecy nu nii por cuen nim gal nu bzeed mi ya. Mbecy ze' laab lat losa' zi'l der gruuy. Rlagy ñi zuub gyidag der dela coz nu gñiiy. ²³ Cyu zi'l mbecy nu wazuub gyidag ni mbecy nu nii por cuen nim ze', dela dey zu chum yu, nunu nit lom yu", na Moisees.

²⁴ 'Dela de yu nu mnii por cuen ni Ñgyoozh, gaal zi gush ñi nese Samueel, nu de' zir dey, dela de yu ze' bi mnii dey coz nu rac tiem na. ²⁵ Yaa de ru gyiyeeñ dela gyel nap nu mnii Ñgyoozh nu segur la cuic mi: de coz nu mniim lo de yu nu mnii por cuen nim nu nii dey. Nunu yaa de ru gyiyeeñ dela gyel nap ni trat nu bicy Ñgyoozh num de gyitoo bel ni den, ornu nam rab mi Abraham:

“Nu nac nez ru cyid gyel nap lat dela mbecy nu yu' gyishlombecy”, nam. ²⁶ Orze' ornu bicy mi nu byabañ I'ñ mi, nu loga la bzeed mi mi ze' nu cyid mi lat de ru nu gyicy mi coz nap num der. Ni bicy mi gun orze' tub ga la der gruur lo de coz cyi nu ricy ru —na Bed.

4

Bed nu Waa chay lo de yu lily

¹ Lat nu zu Bed nu Waa, rniyy lo de mbecy zigy, orze' bru'ña de uz ni de mbecy Israeel, nunu bru'ña de yu nu rña yu' nu driib zily mbecy Ñgyoozh, nunu bru'ña de mbecy saduceo. ² Pcha' ic dey, gun blyuu Bed ni de mbecy nu Jesuuz byabañ mi. Nunu nde' cuic ñi nu gad lagy de mbecy nu gyabañ dela mbecy gut. ³ Orze' bdu' yaa dey Bed. Mne' dey yu nañ yu' gyiib. Orze' gal ze' byeeñ yu gal tuuba' dzi, gun bi gudze. ⁴ Ze' zigy mbecy nu güeñ de riidz nu mnii Bed, bicy cup dey consuel lo Jesuuz. Orze' byañ dey. Nu rnii tub gaay miily dey byac yu orze'.

De mbecy zigy mnii nu dey Ñgyoozh

⁵ Orze' tuuba' dzi byatublaazh zigy mbecy zub lo ni de mbecy Israeel. Yu' de yu nu riib ic de mbecy Israeel. Yu' ga' de yu bel ni dey. Yu' de yu rlyuu leey ni mbecy Israeel. ⁶ Byatublaazh dey Jerusaleeng nu Anás, yu nu riib ic de uz ni de mbecy Israeel, nu Caifás, nu Waa, nu Alejandro, nu de' zir de yu nu nac famil ni yu nu riib ic de uz ze'. ⁷ Orze' bzuu nez dey mbecy nu cha tee dey Bed nu Waa. Orze' bzuub dey yu lat dey. Orze' na dey rab yuy:

—¿Lac guc nu rac ricy der nii?, o ¿cyu briic rishbeey nu ni gyicy der? —na dey.

⁸ Orze' Espiriit Yon ni Ñgyoozh riib ic za' lam nañ lardoo Bed. Orze' nay rab yu dey:

—De ru, yu nu riib ic ledz na, gal nu de ru yu bel, ⁹ benu rgugyi' der par nu nac coz nap nu bicy de nu mbecy coj ze', nunu par nu gad lagy der lac mod byac yu, ¹⁰ orze' ya rica nu gad lagy de ru gal nu dela mbecy Israeel nu nu nac rishbeey ni Jesucrisht, biñ nu pcyiñ Nazaret, byac yu ii, nunu nde' nu zuy lat dela der ii na la. Laab mi ze' biñ nu pcaa der lo cruuz. Tees Ñgyoozh bicy mi nu byabañ mi. ¹¹ Jesuuz nam gal nu na tub gyita'. Ze' de ru nar gal na biryu. Gyita' ze' mne' der ñii, tees na byac ñi gyita' zub lo zir. ¹² Nu nac Jesucrisht zi'l gac ruu mbañ den, gun Ñgyoozh wansat mi ni tuba' la mbecy gyishlombecy ii lo den nu co mbañ de ub na —na Bed.

¹³ Orze' de mbecy nu zu riiñ ze' tona' la za nu ic yu, ornu bzaac dey nu wachib la Bed nu Waa mniiy, mas nac dey mbecy cualcyer la. A' yu' lo dey gyicy. Tees de mbecy nu zu riiñ ze' byu' lo dey yu nu nac yu mbecy nu gusa nu Jesuuz. ¹⁴ Tees wangaca' nii dey gun bzaac dey mbecy nu byac ze'. Zuy nu Bed nu Waa. ¹⁵ Orze' bzuu nez dey Bed nu Waa nu ruu dey lat de mbecy ze'. Orze' brugyi' ro nu dey losa'y riidz. ¹⁶ Orze' na dey:

—¿Lac gyicy tun dey? Dela mbecy nu yu' Jerusaleeng gad lagy dey nu bicy dey nusuriidz ze' nunu wac niin nu walab ni. ¹⁷ Tees par nu cue' gad lagy zir mbecy de riidz nu rnii dey, rlagy ñi nu

gyicy den mandaar lo dey nu bee na zi'l par lo rila cue' ga' nii dey nu nac Jesuuz —na dey.

¹⁸ Orze' bredz dey Bed nu Waa. Orze' mnii dey lo dey nu rila cue' ga' nii dey, nunu cue' lyuu dey nu nac Jesuuz. ¹⁹ Orze' na Bed nu Waa rab yu dey:

—Gush der shcab ben ca na nu nap zir par lo Ñgyoozh: a nu zuub gyidag de ni de ru uti nu zuub gyidag de nim. ²⁰ Gun wac checa de nu zat de de coz nu bzaaca, gal nu de riidz nu güeña —na dey.

²¹ Orze' fert zir mnii dey lo Bed nu lo Waa nu cue' ni gyicy dey. Orze' blaa dey yu. Wangad la mod nu mbic dey cashtig ni dey, gun dela mbecy ryabic dey gyel mbecy ni Ñgyoozh par nu nac de coz nu bzaac dey, ²² gun mbecy nu byac nu mod ni nusuriidz ze', yu ze' bded cyuu ña'n yu'y.

²³ Cuanzir nu blaa dey Bed nu Waa, orze' bish cya ga' dey zay lo de losa'y. Orze' briic dey nu gad lagy de yu ze' de coz nu mnii de uz ni de mbecy Israeel, gal nu de yu bel ni dey. ²⁴ Ornu güeñ dey nde', orze' mnii nu dey Ñgyoozh tublaazh la. Orze' na dey rab yum:

—Shuaan de, ru nac ru biñ nu psa' lagy baa nu gyishlombecy, nu nisyudoo, nu dela coz. ²⁵ Ru mniir ornu Espiriit Yon nir pcaam gyitoo bel ne de Dabi, yu nu bicy dela coz nu mniir, ornu mniiy:

¿Lagu dzi guzi lagy de mbecy nu walab mbecy Israeel?

¿Lagu bicy dey mod ton par nu gyicy yu gan Ñgyoozh?

²⁶ De rey nu de yu nu zu riiñ bi bzu lily dey nu chucooy nu Ñgyoozh.

Byatublaazh dey nu zay contr nim,

nunu zay contr ni biñ nu bloo sum,
na Dabi.

²⁷ 'Gun laab Herodes nu Poncio Pilato byatublaazh dey gyedz ii nuy de mbecy nu walab mbecy Israeel, gal nu de mbecy Israeel par nu cha dey contr ni Jesuuz. Jesuuz nac mi biñ Yon nu bicy yac dela coz nu ru mniir. Jesuuz nac mi Mesías, biñ nu ca lo cuen nu co mbañ mbecy. ²⁸ Tees byatublaazh dey gun bicy yu dela coz nu bi bloo ic ru nu gac. Ru bloo ic ru nde', gun ru ricy cup ru mod nu ni gyicy ru, nunu nde' mod nu rlagy ru. ²⁹ Orze' ru, Ñgyoozh, bdu' cuen ni nu rnii zi dey ne de, nunu doo baloor ne de par nu wadzib la de nee de riidz nu ruu lor. ³⁰ Gun orze' gyicy ru nu gzac dela mbecy nu dzi coz ily gyicy ru. Ricy yac ru de mbecy rat, nunu ricy ru nusuriidz nu nac Jesuuz, biñ Yon nu bicy yac dela coz nu mniir —na dey rab yu Ñgyoozh.

³¹ Ornu blazh mnii nu dey Ñgyoozh, orze' bicy mi nu briib duru lugaar ze' nu byatublaazh dey ze'. Orze' Espiriit Yon nim gutib ic za' lam nañ lardoo tub ga la dey. Orze' brugyi' nu wachib la dey rniiy de riidz nu bruu lo Ñgyoozh.

³² Dela de mbecy nu bicy cup consuel lo Crisht bicy dey tub zi'l shcab. Ni tub la mbecy wangyicy yu nu de coz niy, nde' coz par ub zi'l yu. Orze' dela coz nac ñii ni delay. ³³ Nunu fert la bzat de aposht nu byabañ Crisht lo de mbecy. Nunu Ñgyoozh briic mi de gyel nap ni dela dey. ³⁴ Sac ni tub mbecy lat dey nu ricy falt la coz niy. De yu nu mbish yu ni, biit yu yu niy. Ze' de yu nu zub yu', biit yu yu'y. Orze' gua nu dey tiñ nu guud niy. ³⁵ Orze' bzeen

dey ñi yaa de aposht. Orze' bleez dey de tiñ ze' ni de mbecy dub gal lac ga lagy tub ga dey.

³⁶ Ni mod bicy tub mbecy nu la See. Yu ze' nez Leví. Gul yu Chipre, tees de aposht bloo la dey yu Bernabee. Riidz ze' yaruuñ: Yu nu rbic consuel.

³⁷ Mbish tub nac yu niy. Orze' biit yu yu ze' niy. Orze' gua zeeñ yu tiñ yaa de aposht.

5

Cyi nu bicy Ananías nu Safira

¹ Ze' zu tub mbecy nu la Ananías. Mñaay lam Safira. Orze' biit dey tub nac yu niy. ² Pcaa chuy tub nac tiñ par ub yu. Orze' bzeeñ yu de' zir tiñ ze' yaa de aposht. Nunu gud lagy mñaay dela coz nu bicy yu. ³ Orze' na Bed rab yuy:

—Ananías, walab se'ñ nu bzaan ru nu nuras gyicy yu nu guur Espiriit Yon ni Ñgyoozh ornu pcaa chur ñuu tiñ ni yu nir par ub ru. ⁴ Anzir nu cut ru yu ze', orze' nac ñii coz nir. Na ornu biit ru ñii, ni' zi'l tiñ nu guud nir ze' nac ñii coz nir. Orze' ¿lagu ni mnii toor nu bguur? Ru bguur Ñgyoozh. Walab mbecy bguur —na Bed.

⁵ Orze' cuanzir nu güeñ Ananías de riidz ze', orze' wes saa lay lo yu, nunu gut lay. Orze' dela mbecy, ornu gud lagy dey nu gut yu, dela dey gudzib yu. ⁶ Orze' wes su la be yu feñ. Orze' ptiish dey yu negy. Orze' za nu dey yu nu cach yuy.

⁷ Na ornu bi bi bded nu bza' chon or, orze' bru'ña mñaay tees wangad lagy mi la guc. ⁸ Orze' na Bed rab yum:

—Mnii ben ¿a rishli a nde' dela tiñ nu guud ornu biit der yu nir? —nay.

Orze' nam:

—Laab nde' dela tiñ nu guud —nam.

⁹ Orze' na Bed rab yum:

—¿Lagu bicy der preb Espiriit Yon ni Ñgyoozh nu ñgyeer? Bzuub gyidag rzigy gyi' de yu nu yeed nu gua cach ñgyeer. Bi yeed dey ro' ii, nunu ni' zi'l cha nu dey ru —nay.

¹⁰ Orze' lueg la wes saa ga' lam garee la lo Bed. Orze' gut lam. Orze' bru'ña de yu feñ ze'. Bzaac dey nu mbish mi gut mi. Orze' za nu' la dey mi. Pcach dey mi laab cuit ñgyeem. ¹¹ Orze' dela de mbecy ni Crisht nu de' zir de mbecy, ornu güeñ dey nu ni guc, orze' tona' la gudzib dey.

Nusuriidz ni de aposht

¹² Na orze' de aposht bicy dey zañ nusuriidz, nunu bicy dey zañ coz nu za nu ic mbecy. Orze' dela mbecy nu ricy cup consuel lo Crisht by-atublaazh dey tub lugaar nu la Coredoor ni Salomoong. ¹³ Ni tub la de mbecy nu a' ricy cup consuel lo Crisht walagy yu chu'y lat dey, tees dela mbecy gyedz mnii nap yu ni dey. ¹⁴ Orze' dzi zir ryañ de mbecy nu ricy cup consuel lo Ñgyoozh: tant yu gyeey nunu tant biñ mña. Orze' tona' la mbecy zigy byac. ¹⁵ Par nu nac de coz nu bicy de aposht, orze' nde' nu de mbecy gua nu dey de mbecy rat gyernez. Orze' brish dey yu lo nuun nu lo da', gun ornu ded Bed ben a wal mas ñuu sheñ yu de mbecy rat ze'. ¹⁶ Nunu tona' la bru'ña de mbecy zigy nu yu' de gyedz nu ri gaab ga Jerusaleeng. Gua nu dey de mbecy rat, nunu gua nu dey de mbecy nu bicy ni nuras. Nunu dela dey byac yu.

De aposht rzac ziy

¹⁷ Orze' gusaap lagy yu nu riib ic de uz ni mbecy Israeel, gal nu de yu nu nac nuy, de yu nu nac nu leey ni de mbecy saduceo. Orze' bicy dey tub zi'l riidz nu shiñ gyicy nu dey de aposht. ¹⁸ Orze' pshet yaa dey de aposht. Gua nu dey yu yu' gyiib. ¹⁹ Tees laab rel ze' bru'ña tub anc ni Ñgyoozh. Orze' pshaal yu ro' ni yu' gyiib ze'. Orze' blooy dey par ich yu'. Orze' nay rab yu dey:

²⁰ —Gua der ze' nu driib zily de mbecy Ñgyoozh. Orze' shaal der lo de mbecy de riidz nu rnii lac mod gyicy de mbecy ni Crisht —nay.

²¹ Orze' de aposht bicy yac dey gal nu mnii anc ze'. Or bza' yu tuuba' dzi, orze' gua dey ze' nu zub yu' nu driib zily de mbecy Ñgyoozh. Orze' brugyi' rlyuu dey ni de mbecy.

Na yu nu riib ic de uz nu de' zir losa'y bredz dey de yu bel nu zu riiñ ni junt zub lo nu gyatublaazh dey. Orze' bzeed dey rasoo lo de yu nu rña ro' gyiib ze' nu coy de aposht nu cha nuy yu lo dey. ²² Tees ornu bru'ña de yu nu za nu rasoo ro' gyiib, orze' wangyada' de aposht ni dey. Orze' bish cya ga' dey yay lo de mbecy nu yu' junt ze'. Orze' nay rab yu dey:

²³ —Ornu bru'ña de ro' gyiib, orze' noow nicy lañ. Nunu yu' de yu nu rña ro' ze'. Tees ornu pshaal de ro', orze' bzaac de nu saca' ni tuba' la mbecy ze' nañ ñi —na dey.

²⁴ Na ornu güeñ yu nu riib ic de yu nu rña yu' ze', nunu ornu güeñ de uz zub lo, orze' brugyi' rash dey shcab nu la zi coz yad ñi nu gac par lo. ²⁵ Gaze' nu bru'ña tub mbecy. Orze' nay rab yu dey:

—Güii der, de mbecy nu mne' der nañ yu' gyiib, yu'y loli' ni yu' nu driib zily den Ñgyoozh. Rlyuu dey ni de mbecy —nay.

²⁶ Orze' tub yu nu riib ic de mbecy nu rña yu' nu driib zily mbecy Ñgyoozh nu de yu nu rña yu' ze' gua tee dey de aposht. Gua nu dey yu lo de yu nu zu riin ni junt ze'. Tees walab por fers la gua nu dey yu, gun rdzib dey lo de mbecy zigy nis shet dey gyita' too dey. ²⁷ Orze' bicy dey nu gu' de aposht nañ yu' ze'. Bzu dey yu par ze' nu ta' lo de mbecy nu yu' junt ze'. Orze' yu nu riib ic de uz nay rab yu de aposht:

²⁸ —De ya fert pcaa de der nu cue' lyuu der ni de mbecy nu nac mbecy ze', tees jna güii la bicy der! De ru ptush las der riidz, nunu rlyuu der dutuub la Jerusaleeng. Nunu de ru rlagy ru gyicy ru nu de ya yu' falt ne nu gut yu —na dey.

²⁹ Orze' na Bed nu de' zir de aposht:

—Rlagy ñi nu zuub gyidag de ni Ñgyoozh walab ni mbecy. ³⁰ Ñgyoozh, biñ nu briib zily de gyitoo bel ni den, bicy mi nu byabañ Jesuuz, biñ nu biit der ornu pcaa der mi lo cruuz. ³¹ Orze' Ñgyoozh bicy zily mi mi ze'. Gusub mi par yaa bee Ñgyoozh. Byac mi biñ nu riib ic, nunu biñ nu rboo mbañ de mbecy, gun orze' gad mod nu ne' de mbecy Israeel de coz cyi nu ricy yu. Nunu gyicy sulagy Ñgyoozh de cyi nu ricy dey. ³² De ya rnee de coz nu bzaac de lo de mbecy. Ni ricy de nu nac Espiriit Yon ni Ñgyoozh, biñ nu briic Ñgyoozh ni de yu nu rzuub gyidag nim —na dey.

³³ Na ornu güeñ de yu nu yu' junt ze' de riidz nu mnii de aposht, orze' tona' la guzi lagy dey. Orze' ngulagy dey ñgyut yu de aposht. ³⁴ Tees lat de mbecy ze' ri tub yu nu la Gamaliel. Guc yu mbecy fariseo. Guc yu tub mbecy nu rlyuu leey ni Ñgyoozh. Nunu dela mbecy pca lagy dey loy. Orze' yu ze' wes suy lat de mbecy nu yu' junt ze'. Orze' pcaay de mbecy nu co chu dey de aposht tub miiñ. ³⁵ Orze' nay rab yu de mbecy nu yu' junt ze':

—De ru mbecy Israeel, cuidad der nu nac coz nu rlagy ru gyicy nur de mbecy ii. ³⁶ Rad lagy der nu bi rac tiem bruu zac Teudas. Mniyy nu nac yu tub mbecy lily. Nunu tub tap gaynal mbecy gusa nu dey yu. Tees biit mbecy yu, nunu brush las de yu nu gusa nuy. Orze' guca de coz nu bicy yu. ³⁷ Orze' despuees bruu zaca' Judas, yu nu gul Galilea. Tiem ze' bruu ña'n de mbecy. Ni' yu ze' gusa nu mbecy yu. Tees biita' mbecy yu, nunu brush lasa' de yu nu gusa nuy. ³⁸ Orze' ni' zi'l rac na. Orze' ya rdoō rishlo der nu cue' shiñ gyicy nu der de yu ii. Blaa der dey, gun benu coz nu rboo ic ub zi'l dey o benu coz nu ricy dey, nde' coz ni mbecy zi'l, orze' nit loñ. ³⁹ Tees benu nde' coz nu bruu lo Ñgyoozh, orze' rila wac nit lo der ñii. Cuidad der nis cha der contr ni Ñgyoozh —nay.

Orze' de mbecy nu yu' junt ze' bicy yac dey nu consef ni Gamaliel. ⁴⁰ Orze' bredz dey de aposht. Gaze' nu bgaaz dey yu. Gaze' nu pcaa dey yu nu rila cue' ga' nii dey nu nac Jesuuz. Gaze' nu blaa dey yu. ⁴¹ Orze' bruu de aposht lo de mbecy nu gu' junt ze'. Orze' tona' la bet lagy dey, gun Ñgyoozh bicy mi nu byap dey nu gzac ziy, nunu byap dey

nu bruu gyel mbecy ni dey nu nac Jesuuz. ⁴² Nunu de dzi la zaab rlyuu la dey ni de mbecy ze' nu zub yu' nu driib zily de mbecy Ñgyoozh, gal nu nañ yu' ni mbecy, nunu zaab rshaal la dey lo de mbecy de riidz nu sac ni Jesuuz, biñ nu ca lo cuen nu co mbañ mbecy.

6

De mbecy ni Crisht bloo su dey yu nu locyuub de aposht

¹ Laab tiem ze', ornu bi ryañ zir de mbecy nu ricy cup consuel lo Crisht, orze' de mbecy Israeel nu rnii griego nu de mbecy Israeel nu rnii hebreo, riidz guledz, bdza' dey ni losa'y. De mbecy nu rnii griego mnii dey nu wagyicy paa mbecy ornu rgyeez dey de coz nu gow byud nu yu' lat dey. ² Orze' trocyup de aposht ze' bredz dey de mbecy nu ricy cup consuel lo Crisht. Orze' na dey rab yu dey:

—Walab se'ñ nu checa de nu nee de riidz ni Ñgyoozh par nu lyuu de ni der nu lac mod gyicy nu der de coz nu gow de mbecy. ³ Orze' de ru bicy na, laab lat der bloo su gagy yu gyeey, de yu nu rca lagy der lo. Rlagy ñi mbecy nu riib ic za' la Espiriit Yon ni Ñgyoozh nañ lardoo, nunu rlagy ñi mbecy nu yu' shcab ni. Orze' de ya du' de riin ze' yaa dey. ⁴ Ze' de ya, dub laa tiem nee du de Ñgyoozh, nunu shaal de de riidz nim —na dey.

⁵ Orze' dela mbecy bet lagy dey riidz nu mnii de aposht ze'. Orze' bloo su dey Shteb, tub mbecy nu tona' la fert ricy cup consuel lo Crisht. Nunu riib ic za' la Espiriit Yon ni Ñgyoozh nañ lardooy.

Gush lañ: Lip, nu Proc, nu Nicanor, nu Timón, nu Parmenas, nu Lyaa, tub mbecy nu gul Antioquía. De uz yu walab mbecy Israeel, tees ub yu gush yu leey ni mbecy Israeel. Dela yu ze' bloo su dey. ⁶Orze' de mbecy gua nu dey yu lo de aposht. Orze' de aposht briib yaay too tub ga dey, nunu mnii nu dey Ñgyoozh nu nac dey.

⁷ Orze' zaab drush las la de riidz ni Ñgyoozh. Orze' tona' la byañ de mbecy nu ricy cup consuel lo Crisht Jerusaleeng. Gashtal zig y de uz ni de mbecy Israeel bicy cup dey consuel lo Crisht.

Bdu' yaa mbecy Shteb

⁸ Orze' yu nu la Shteb ze', tona' la nap bicy nu Ñgyoozh yu nunu dzi rcyiñ yu nu gyicy yu coz nu rlagy mi. Bicy yu zañ nusuriidz, nunu zañ coz nu za nu ic mbecy bicy yu. ⁹ Tees yu' la be mbecy nu gua contr niy. Yu' mbecy nu bruu lat de mbecy nu rza nañ yu' nu rsya' de mbecy riidz ni Ñgyoozh, yu' nu la Yu' ni De Mbecy nu Bdulaa Yaa. Yu' mbecy nu bruu Cirene, yu' mbecy nu bruu Alejandría, yu' mbecy Cilicia. Yu' ga' mbecy nu bruu lo de yu nu la Asia. Orze' brugyi' ro zi dey riidz nu Shteb. ¹⁰ Tees Espiriit Yon ni Ñgyoozh pshaal mi shcab ni Shteb. Par nu tona' la nap mniy, wangaca' la nii de mbecy nu radzay. ¹¹ Orze' briish dey ni mbecy par nu riib yu cyi fals ic Shteb. Orze' na de mbecy ze':

—De ya güeña nu Shteb rniy riidz nu za contr ni Moisees, nu riidz nu za contr ni Ñgyoozh —na dey.

¹² Ni mod pcha' dey ic de mbecy. Pcha' dey ic de yu bel, nunu pcha' dey ic de yu nu rlyuu leey

ni Ñgyoozh. Orze' gua dey lo Shteb pshet yaa dey yu. Gua nu dey yu lo de yu nu yu' junt zub lo ze'.
¹³ Gaze' nu gua nu dey la be de mbecy nu briib cyi fals ic Shteb. Orze' na dey:

—Mbecy ii zaab rnii lay riidz nu za contr ni yu' yon nu driib zily den Ñgyoozh, nunu rniy riidz nu za contr ni leey nu bzeen Moisees. ¹⁴ Gun güen de nu mniy nu Jesuuz, tub mbecy nu pcyiin Nazaret, tily yu yu' yon ni Ñgyoozh nin, nunu rchaay de cushtom nu bzeen Moisees ni de gyitoo bel —na dey.

¹⁵ Orze' dela mbecy nu nguaa lat junt ze' bgüii dey lo Shteb. Orze' bzaac dey nu rgüiy gal nu rgüii tub anc.

7

¹ Yu nu riib ic de uz ni de mbecy Israeel nay rab yu Shteb:

—¿A laab rishli? —nay.

² Orze' na Shteb rab yu de mbecy zigy:

—De ru bicya gal nu de ru uza bzuub gyidag der ne. Ñgyoozh, biñ nu zily zir nac, bruu zac mi lo gyitoo bel nin Abraham, lat nu pcyiin yu Mesopotamia, anzir nu chay cyiin yu Harán.

³ Orze' nam rab mi yu: “Bzeen famil nir, nunu bzeen ledz ru. Gua lo yu nu ya lyuu lor”, nam.

⁴ Orze' bruu Abraham lo de yu ni Caldea. Zay cyiin yu Harán. Na ornu gut uz yu, orze' Ñgyoozh bicy mi nu yad yu de lugaar ii cyiin yu. Ledz na ii pcyiin yu. ⁵ Tees Ñgyoozh wancuic mi ni tub lugaar ganiy. Ni ñuu miiñ yu wancuic mi niy. Tees mniim nu segur la cuic mi de lugaar ii ganiy. Mniim nu segur

la nu de lugaar ii gac niy, nunu gac ni de nez yu par lo, mas tiem ze' sac i'ñ yu. ⁶ Nii cox nu mnii Ñgyoozh lo Abraham: “De nez ru rcyiiñ yu tub lugaar nu walab ledz yu. Gac yu moz ni mbecy por fers la. De mbecy lugaar ze' tona' la shiñ gyicy nu dey yu lat tap gaynal na'ñ. ⁷ Tees ya rica cashtig ni de yu nu shiñ gyicy ze'. Gaze' nu gruu de nez ru lugaar ze', nunu ca dey ya ii”, nam. ⁸ Orze' Ñgyoozh bicy mi tub trat nu Abraham, nunu mniim nu rlagy ñi ca beey nu la sircunsision cuerp ni de yu gyeey par nu gabe nu nac nuy trat ze'. Orze' gaze' nu gul Isaac, i'ñ yu. Ornu bza' shuñ dzi nu gul Isaac, orze' pcaay beey sircunsision cuerp niy. Orze' despuees Isaac pcaay beey sircunsision cuerp ni i'ñ yu Jacob. Jacob pcaay beey sircunsision cuerp ni trocyup i'ñ yu: laab lo de yu ze' guch trocyup nac nez de mbecy Israeel.

⁹ Tees de i'ñ yu bicy saap lagy dey ich bicy yu See. Orze' biit dey yu. Orze' mbecy wii dey yu. Byac yu moz por fers la ni tub mbecy Egipto. Tees Ñgyoozh gusa num yu. ¹⁰ Nunu Ñgyoozh bloo nap mi yu lat dela gyel deet nu bzac yu. Ornu bru'ñay lo Faraón, yu nu riib ic Egipto, orze' Ñgyoozh bicy mi nu gud lagy Faraón nu nap yu, nunu yu' shcab niy. Orze' Faraón bdu'y riiñ yaay nu gyub ic yu lo dela yu ni Egipto, nunu gyub ic yu nañ yu'y.

¹¹ Na biid cubiñ lo dela de yu ni Egipto nu lo de yu ni Canaán. Tona' la bzac zi mbecy nu nac cubiñ ze'. Wangad cox nu gow de gyitoo bel ni den. ¹² Ornu Jacob güeñ yu nu yu' trig Egipto, bzuu nez yu de i'ñ yu, de yu nu nac gyitoo bel ni den, nu cha dey ze'. Nde' byaj loga la nu gya dey. ¹³ Byaj

cyup See mniyy lo de bicy yu cyu nac yu. Orze' gud lagy Faraón cyu nez nac See. ¹⁴ Orze' See bzeed yu rasoo lo uz yu, nunu lo dela famil niy. Mniyy nu cha dey gashtal Egipto. Chon gal ruub gaay dey nac yu. ¹⁵ Orze' Jacob guay Egipto. Ze' gut yu nu dela too bel ni den. ¹⁶ Orze' despuees gua nu dey cuerp ni See, gal nu cuerp ni Jacob par Siquem. Pcach dey ñi nañ tub gyeeg ni blyuu nu wií Abraham par la be pezh lo de nez Hamor.

¹⁷ 'Na or bi pshuub dzi nu gyicy yac Ñgyoozh ni de riidz nu mniim lo Abraham, orze' tona' la byañ de nez na Egipto. ¹⁸ Orze' reña' mbecy gutib ic yu Egipto. Yu ze' wanchu' loy See. ¹⁹ Bguuy de nez den. Shiñ bicy nuy dey. Pcaay de nez den por fers la nu ne' dey de mdoo gyeey nu sa gul ni dey, gun orze' gat yu. ²⁰ Orze' tiem ze' gul Moisees. Tona' la bet lagy Ñgyoozh yu. Nañ chon beey bguul dey yu yu' uz yu. ²¹ Ornu bloo chu dey yu, orze' byash i'ñ Faraón yu. Bicy i'ñ ñiy. Bguul ñiy gal i'ñ lañ. ²² Orze' de mbecy blyuu dey ni Moisees dela shcab lily ni de mbecy Egipto. Orze' Moisees byac yu tub mbecy nu tona' la lily na. Coz ily bicy yu, nunu coz ily mniyy.

²³ 'Na ornu Moisees yu'y tub ña'n cyuu, orze' mnii tooy nu cha güiyy la ricy de losa'y, de mbecy Israeel. ²⁴ Orze' bzaac yu nu shiñ ricy tub mbecy Egipto nu tub losa'y. Orze' pcay yu. Orze' bicy gal gay nu mbecy Egipto ze'. Orze' biit yuy. ²⁵ Psa' lagy yu nu de losa'y ñgyet lag dey cuen nu Ñgyoozh gyicy mi nu laab yu co nap yu de losa'y yaa de mbecy Egipto. Tees wangyet lag dey cuen. ²⁶ Na tuuba' dzi bzaac yu nu rucoo tub mbecy Israeel laab nu

losa'y. Bicy peey nu ñgyicy yu nu ganap lagy dey lo losa'y. Orze' nay rab yu dey: “¡Bzub gyidag der! De ru bicy ru losa'r. ¿Lagu shiñ ricy nur losa'r?” nay. ²⁷ Orze' yu nu shiñ ricy nu losa' ze' bzuub yaay Moisees par cuit yu. Orze' nay rab yuy: “Se cyu la briib riñ ic ru nu gyub ic ru de ya, nunu par nu gri beer ne de. ²⁸ Ze' na, ¿a cuta'r ya gal nu biit ru mbecy Egipto ze' naag?” nay.

²⁹ 'Na ornu güeñ Moisees nde' na, orze' bruu chuy Egipto. Orze' gua yat yu. Guay pcyiñ yu lo de yu nu la Madián. Ze' pchelaay. Orze' gul cyup i'ñ gyeey yu. ³⁰ Na ornu bza' cyuu ña'n, orze' bruu zac tub anc loy lat lyush gyi nu rcañ tub yag tub lugaar ub zi gaab ga bicy Sinaí. ³¹ Tona' la za nu ic yu par nu nac coz nu bzaac yu. Orze' byagaab yu lo yag ze' par nu zac nap zir yuñ. Orze' güeñ yu nu rnii Ñgyoozh. ³² Orze' nam: “Ya naca Ñgyoozh ni de gyitoo bel nir: Ñgyoozh ni Abraham, Ñgyoozh ni Isaac, Ñgyoozh ni Jacob”, nam. Orze' gush bis yu nu gudzyb yu nu nac de coz nu bzaac yu. Orze' wancuica'y baloor nu ngüiy lo yag ze'. ³³ Orze' na Ñgyoozh rab mi yu: “Bloo gyid lab ru, gun ze' nu zur ze', ze' lugaar yon. ³⁴ Ya rzaca nu dzi rzac zi de mbecy ne Egipto, nunu reña nu rzuub ti' dey. Nde' nu ya bi beta na, par nu gloo mbaña dey. Da, gun ya zuu neza ru gyar par Egipto”, na Ñgyoozh rab mi Moisees.

³⁵ 'Moisees, bdiily lo de mbecy Israel loy. Mnii dey: “Se cyu la bicy nu ru gyub ic ru de ya, nunu ri beer ne de”, mnii dey. Ze' Moisees Ñgyoozh bzuu nez mi yu nu gyub ic yu dey, nunu par nu co nap yu dey. Ni bicy mi nu nac anc nu bruu zac lat yag

nu pca gyi ze'. ³⁶ Orze' laab Moisees gua nuy de mbecy ornu bruu dey Egipto. Bicy yu nusuriidz, nunu bicy yu coz nu za nu ic mbecy. Bicy yu de nde' Egipto, gal nu ru' nisyudoo ña, gal nu de lugaar ub zi de nez nu gusa dey cyuu ña'n. ³⁷ Laab Moisees mniiy gugy yu de mbecy Israeel: “Ñgyoozh gzuu nez mi tub mbecy nu nii por cuen nim gal nu bzuu nez mi ya. Mbecy ze' gruuy lat nez de ru”, na Moisees. ³⁸ Moisees, yu ze' yu nu gusa lat de mbecy zigy, de mbecy Israeel, lugaar ub zi. Gusa nuy de gyitoo bel ni den, nunu gusa nuy anc, yu nu mnii loy too bicy Sinaí. Laab yu gush yu riidz ni Ñgyoozh, riidz nu rnii lac mod cyiiñ den. Orze' bzeñ yuñ par de ub na.

³⁹ 'De gyitoo bel bdiily lo dey loy. Wansuub gyidag dey niy. Bzu chu dey yu, nunu bicy pee dey mbish cya ga'y par Egipto. ⁴⁰ Nde' nu na dey rab yu Aroong: “Bzaa la be ñgyoozh nu cha gam par lo den, gun wagad lagy den la bzac Moisees, yu nu bloo de ub na Egipto”, na dey. ⁴¹ Gaze' nu bzaa dey tub nab mod nu na tub biser. Orze' biit dey bañcyug. Pshu dey reñ ma looñ. Tona' la bet lagy dey coz nu bzaa dey nu yaay. ⁴² Orze' Ñgyoozh bruum lat dey. Nunu bzaan mi nu gyicy ñgyoozh dey de bel baa. Nde' coz nu bi ca lo libr ni de mbecy nu mnii por cuen ni Ñgyoozh. Orze' rniiñ:

Ñgyoozh nam:

De ru mbecy Israeel, walab lo ya biit der bañcyug nu pshur reñ lat cyuu ña'n nu gusa der de lugaar ub zi.

⁴³ Sinu biit der bañcyug nañ yu' ni ñgyoozh nu la Moloc,

tub ñgyoozh nu gusa nu der tiem ze'.
 Nunu biit der bañcyug lo nab bel baa,
 tub ñgyoozh ni der nu la Refán.
 De nde' nab nu bzaa der.
 Bicy der ñii par ñgyoozh ni der.
 Orze' ya zuu neza der gal lugaar nu zeta' zir par
 Babilonia,
 nam, ni pcaa de mbecy nu mnii por cuen nim.

⁴⁴ De gyitoo bel ni den bicy cup dey tub yu' negy
 ze' nu pca dey Ñgyoozh lat nu gusa dey de lugaar ub
 zi. Yu' ze' byaañ mod nu mnii Ñgyoozh lo Moisees.
 Mod nu bzaac yu, ni mod bzaa dey ñi. ⁴⁵ Ornu gusa
 nu dey Josué, orze' za nu dey yu' negy ze' lugaar ze'
 nu bloo dey yu yaa reña' mbecy, de mbecy nu bloo
 chu Ñgyoozh. Orze' lo de yu ze' byeeñ yu' negy ze'
 gal pshuub la tiem ni Dabi. ⁴⁶ Dabi bicy yu mod nu
 nap bicy nu Ñgyoozh yu. Orze' bdiñ yu rishbeey
 lo Ñgyoozh nu zaay tub yu' par ub mi, laab biñ nu
 briib zily Jacob. ⁴⁷ Tees Salomoong, yu ze' bzaay
 yu' ze' ni Ñgyoozh. ⁴⁸ Tees mi ze', biñ nu zily zir nac
 wac cyiñ mi nañ yu' nu rzaa mbecy. Nde' nu ni
 mnii de yu nu mnii por cuen nim ornu nay:

⁴⁹ Ñgyoozh nam:

“Gyibaa, ze' nañ gal nu na tub yashily nu zuba riib
 ica dela coz.

Ze' gyishlombecy ii nañ gal nu na tub coz nu zub
 gyi'.

¿La na yu' nu zaa der ne?

¿Ca zu tub lugaar nu zu lagya?

⁵⁰ ¿A walab ya bzaa dela coz ii?”

mniiim, na de yu nu mnii por cuen nim.

⁵¹ '¡Dzi ga cyigy too der! ¡Lardoo der nañ gal nu na lardoo tub mbecy nu a' yu' lo Ñgyoozh! Na der gal nu na tub mbecy go' par lo de riidz ni Ñgyoozh. De ru nar gal na' zi'l de gyitoo bel nir. Dub laa tiem ricy der coz nu za contr ni Espiriit Yon ni Ñgyoozh. ⁵² Sac ni tub mbecy nu mnii por cuen ni Ñgyoozh nu wansheed zi de gyitoo bel ni der. Tees biit dey dela mbecy nu mnii nu cyid biñ Yon, biñ nu ricy yac dela coz nu rnii Ñgyoozh. Orze' na de ru bish cya der ich biñ yon ze', nunu biit der mi. ⁵³ Laab de ru mbecy nu byeeñ leey ni Ñgyoozh yaa, leey nu bzeeñ de anc, tees wagycy yac der niñ —na Shteb.

Biit dey Shteb

⁵⁴ Ornu de mbecy nu yu' junt ze' güeñ dey de riidz nu mnii Shteb, orze' tona' la guzi lagy dey, nunu psiigy lay dey loy. ⁵⁵ Tees Espiriit Yon ni Ñgyoozh briib ic za' lam nañ lardoo Shteb. Orze' bgüiiy par gyibaa, nunu bzaac yu gyel lily ni Ñgyoozh, nunu bzaac yu Jesuuz zum par yaa bee Ñgyoozh. ⁵⁶ Orze' nay:

—¡Güii der! Yä rzacä ryaal baa, nunu biñ nu byac mbecy zum par yaa bee Ñgyoozh —nay.

⁵⁷ Orze' de mbecy psoow dey gyidag yu, nunu brish ti dey. Orze' bgo la dey too Shteb. ⁵⁸ Orze' bruu nu dey yu lat gyedz. Orze' bgoow gyita' dey yu par nu gat yu. De mbecy nu mnii nu bzaac nu shiñ bicy Shteb ze' bzeeñ dey shab yu nu ña tub yu feñ nu la Saulo.

⁵⁹ Orze' de mbecy fert la yu' dey rgoow gyita'y Shteb lat nu rnii nuy Ñgyoozh. Orze' nay:

—Jesuuz, Shuaana, byash espiirit ne —nay.

⁶⁰ Orze' gusu tib yu. Gaze' nu ye la mniy. Orze' nay:

—Shuaana, cue' cuic ru cashtig ni dey nu nac coz nu ricy yu —nay.

Na ornu mniy nde', orze' gut lay.

8

Bded zi mbecy ni Crisht

¹ Nunu Saulo bet lagy yu nu biit dey Shteb.

Laab dzi ze' de mbecy nu ricy cup consuel lo Crisht Jerusaleeng brugyi' nu tona' la rzac zi dey. Orze' dela dey brush las yu par dela lugaar ni Judea nu dela lugaar ni Samaria. Nomaas de aposht zi'l wancyuu dey Jerusaleeng. ² Tees la be mbecy nu tona' la rca lagy lo Ñgyoozh, de yu ze' pcach dey Shteb, nunu tona' la bicy dey sentiir. ³ Tees Saulo mbicy peey nu nit loy dela mbecy nu ricy cup consuel lo Crisht. Gaza' yu' gaza' yu' la rzu'y. Bgayu tuñ lay mña gyeey la de yu nu ricy cup consuel lo Crisht par nu cha nuy dey nañ yu' gyiib.

Pshaal dey riidz ni Ñgyoozh Samaria

⁴ Na de mbecy nu ricy cup consuel lo Crisht brush las dey zay dela lugaar. Za shaal dey riidz ni Crisht. ⁵ Orze' Lip guay gyedz nu la Samaria. Lo de mbecy ze' pshaal yu riidz ni Crisht. ⁶ De mbecy zigy dzi nap bicy cuen dey de riidz nu mnii Lip. Bzuub gyidag dey riidz nu mniy, nunu bzaac dey de nusuriidz nu bicy yu. ⁷ Nunu zigy mbecy nu bicy ni nuras byac yu. De nuras tona' la rbish tiy. Orze' bruu chuy lo dey. Zañ mbecy chi, gal nu

zañ mbecy coj byac yu. ⁸ Nunu de mbecy Samaria tona' la gucyit lagy dey.

⁹ Na laab gyedz ze' rcyiiiñ tub mbecy nu la Simoo. Bi rac tiem rguuy de mbecy Samaria nu fis gyel tu' niy. Mniiy nu tona' la mbecy lily nac yu. ¹⁰ Dela mbecy nu yu' gyedz ze' dzi nap bicy cuen dey de riidz nu rniyy gush lañ de yu shni gashtal de yu lily. Mnii dey:

—Simoo nac yu biñ ni Ñgyoozh nu dzi cyiiiñ nu gyicy coz ily —rnii dey.

¹¹ Tona' la bicy cuen de mbecy yu gun dzi gulas rguuy dey nu fis gyel tu' niy. ¹² Tees ornu bicy cup de mbecy consuel lo de riidz nap ni gyel gubier ni Ñgyoozh nunu de riidz nap ni Jesucrisht, de riidz nu mnii Lip, orze' bzu nis dey. Bzu nis de yu gyeey nunu bzu nisa' de biñ mña. ¹³ Ni' Simoo bicy cup yu consuel lo Crisht. Ornu bzu nis yu, orze' gua cay ich Lip dela lugaar ze' nu zay, nunu tona' la gua nu ic yu ornu bzaac yu nu ricy Lip nusuriidz, gal nu de' zir de coz ily.

¹⁴ Na de aposht nu yu' Jerusaleeng güeñ dey nu de mbecy Samaria gush dey de riidz ni Ñgyoozh. Orze' bzuu nez dey Bed nu Waa nu chay lo dey. ¹⁵ Na ornu bru'ña dey, mnii nu dey Ñgyoozh nu nac de mbecy nu ricy cup consuel lo Crisht. Bdiññ dey lo Ñgyoozh nu cuic mi Espiriit Yon nim ni dey, ¹⁶ gun Espiriit Yon ni Ñgyoozh nigul gyicy nim ni tub la dey. Nomaas nu bi bzu nis zi'l dey par nu gabe nu nac yu mbecy ni Crisht. ¹⁷ Orze' Bed nu Waa gul yaa dey de mbecy ze', nunu Ñgyoozh briic mi Espiriit Yon nim ni dey.

¹⁸ Na Simoo bzaac yu nu Ñgyoozh briic mi Espiriit Yon nim ni de mbecy ornu gul yaa de aposht dey. Orze' mniiy nu cuic yu tiñ ni Bed nu ni Waa.

¹⁹ Orze' nay:

—Gyicy ru nu gac gyicy ya nde', gun orze' cyu zi'l mbecy nu gal yaa Ñgyoozh cuic mi Espiriit Yon nim niy —nay.

²⁰ Orze' na Bed rab yu Simoo:

—¡Ru nu dela tiñ nir gyar gabily! Gun ru rnii toor nu gac zir coz nu cuic Ñgyoozh. ²¹ Riiñ nu ricy de ya nii rila wac gyicy ru ñii, gun a' nap lardoor par lo Ñgyoozh. ²² Orze' mne' coz a' nap nu rlagy ru gyicy ru ze' nunu bdiiñ lo Ñgyoozh ben a gyicy sulagy mi nir par nu nac coz nu psa' lagy ru nañ lardoor. ²³ Gun ya rad lagya nu ru dza laa nañ lardoor yu' coz lya nunu coz cyi riib ic ñi ru —nay.

²⁴ Orze' na Simoo rab yu Bed nu Waa:

—Bdiiñ lo Ñgyoozh ne nu cue' gzaca de coz nu mniir ze' —nay.

²⁵ Na ornu Bed nu Waa pshaal dey de coz nap nu bicy Jesuuz num dey, nunu mnii dey riidz ni Ñgyoozh, orze' bruu dey Samaria ya dey par Jerusaleeng. Lat nu ya dey, zañ tir pshaal dey de riidz nu sac nu bruu lo Ñgyoozh de gyedz nu yu' lo yu ni Samaria.

²⁶ Orze' tub anc ni Ñgyoozh mniiy lo Lip. Orze' nay:

—Bzu lily, nunu gua par yaa been ornu güiin ze' nu driib doo par ze' nu riib nez nu za par Gaza —nay.

Laab nez nu za ze' rded ñi tub lugaar ub zi.

²⁷ Orze' Lip bzu lily yu. Orze' zay. Na laab nez nu

zay ze' bdzeel yu tub mbecy Etiopía. Yu ze' nac yu mbecy capoo. Tona' la riiñ ily zuy. Nac yu tesorero ni biñ mñaan nu nac rey ni de mbecy Etiopía. Yu ze' guay Jerusaleeng par nu riib zily yu Ñgyoozh, tees ²⁸ bi bish cyay yay par ledz yu. Zub yu nañ caret niy rsya'y libr ni Isaías, tub yu nu mnii por cuen ni Ñgyoozh.

²⁹ Orze' na Espiriit Yon ni Ñgyoozh rab mi Lip:

—Becha' lo caret re, nunu cue' gyazet ru looñ —nam.

³⁰ Orze' ornu becha' Lip lo caret ze', orze' güeñ yu nu rlab mbecy ze' riidz ni libr ni Isaías, yu nu mnii por cuen ni Ñgyoozh. Orze' nay rab yu mbecy ze':

—¿A yet lag ru cuen de riidz nu rlab ru? —nay.

³¹ Orze' na mbecy ze' rab yu Lip:

—¿Lac gyicya gyet laga cuen, ze' sac cyu yu nu shaal lo? —nay.

Orze' mniy lo Lip nu chu'y nañ caret nu gzub nuy yu. ³² Na ze' nu rlab yu lo riidz ni Ñgyoozh ze' rniñ:

Mi ze' nam gal na tub shily nu za nu dey lo mbecy par nu cut yu ma.

Mi ze' nam gal nu tub shily nu wani la ma ornu rshi'ñ mbecy gyich ma.

Ni tub riidz wanniim.

³³ Mbecy bicy gyidz dey mi, nunu wangyicy dey gyel fushtiz nuy mi.

Ni tub la mbecy wac zat dey nez mi, gun bza' lo dey lo yum, rniñ.

³⁴ Orze' mbecy nu zu riiñ ze' nay rab yu Lip:

—Mnii lo cyu mbecy rzat yu nu mnii por cuen ni Ñgyoozh lat nu pcaay riidz ii. ¿A laab ub yu rzat yu uti reña' mbecy? —nay.

³⁵ Orze' Lip brugyi' rniyy. Gush yu nu loga la ze' nu blab mbecy ze' lo libr ni Isaías. Orze' mniyy dela riidz nap ni Crisht. ³⁶ Na lat nu zaab za dey nez, bru'ña dey tub lugaar ze' nu yu' nis. Orze' na yu nu zu riiñ ze' rab yu Lip:

—Ii yu' nis. ¿A wac zu nisa? —nay.

³⁷ Orze' na Lip rab yuy:

—Gac zu nis ru, benu ru ricy cup ru consuel lo Crisht nu dutuub la lardoor —nay.

Orze' nay rab yu Lip:

—Ya zeña lagya nu Jesucrisht nac mi I'ñ Ñgyoozh —nay.

³⁸ Orze' yu nu zu riiñ ze' mnii nuy mbecy nu rsaa caret ze' nu chesuy. Na orze' bruuy nañ caret za nuy Lip tublaazh la par lo nis. Orze' Lip briib nis yuy. ³⁹ Na ornu bruuy lo nis, orze' Espiriit Yon ni Ñgyoozh byash mi Lip za num yu. Mbecy nu zu riiñ ze' wansaaca'y Lip tuuba' tir, tees lat nu zaab zay nez, tona' la zu cyit lagy yu. ⁴⁰ Na Lip gud lagy yu nu zuy tub gyedz nu la Azoto. Orze' zay gaza' gyedz la pshaal yu de riidz nu sac nu bruu lo Ñgyoozh gashtal bru'ña lay tub gyedz nu la Cesarea.

9

Saulo byac yu mbecy ni Crisht

¹ Laab tiem ze' Saulo gabee mniyy nu cut yu de mbecy nu ricy cup consuel lo Shuaan den. Orze' guay lo mbecy nu riib ic de uz. ² Lo yu ze' blooy tub

gyicy ni rishbeey nu cha nuy lo de mbecy nu rza nañ yu' nu rsya' mbecy Israeel riidz ni Ñgyoozh, de yu nu yu' Damasco. Orze' nu gyicy ze' ricy cup yu rishbeey nu gya nuy de yu nu gush nez cub ni Crisht par Jerusaleeng. Tant yu gyeey nunu tant biñ mñãa gya nuy.

³ Na nez nu zay, ornu birgaab Damasco, orze' sij la bet tub yaa. Bruuñ gashtal baa bet ñi dub yub la lo Saulo. ⁴ Orze' wes saay lo yu. Orze' güeñ yu nu zaab ti' tub mbecy rniim. Orze' nam rab mi yu:

—Saulo, Saulo, ¿lagu rsheed zir ya? —nam.

⁵ Orze' na Saulo:

—¿Cyu ru Shuaana? —nay.

Orze' na ga' biñ nu zaab ti' nu rnii ze'.

—Ya naca Jesuuz, biñ nu ru rsheed zir. ⁶ Weshte. Gu' lat gyedz. Ze' nii mbecy la coz rlagy ñi nu gyicy ru —nam.

⁷ Orze' de yu nu za nuy wagnii la dey, gun tona' la gudzib dey, gun güeñ dey nu rnii mbecy, tees wansac yu ni tub la mbecy. ⁸ Orze' Saulo weshtey. Na ornu pshaal yu urloy na, orze' wangac zac yu ni tub la coz. Orze' bdu' yaa dey yaay za nu dey yu par Damasco. ⁹ Chon dzi wangac zac yu. Chon dzi nde' rila wangoy gyit, nunu rila wango'y nis.

¹⁰ Ze' Damasco zu tub mbecy nu ricy cup consuel lo Crisht, yu nu la Ananías. Orze' Shuaan den bruu zac mi loy. Orze' nam rab mi yu:

—¡Ananías! —nam.

Orze' na Ananías:

—Íi zu, Shuaana —nay.

¹¹ Orze' na Shuaan den rab mi yu:

—Wes su. Gua tub cay nu la Cay nu Li. Orze' yu' Judas ze' cugyi'r tub mbecy nu ledz Tarso, yu nu la

Saulo. Zuy rnii nuy ya. ¹² Orze' mod ni pcaal bde' tub mbecy nu la Ananías loy. Gal yaay yu gun orze' zac yu tuuba' tir —nam rab mi Ananías.

¹³ Orze' Ananías nay rab yum:

—Zañ mbecy rniy coz nu ricy yu ze' lo. Zañ coz a' nap bicy nuy de mbecy nir nu yu' Jerusaleeng.

¹⁴ Orze' na briy Damasco nu rishbeey nu bruu lo mbecy nu riib ic de uz par nu gya nuy dela mbecy nu rzat ru pres —na Ananías.

¹⁵ Orze' na Shuaan den rab mi yu:

—Gua gun ya bloo su yu nu gyicy yu riin ne, nunu zat yu ya lo de mbecy. Zat yu ya lo de mbecy nu walab mbecy Israeel. Nunu zat yu ya lo de mbecy nu zu riin. Nunu zat yu ya lo de mbecy Israeel. ¹⁶ Laab ub la lyuu loy dela coz nu gzac ziy nu nac ya —nam.

¹⁷ Orze' gua Ananías. Gu'y nañ yu' ze'. Gul yaay Saulo. Orze' nay rab yuy:

—Bicya Saulo, Shuaan den Jesuuz, biñ nu bruu zac lor nez nu yad ru, bzuu nez mi ya nu yapa lor, gun orze' zac ru tuuba' tir, nunu gac ru mbecy nu gyub ic za' la Espiriit Yon ni Ñgyoozh nañ lardoo —nay.

¹⁸ Orze' lueg la tub coz nu na gal na gyid ich bel bruuñ urlo Saulo bet lag ñi. Orze' brugyi' rzac yu tuuba' tir. Orze' wes suy, nunu bzu nis yu. ¹⁹ Na ornu bdoy gyit, orze' guud fers niy. Orze' Saulo byeeñ yu la be dzi nu de yu nu ricy cup consuel lo Crisht, de yu nu yu' Damasco.

Saulo rshaal yu riidz ni Crisht Damasco

²⁰ Orze' lueg la za Saulo yu' ze' nu rsya' de mbecy Israeel riidz ni Ñgyoozh, nunu brugyi' nu rshaal yu de coz ni Crisht. Orze' nay:

—Mi ze' nac mi i'ñ Ñgyoozh —nay.

²¹ Dela mbecy nu güeñ ze' tona' la za nu ic dey. Orze' na dey:

—¿A walab yu ii mbecy nu gusa pshet zi de mbecy nu rzat Jesuuz Jerusaleeng? Nunu ¿a walab nu yad yu ii par nu cha nuy dey pres, nunu gu'y dey yaa de yu zub lo ni uz? —na dey.

²² Tees niga niga byanap zir rshaal Saulo de riidz ni Crisht. Tona' la nap blyuuy nu Jesuuz nac mi Mesías, biñ nu ca lo cuen nu co mbañ mbecy. Ni wangaca' la nii de mbecy Israeel nu yu' Damasco nu radzay.

Briib dze Saulo

²³ Ornu bza' la be dzi, byatublaazh de mbecy Israeel, nunu psaap dey riidz nu cut dey Saulo.

²⁴ Tees mbecy mnii dey loy de coz nu rlagy dey gyicy nuy yu. Dzi rel la mña dey de ro' nu druu mbecy ru' gyedz, gun rlagy dey cut yuy. ²⁵ Orze' de mbecy nu ricy cup consuel lo Crisht bri dey yu nañ tub chicyiw ily. Pshet dey yu par ich lo' ni gyedz ze' rel. Ni mod briib dzey.

Ornu Saulo briy Jerusaleeng

²⁶ Na ornu Saulo briy Jerusaleeng, bicy peey nu ñgyac nuy de mbecy nu ricy cup consuel lo Crisht, tees wancheña lagy dey nu ricy cup yu consuel lom, nunu rdzib dela dey loy. ²⁷ Orze' Bernabee blocyuub yuy. Gua nuy yu lo de aposht. Orze' pshaal yu lo dey nu bzaac Saulo Shuaan den gyernez, nunu mnii num yu. Mniy nu Saulo

wacchib lay bzat yu Crisht lat de mbecy Damasco. ²⁸ Orze' Saulo byeeñ nuy dey, nunu gusay dutuub la lat gyedz Jerusaleeng. Wacchib lay rzat yu Crisht lat de mbecy. ²⁹ Orze' bee nuy de mbecy Israeel riidz, de yu nu rnii riidz griego. Nunu ptub su losa' dey nu riidz. Tees de mbecy ze' mbicy pee dey nu ñgyut dey yu. ³⁰ Tees ornu gud lagy de bicy na, orze' gua nu dey Saulo par Cesarea. Orze' bzuu nez dey yu yay Tarso.

³¹ Orze' dela de mbecy ni Crisht nu yu' lo de yu ni Judea, gal nu lo de yu ni Galilea, gal nu lo de yu ni Samaria, bi yu' gyel ri zu lat dey, nunu byafert zir dey nañ lardooy. Nunu Espiriit Yon ni Ñgyoozh blocyuub mi dey nu byañ zir yu lat nu gusa dey nu pca lagy dey lo Ñgyoozh.

Bed gusay Lida nu Jope

³² Ze' Bed gusay lat de mbecy ni Crisht. Guay lat de mbecy ni Crisht nu yu' Lida. ³³ Ze' bdzeel yu tub mbecy nu la Eneas. Yu ze' tub mbecy chī. Bi bza' shuñ ña'n nu wagac gyeshtey. Orze' Bed nay rab yuy:

³⁴ —Eneas, Jesucrisht gyicy yac mi ru. Weshte, nunu byash da' nir —nay.

Orze' lueg la weshte Eneas. ³⁵ Orze' dela mbecy nu yu' Lida, nunu dela mbecy nu yu' lo de yu ni Sarón byac dey mbecy nu ricy cup consuel lo Shuaan den ornu bzaac dey nu byac yu ze'.

³⁶ Na zu tub biñ mñaan nu la Tabita nu ricy cup consuel lo Crisht. Benu nu riidz griego, orze' lam Dorcas. Rcyiñ mi tub gyedz nu la Jope. Dub laa lat nu bzu biñ mñaan ze' gyishlombecy, bicy mi coz nap. Blocyuub mi de mbecy zi. ³⁷ Laab tiem ze'

gush güim gut mi. Orze' blaagy dey mi. Gaze' nu briish dey mi nañ tub yu'. Shily cyup nu zub gya briish dey mi. ³⁸ Na Jope gaab ga riñ nu Lida. Orze' ornu güeñ de yu nu ricy cup consuel lo Crisht, de yu nu yu' Jope nu ri Bed Lida, orze' bzuu nez dey cyup mbecy nu cha nuy rasoo nu gyicy lal Bed chay lo dey.

³⁹ Orze' Bed bzu lily yu za nuy dey. Na ornu briy lugaar ze' na, orze' gup nu dey yu nañ yu' cyup shily nu zub gya ze'. Orze' dela de byud bde' dem loy nu ruun dem. Nunu blyuu dem dela yaag, nu dela negy nu bzaa Dorcas ornu bzum gyishlombecy loy. ⁴⁰ Orze' Bed bloo chuy dem par ich yu'. Orze' gusu tib yu mnii nuy Ñgyoozh. Orze' bgüiiy lo biñ mña gut ze'. Orze' nay rab yum:

—¡Tabita, weshte! —nay.

Orze' mi ze' mbi bgüim loy. Ornu bzaac mi Bed, orze' weshtem. Gusub mi. ⁴¹ Orze' Bed bdu' yaay yaam blocyuub yum. Gaze' nu wes sum. Orze' bredz mbecy de yu nu ricy cup consuel, gal nu de byud. Orze' blyuuy mi lo dey nu mbañ mi. ⁴² Orze' bzu laa riidz ni de coz nu bicy yu dutuub la gyedz Jope. Nunu zañ mbecy bicy cup dey consuel lo Shuaan den. ⁴³ Orze' Bed byeeñ yu Jope zañ dzi. Ze' pcyiñ nuy tub mbecy, tub yu nu rcuugy gyid bañcyug, tub yu nu la Simoo.

10

Bed nu Cornelio

¹ Zu tub mbecy nu rcyiñ Cesarea, yu nu la Cornelio. Yu ze' yu nu riib ic tub gaynal soldad Rom. Byub ic yu tub nac soldad nu la Mbecy Italia.

² Yu ze' tona' la pcaa ic yu de coz ni Ñgyoozh. Pca lagy yu lom nu dela famil niy. Zañ gun briic yu ni de mbecy zi lat de mbecy Israeel, nunu zaab rnii nu laay Ñgyoozh. ³ Orze' tub dzi, tub gyiib chon or gudze, bruu zac tub anc ni Ñgyoozh loy. Orze' nay rab yuy:

—¡Cornelio! —nay.

⁴ Orze' mbi la bgüii Cornelio lo anc ze' gun gudzib yu.

Orze' nay:

—¿La coz rac shuaana? —nay rab yu anc.

Orze' na anc rab yu Cornelio:

—Ñgyoozh mniim nu nap ornu güeñ mi nu rnii nur mi, nunu ornu rzac mi de gun nu rbic ru ni de mbecy zi. ⁵ Orze' na zuu nez ru la be mbecy chay Joep nu cyid nuy tub mbecy nu la Simoo. Laab yu ze' yu nu la Bed. ⁶ Yu ze' rcyiiñ yu nu tub mbecy nu la laaba' Simoo, tub yu nu rcuugy gyid bañcyug. Rcyiiñ yu ru' nisyudoo —na anc ze'.

⁷ Na ornu bruu chu anc lo Cornelio. Orze' bredz Cornelio cyup yu nu ricy riiñ nañ yu'y nu tub soldad. Soldad ze' tub yu nu dzi rcaa ic de coz ni Ñgyoozh, nunu nac yu mbecy nu ricy zi'l coz nu rlagy Cornelio. ⁸ Orze' mniiy lo dey de coz nu guc. Gaze' nu bzuu nez yu dey zay par Joep.

⁹ Na tuuba' dzi, lat nu de mbecy ze' zaab zay nez, sñuu ga zi'l ri dey Joep, orze' Bed gup yu too yu' tub or wi doo par nu nii nuy Ñgyoozh. ¹⁰ Orze' brugyi' ran yu. Rlagy yu goy gyit. Na lat nu rduzu ye de coz nu goy, Ñgyoozh bicy mi nu bruu zac tub coz loy mod ni pcaal. ¹¹ Bzaac yu nu byaal baa. Orze' bet tub coz nu na gal nu na tub negy cuadrat nag se'

tap la scyiñ niñ yet ñi par lo yu. ¹² Orze' lo negy ze' nguaa de lo la bañcyug nu ricy cup tap gyi': gaza' de lo la nez bily nu de lo la chigyiñ. ¹³ Orze' na Ñgyoozh rab mi Bed:

—Bed, wes su. Biit de bañcyug ze' gow ru —nam.

¹⁴ Orze' na Bed:

—Cue' Shuaana. Yā rila wadaŵ de coz bag nu rlyuu leey ni Moisees, nunu rila wadaŵ coz nu a' yad ñi nu daŵ —nay.

¹⁵ Orze' na ga' Ñgyoozh rab mi yu tuuba' tir:

—Benu yā Ñgyoozh bicy caacyā la coz, orze' cue' niir nu nde' bag nañ —nam.

¹⁶ Chon tir guc de coz ze'. Orze' lueg la negy ze' gupa'ñ baa. ¹⁷ Orze' Bed gush yu shcab nañ lardooy ben lac yaruu de coz nu bruu zac loy. Laab or la ze' byad yu' ni Simoo ni de mbecy nu bzuu nez Cornelio. Guchu' dey ro'. ¹⁸ Orze' rbish ti dey nu bdugyi'y ben a zu tub yu nu la Simoo, laab yu ze' yu nu la Bed, lo de mbecy nu yu' ze'.

¹⁹ Na Bed gabee rash yu shcab par nu gyet lag yu cuen lac yaruu de coz nu bruu zac loy. Orze' Espiriit Yon ni Ñgyoozh nam rab mi yu:

—Bzuub gyidag. Zu chon mbecy nu ryub dey ru.

²⁰ Orze' na bzu lily laa. Bet la. Cue' gyicy cyup ic ru nu cha nur dey, gun yā bzuu neza dey —nam.

²¹ Orze' Bed bet yu. Zay lo de yu ze'. Orze' nay rab yu dey:

—Yā yu nu ryub der ze'. ¿La riñ yad der lo? —nay.

²² Gaze' nu na dey:

—Cornelio, yu nu riib ic tub gaynal soldad, bzuu nez yu de yā yapa. Yu ze' tub mbecy nap. Rca

lagy yu lo Ñgyoozh. Nunu dela de mbecy Israeel nap rnii dey niy. Tub anc ni Ñgyoozh mniyy loy nu cuedz yu ru char yu'y, gun orze' gac gyeñ yu coz nu rlagy ru niir —na dey.

²³ Orze' Bed mniyy nu chu' dey nañ yu', nunu mniyy nu gyeche dey ze'. Orze' tuuba' dzi bzu lily Bed nu za nuy dey, nunu la be de bicy na nu yu' Jope za nuy yu.

²⁴ Orze' gal tuuba' dzi bri dey Cesarea. Ze' blez Cornelio, nu de famil niy, nu de yu nu tona' la amig niy. Tub nac laa de yu ze' bredz yu. ²⁵ Na ornu Bed bru'ñay ro' Cornelio, orze' Cornelio za cheel yuy. Orze' gusu tib yu loy nu driib zily yuy. ²⁶ Tees Bed pshes suy yu. Orze' nay:

—Wes su gun ni' ya naca mbecy gal nu na ru —nay.

²⁷ Orze' Bed zaab ro lay riidz nu Cornelio lat nu ya dey nañ yu'. Ornu gu'y nañ yu', orze' bzaac yu nu yu' zigy mbecy nu byatublaazh nañ yu' ze'.

²⁸ Orze' na Bed rab yu dey:

—De ru nap rad lagy der nu leey ni de mbecy Israeel wazaan ñi nu gac nu dey mbecy nu walab mbecy Israeel. Nunu wac nu cha zaab lo dey loy. Tees Ñgyoozh blyuum ne nu cue' nee lo ni tub mbecy nu nac yu mbecy bdune' o nu nac yu mbecy nu a' yad ñi nu cha zaab lo lo. ²⁹ Orze' ornu bredz ru ya, wannee deeta, sinu lueg la yapa. Tees na rlagya gad lagya la gyi' bredz ru ya —nay.

³⁰ Orze' na Cornelio rab yu Bed:

—Gutap dzi ya zu yu'. Orze' i la or pca uba nu cue' daw gyit lat nu mnee du Ñgyoozh. Orze' bruu zac tub mbecy shab ryal lo. ³¹ Orze' nay rab yu ya:

“Cornelio, Ñgyoozh reñ mi coz nu rniir lom, nunu mniim nu dzi nap ornu rzac mi de gun nu rbic ru ni de mbecy zi. ³² Nde' nu na zuu nez ru moz chay Jope nu cha teey tub mbecy nu la Simoo, laab yu ze' yu la Bed. Yu ze' rcyiiñ yu yu' tub mbecy nu la laaba' Simoo, tub yu nu rcuugy gyid bañcyug. Rcyiñ yu ru' nisyudoo”, na anc ze'. ³³ Orze' ya lueg la bzuu neza dey nu biid teey ru. Nunu nap ñuu bicy ru nu yad ru. Na byatublaazh de ii, nunu Ñgyoozh zum lat de, nunu rlagy de gyeña dela coz nu pcaa Shuaan den ru nu niir lo de —nay.

De riidz nu mnii Bed yu' Cornelio

³⁴ Orze' brugyi' rnii Bed. Orze' nay:

—Na gaal bet laga cuen nu rishli Ñgyoozh tub zi'l mod ricy num dela mbecy. ³⁵ Tees Ñgyoozh gyash mi mbecy mas cyu zi'l nez yu benu ca lagy dey lom, nunu gyicy dey coz nu se'ñ. ³⁶ De ru rad lagy der nu Ñgyoozh bzeed mi rasoo ni de nez mbecy Israeel. Mniim nu nu nac Jesucrisht, biñ nu nac Shuaan dela mbecy, chu' gyel ri zu nañ lardoo dey. ³⁷ De ru rad lagy ru la coz guc dutuub la lugaar nu yu' de mbecy Israeel. Coz ze' brugyi'ñ lo de yu ni Galilea, despuees nu briib nis Waa de mbecy, nunu pshaal yu de riidz ni Ñgyoozh. ³⁸ De ru rad lagy ru de coz ni Jesuuz, biñ nu pcyiñ Nazaret. Rad lagy de ru nu pcui Ñgyoozh mi, nunu briic Ñgyoozh Espiriit Yon nim ni Jesuuz. Ñgyoozh bicy mi nu cyiñ mi nu gyicy mi coz ily dela lugaar nu gusam. Bicy mi coz nap, nunu bicy yac mi de mbecy nu bicy ras nu nuras. De nde' bicy mi gun Ñgyoozh nac num mi. ³⁹ Nunu de ya rnee de nu

bzaac de dela coz nu bicy mi ledz mbecy Israeel, nunu dela coz nu bicy mi Jerusaleeng. Pcaa dey mi lo cruuz. Ni mod biit dey mi. ⁴⁰ Tees ornu bza' dzi chon nu gut mi, orze' Ñgyoozh bicy mi nu byabañ mi, nunu bicy mi nu bruu zac mi lat de ya. ⁴¹ Walab dela mbecy bzaac dey mi, sinu de ya zi'l, yu nu bi pcui Ñgyoozh nu gnee de lo de mbecy de coz nu guc, de ya bzaac dem. Bdaw du dem gyit, nunu bdo' de nis dum despuees ornu byabañ mi. ⁴² Orze' pcaam de ya nu shaal de de riidz nu sac nu bruu lo Ñgyoozh lo de mbecy, nunu pcaam de ya nu nee de nu segur la mi ze' nac mi biñ nu bloo su Ñgyoozh par nu ri beem ni dela mbecy mbañ, nunu par nu ri beem ni dela mbecy nu bi gut. ⁴³ Dela yu nu mnii por cuen ni Ñgyoozh bi bzat dey mi. Mnii dey nu dela mbecy, de yu nu gyicy cup consuel lom, gyicy sulagy Ñgyoozh de cyi nu bicy dey. Par nu nac Jesucrisht gyicy sulagy mi ni dey —na Bed.

Espiriit Yon ni Ñgyoozh bicy nim de yu nu walab mbecy Israeel

⁴⁴ Lat nu gabee rnii Bed de riidz ze', orze' Espiriit Yon ni Ñgyoozh bicy nim tub ga la de yu nu rzuub gyidag de riidz nu rniy. ⁴⁵ De mbecy Israeel nu ricy cup consuel lo Crisht, de yu nu za nu Bed, tona' la za nu ic dey ornu bzaac dey nu Espiriit Yon ni Ñgyoozh ni' bicy nim de mbecy nu walab mbecy Israeel. ⁴⁶ Gud lagy dey nu bicy ni Espiriit Yon ni Ñgyoozh dey, gun mnii dey riidz reña' mbecy, nunu ryabic dey gyl mbecy ni Ñgyoozh. ⁴⁷ Orze' na Bed:

—De mbecy nu yu' ii byac ni Espiriit Yon ni Ñgyoozh gal nu guca' zi'l nu de ub na. Orze' ¿cyu gac ca ni dey nu cue' zu nis dey? —nay.

⁴⁸ Orze' Bed pcaay mbecy nu griib nis yu dey par nu gabe nu nac dey mbecy ni Jesucrisht. Orze' de mbecy ze' mnishbaa dey lo Bed nu gyiyeeñ nuy dey la be dzi.

11

Bed pshaal yu lo de mbecy ni Crisht nu yu' Jerusaleeng la guc

¹ Orze' de aposht nu de' zir bicy na nu yu' lo yu ni Judea güeñ dey nu ni' yu' mbecy nu walab mbecy Israeel nu guña lagy dey de riidz nu bruu lo Ñgyoozh. ² Orze' ornu bri Bed Jerusaleeng, de yu nu rlagy caa beey sircunsision cuerp ni mbecy nu walab mbecy Israeel mnii zi dey niy. ³ Orze' na dey rab yuy:

—¿Lagu gua güiir de mbecy nu walab mbecy Israeel? ¿Lagu bdow nur dey gyit? —na dey.

⁴ Orze' Bed pshaal yu dela coz nu guc gal ze' nu bzub la gyi' de coz nu bzac yu. ⁵ Orze' nay:

—Ya brī Jope. Orze' lat nu mneē dū Ñgyoozh, orze' bicy mi nu bde' tub coz lō. Ya bzaacā nu yet tub coz nu na gal na negy cuadrat ily. Za' tap la scyiñ niñ nag yet ñi. Bruuñ baa bet ñi gashtal lō. ⁶ Orze' mbi la bgüiñ nañ ñi. Orze' bzaacā de bañcyug nu zub tap gyi'. Bzaacā de bañ gyish. Bzaacā de lo la mni bily. Nunu bzaacā de chigyñ.

⁷ Orze' güeñā nu mnii Ñgyoozh. Orze' nam rab mi ya: “Bed, wes su. Biit de ma ze' gow ru”, nam.

⁸ Orze' Mneē lom: “Cue' Shuaana. Rila wagdaw

de coz bag nu rlyuu leey ni Moisees, nunu rila wagdaw coz nu a' yad ñi nu daw”, rugyam. ⁹ Orze' Ñgyoozh mnii ga'm tuuba' tir gal gyibaa. Orze' nam: “Benu ya, Ñgyoozh, bicy caacya la coz, orze' ru cue' niir nu nde' coz bag”, nam. ¹⁰ Ni bicy mi chon tir. Orze' despuees bish cya ga' negy ze' gup ñi baa tuuba' tir. ¹¹ Orze' lueg la bru'ña chon mbecy yu' ze' nu rcyiiña. Mbecy nu rcyiiñ gal Cesarea bzuu nez yu de mbecy ze' nu yad yub dey ya. ¹² Orze' Espiriit Yon ni Ñgyoozh mniim lo nu cue' gyicy cyup ica nu waya du dey. Ni' shuup de bicy na nu yu' ii gua nu dey ya par Cesarea. Orze' dela de gu' nañ yu' ni Cornelio. ¹³ Mniiy nu bzaac yu tub anc nañ yu'y. Orze' anc ze' mniiy loy: “Bzuu nez tub mbecy chay Jope cha tey tub mbecy nu la Simoo. Laab yu ze' yu nu la Bed. ¹⁴ Yu ze' gniiy de riidz lor. Nu nac riidz ze' gruu mbañ ru nu dela famil nir”, nay. ¹⁵ Orze' na ornu brugyi' rnee lo dey, orze' Espiriit Yon ni Ñgyoozh bicy nim dey gal nu bicy mi nu de ub na nu loga. ¹⁶ Orze' byeza' lagya tub coz nu mnii Shuaan den ornu nam: “Waa briib nis yu de ru nu nis, tees ya zeeda Espiriit Yon nu gyicy nim der”, nam. ¹⁷ Orze' benu Ñgyoozh rbic mi ni de mbecy nu walab mbecy Israeel laaba' coz nu briic mi ni de ub na ornu bicy cup na consuel lo Shuaan den, orze' ¿cyu guc ya nu ca ni Ñgyoozh nu cue' ni gyicy mi? —na Bed.

¹⁸ Na ornu güeñ de mbecy nde', orze' guca dey nu rnii ziy ni Bed, nunu byabic dey gyel mbecy ni Ñgyoozh. Orze' na dey:

—Orze' beni ni' zi'l briic Ñgyoozh ni de mbecy nu

walab mbecy Israeel mod nu ne' dey dela coz cyi nu ricy yu gun orze' cui mbañ dey tub la —na dey.

De mbecy ni Crisht nu yu' Antioquía

¹⁹ De mbecy nu ricy cup consuel lo Crisht brush las dey ornu bzac ziy tiem nu gut Shteb. Yu'y zay gashtal Fenicia. Yu'y zay gashtal Chipre. Yu' ga'y zay gashtal Antioquía. Pshaal dey de riidz nu bruu lo Ñgyoozh lo de mbecy Israeel zi'l. ²⁰ Ze' la be mbecy Chipre, nu la be mbecy Cirene, de yu nu ricy cup consuel lo Crisht, bri dey tub gyedz nu la Antioquía. Ze' pshaal dey de riidz nu sac ni Shuaan den Jesuuz lo gaza' de mbecy nu walab mbecy Israeel. ²¹ Tona' la blocyuub Ñgyoozh dey, nunu tona' la mbecy zigy bicy cup dey consuel lo Shuaan den, nunu guc nu dey mi.

²² Na ornu güeñ de mbecy nu ricy cup consuel lo Crisht nu yu' Jerusaleeng de coz nu guc, orze' bzeed dey Bernabee gal Antioquía. ²³ Na ornu briy, orze' bzaac yu nu tona' la nap bicy nu Ñgyoozh de mbecy ze'. Orze' tona' la bet lagy yu, nunu fert la mniy lo dey nu gyicy paay nu Shuaan den nu dutuub la lardoo dey. ²⁴ Na Bernabee nac yu mbecy nap. Espiriit Yon ni Ñgyoozh briib ic za' lam nañ lardooy. Nunu fert la bicy cup yu consuel lo Ñgyoozh. Orze' zigy mbecy ze' brugyi' nu ricy cup dey consuel lo Shuaan na.

²⁵ Orze' Bernabee guay Tarso nu yub yu Saulo.

²⁶ Na ornu byad yu na, orze' gua nuy yu par Antioquía. Nañ tub ña'n rup laa dey byatublaazh yu nu de mbecy nu ricy cup consuel lo Crisht nunu blyuu dey ni tub nac mbecy zigy. Antioquía, ze'

bzub gyi'ñ nu rnii dey “Mbetsy ni Crisht” de yu nu ricy cup consuel lo Crisht.

²⁷ Tiem ze' bruu la be mbetsy nu mnii por cuen ni Ñgyoozh Jerusaleeng. Za dey par Antioquía.

²⁸ Tub mbetsy nu la Agabo wes suy lat de mbetsy zigy. Orze' Espiriit Yon ni Ñgyoozh blocyuub mi yu, nunu mniiy nu sñuu ga cyid tub cubiñ ily dutuub la gyishlombetsy. Cubiñ ze' biid ñi, ornu Clau byub ic yu de nasyoong. ²⁹ Orze' dela de mbetsy ni Crisht mne' ic dey nu zeed yu ñuu tiñ nu locyuub yu de bicy yu nu yu' lo de yu ni Judea. Dub gal lac nu gagye tub ga dey, dub ni bzeed dey. ³⁰ Orze' ni bicy dey. Orze' bzuu nez dey Bernabee nu Saulo nu byazeñ yu gun ze' yaa de yu bel nu riib ic de mbetsy ni Crisht nu yu' lo de yu ni Judea.

12

Gut Santiag nunu guti Bed yu' gyiib

¹ Tiem ze' Herodes, tub yu nu riib ic de mbetsy Israeel, brugyi' rsheed ziy la be mbetsy ni Crisht.

² Pcaay mbetsy nu cut yu Santiag bicy Waa, nu mandzicy. ³ Na ornu bzaac yu nu tona' la bet lagy mbetsy Israeel nu biit yu Santiag, orze' psheta' yaay Bed. Ni guc tub sa' nu row dey gyishtily nu sac lebadur. ⁴ Na ornu bded nu bdu' yaay Bed, mne'y yu nañ yu' gyiib. Ze' bgu' dey yu yaa tap nac soldad. Tap ga soldad lo tub nac yu. De yu ze' mña dey yu. Herodes mnii tooy nu cha nuy Bed lo de mbetsy zigy, de mbetsy Israeel or ded sa' ze'.

⁵ Orze' guti Bed yu' gyiib, tees de mbetsy ni Crisht fert la mnii nu dey Ñgyoozh nu nac yu.

Ñgyoozh bloom Bed nañ yu' gyiib

⁶ Tub dzi anzir nu co ic Herodes nu cha nuy Bed lo de mbecy, na or guzeel rel, orze' nas la Bed lat cyup soldad nu rñay ze'. Nag yu nu cyup caden. Nunu zu cyupa' soldad ro' gyiib ze'. ⁷ Orze' derepent la bruu zac tub anc ni Ñgyoozh lo Bed. Orze' dutuub la nañ yu' ze' bzu yaa. Orze' gul yaa anc ze' cuit yu. Orze' brish yu yaa. Orze' nay rab yuy:

—¡Bicy lal! ¡Weshte! —nay.

Orze' lueg la bet lag caden nu nag yeñ yaa Bed.

⁸ Orze' na anc rab yuy:

—Bicy nicy sinch nir, nunu pcaa gyi' gyid lab ru —nay.

Orze' ni bicy Bed. Orze' na anc:

—Bzuu yeñ shab ru. Orze' cyid car icha —nay.

⁹ Orze' za ca Bed ich yu. Orze' bruuy nañ yu' gyiib. Par wangad lagy yu ti coz nu ricy anc ze' nde' coz rishli. Psa' lagy yu nu Ñgyoozh ricy num yu mod ni pcaal. ¹⁰ Orze' bded dey lugaar loga la nu rña soldad. Niga bdeda' dey lugaar cyup. Niga byap dey tub ro' nu byaa nu gyiib. Ro' ze' benu shaal nañ, orze' gac ruun nañ yu' gyiib chu'n lat cay. Orze' ro' ze' byaal ub lañ. Orze' bruu dey nañ yu' gyiib ze'. Bza dey lat tub cay. Orze' derepent la bzeñ anc yu ub zi lay.

¹¹ Orze' gud lagy yu la coz guc. Orze' mnii tooy:

—Na gaal gud lagya nu rishli Ñgyoozh bzuu nez mi tub anc nu blooy ya yaa Herodes, nunu bloo chuy ya lo dela coz nu ricy pee de mbecy Israeel gyicy nuy ya —nay.

¹² Na ornu gud lagy yu nde', orze' zay par yu' Li, ñaa Waa, laab yu ze' yu nu la Marc. Zigy mbecy byatublaazh dey ze' nu rnii nu dey Ñgyoozh. ¹³ Orze' psiigy yu lo yaro' ni loli'. Orze' tub fiñ feñ nu la Rode bruuñ za güiñ ben cyu nde'. ¹⁴ Tees ornu güeñ ñi nu zaab ti' Bed, orze' byu' loñ nu laab yu. Orze' par nu tanta' la bet lagy ñi wanshaala'ñ ro' ze' sinu carer la gush ñi zañ par lat de mbecy. Mniñ nu zu Bed ich yu'. ¹⁵ Orze' na dey:

—¡Ru tub mbecy ton! —na dey.

Tees bzu fert ñi nu laab rishli rniiñ. Orze' na' dey:

—Par walab yu nde', sinu yu ze' tub anc nu nac nuy —na dey.

¹⁶ Lat nu za fiñ mña ze', orze' fert la ca Bed rsiigy yu lo yaro' ni loli' ze'. Orze' or guchi pshaal dey ro'. Na ornu bzaac dey Bed, tona' la za nu ic dey. ¹⁷ Orze' bicy Bed yaay par nu checa dey nu ricy yu zu redz. Orze' byooy rishlo dey lac bzac yu ornu Ñgyoozh bloom yu nañ yu' gyiib. Orze' nay:

—Niir lo Santiag, gal nu lo de' zir de bicy na de coz nu guc ze' —nay.

Orze' bruuy zay tuuba' lugaar.

¹⁸ Na or bza' yu tuuba' dzi, orze' tona' la pcan shcab ni de soldad. Orze' na dey rab yu losa'y:

—¿La bzac Bed? —na dey.

¹⁹ Orze' Herodes pcaay de mbecy nu yub yu Bed par wangyad yu. Orze' bdugyi'y lo de soldad nu rña ze'. Orze' pcaay mbecy nu cut yu de soldad ze'. Despuees ni de nu nde', Herodes bruuy lo de yu ni Judea zay cyiñ yu Cesarea.

Gut Herodes

²⁰ Orze' Herodes tona' la guzi lagy yu lo de mbecy Tiro nu Sidón. Orze' tublaazh la gua güii dey yu. Nu loga la bicy dey Blasto par amig. Yu ze' zuy riiñ nu riib ic yu nañ yu' ni Herodes. Orze' mnishbaa dey lo Herodes nu cue' chucoo nuy dey, gun de coz nu row dey druun de lugaar nu riib ic yu. ²¹ Orze' Herodes bzuy tub dzi nu nii nuy de mbecy zigy. Dzi ze' bzuy negy nu rzu mbecy nu riib ic. Orze' gusub yu lo yashily, ze' nu riib ic yu. Orze' mniiy riidz lo de mbecy. ²² Orze' de mbecy brish ti dey. Orze' na dey:

—¡Yu nu rnii nu de ub na, yu re walab mbecy, sinu tub ñgyoozh! —na dey.

²³ Orze' tub anc ni Ñgyoozh lueg la pshet yaay Herodes. Bicy yu nu gush güiiy. Ni bicy anc ze', gun wangyicy zily yu Ñgyoozh. Orze' bdow bya'y gut yu.

²⁴ Niga niga güeñ zir mbecy de riidz ni Ñgyoozh, nunu bicy cup zir dey consuel lo Crisht.

²⁵ Orze' blazh riiñ ni Bernabee nu Saulo Jerusaleeng. Gaze' nu bish cya ga' dey zay par Antioquía tuuba' tir. Za nuy Waa. Laab yu ze' yu nu la Marc.

13

Bernabee nu Saulo brugyi' ricy yu riiñ

¹ Lat de mbecy ni Crisht nu yu' Antioquía yu' la be mbecy nu rnii por cuen ni Ñgyoozh, nunu yu' ga' la be mbecy nu rlyuu coz ni Ñgyoozh. Tub yu lay Bernabee. Tuuba'y lay Simoo, laab yu ze' yu nu la Cas. Tuuba'y lay Lucio, yu ze' mbecy Cirene. Tuuba'y lay Manaén, yu nu tublaazh la bguul dey

nu Herodes, yu nu byub ic Galilea. Tuuba'y lay Saulo. De yu ze' zuy riiñ lat de mbecy ni Crisht. ² Orze' tub dzi lat nu rzu bich dey nu nac Shuaan den, nunu lat nu rca dey ni ub yu nu cue' gow yu gyit nu rzu bich dey nu nac Ñgyoozh, orze' na Espiriit Yon ni Ñgyoozh rab mi dey:

—Bloo reñ der Bernabee nu Saulo par nu gyicy dey riiñ nu pcuì nu gyicy yu —nam.

³ Na ornu bded ni nu pca dey ni ub yu nu cue' goy gyit lat nu mnii nu dey Ñgyoozh, orze' briib yaa dey too de yu ze'. Orze' bzuu nez dey yu zay lo riiñ nu briic Espiriit Yon ni Ñgyoozh nu gyicy yu.

Bernabee nu Saulo pshaal yu riidz ni Ñgyoozh Chipre

⁴ Orze' Espiriit Yon ni Ñgyoozh bzuu nez mi dey zay. Bruu dey Antioquía za dey par Seleucia. Ze' gush dey tub barc zay par Chipre, tub nac yu nu ri lo nisyudoo. ⁵ Na ornu bri dey Salamina, tub gyedz nu ri lo yu ni Chipre, orze' pshaal dey riidz ni Ñgyoozh nañ de yu' nu rsya' de mbecy Israeel riidz ni Ñgyoozh. Waa za nuy dey par nu locyuub yu dey.

⁶ Bded dey lo yu nu ri lo nisyudoo ze'. Orze' bri dey tub gyedz nu la Pafos. Ze' bdzeel dey tub tu' nu la Barjesús. Yu ze' mbecy Israeel, nunu rniiy nu nac yu tub mbecy nu rnii por cuen ni Ñgyoozh, tees walab rishli. ⁷ Yu ze' nac nuy Sergio Paulo. Nunu Sergio Paulo, yu ze' riib ic yu yu nu ri lo nisyudoo ze'. Nac yu mbecy nu tona' la yu' shcab ni. Orze' bredz yu Bernabee nu Saulo nu cha dey loy gun rlagy yu gyeñ yu riidz ni Ñgyoozh. ⁸ Ze' tu'

ze' tuuba' nu lay nde' Elimas. Orze' yu ze' guay contr ni dey. Orze' bdu'y lagy yu nu riib ic lo de yu ze', par nu cue' gyicy cup yu consuel lo Crisht. ⁹ Orze' Espiriit Yon ni Ñgyoozh briib ic za' lam nañ lardoo Saulo, laab yu ze' yu nu la Baly. ¹⁰ Orze' Baly mbi la bgüiiy lo tu' ze'. Orze' nay:

—¡Mbey rguu, mbey rgubdzaa, ru nar gal nu na nuras! Ru zar contr ni dela coz nu se'ñ, nunu rila wachecar nu rchaar dela riidz rishli ni Ñgyoozh. ¹¹ Orze' na Ñgyoozh shet yaam ru. Na gyaca' lor. Ru wazaca'r yaa ni doo par la be tiem —nay.

Orze' lueg la bet dzeñ urlo Elimas. Orze' brugyi' ryub yu ca na mbey nu gan yu yaay nu lyuuy nez niy. ¹² Orze' yu riib ic ze', ornu bzaac yu de coz nu guc, orze' bicy cup yu consuel lo Crisht. Tona' la za nu ic yu nu nac de riidz ni Shuaan den.

Bernabee nu Baly shaal yu de riidz ni Crisht Antioquía ni Pisidia

¹³ Baly nu de losa'y bruuy Pafos, gu' dey nañ tub barc zay. Za dey par Perge, tub gyedz nu ri lo de yu nu la Panfilia. Tees ze' bruu Waa lat dey. Bish cyay yay par Jerusaleeng. ¹⁴ Orze' bruu Baly nu de losa'y Perge. Zay par Antioquía, tub gyedz nu ri lo tub nac yu nu la Pisidia. Orze' sab, dzi nu rzu lagy mbey Israeel, gua dey nañ yu' nu rsya' de mbey Israeel riidz ni Ñgyoozh. Orze' gusub dey. ¹⁵ Na ornu blazh nu blab mbey tub nac riidz nu ta' lo leey ni Ñgyoozh nu bzeñ Moisees, gal nu tub nac riidz nu bzeñ de yu nu mnii por cuen nim, orze' yu nu riib ic nañ yu' ze' bzeed yu rasoo lo Baly, gal nu lo de losa'y. Orze' nay:

—Bicy na, benu ricy cup ru tub consef, orze' gac niir lo de mbecy na la —nay.

¹⁶ Orze' Baly wes suy. Bicy yaay par nu ri gua dey nu cue' gyicy yu zu redz. Orze' brugyi' rniiy. Orze' nay:

—Bzuub gyidag de ru mbecy Israeel nu de ru mbecy nu rca lagy lo Ñgyoozh. ¹⁷ Ñgyoozh ni de mbecy Israeel pcuim de gyitoo bel ni den. Bicy mi nu byañ dey lat nu gabee rcyiiñ dey gal nu rcyiiñ mbecy yad lugaar nu la Egipto. Tona' la fert bicy num dey ornu bloom dey Egipto. ¹⁸ Orze' nañ cyuu ña'n gugyeem lo dey lat nu shiñ bicy dey tub lugaar ub zi. ¹⁹ Orze' mnit lom gagy nac mbecy nu pcyiñ lo de yu nu la Canaán, nunu briic mi lugaar ze' nu gani de mbecy nim. ²⁰ Orze' nañ tap gaynal nu ña'n, briic mi mbecy nu gyub ic dey por cuen nim. De yu ze' byub ic yu gashtal pshuub la tiem ni Samueel, yu nu mnii por cuen nim. ²¹ Orze' bdiiñ dey lom nu cuic mi tub mbecy nu gac rey ni dey. Orze' Ñgyoozh briic mi Sauul, i'ñ yu nu la Cis, nez Benjamiing, par nu gac rey ni dey nañ cyuu ña'n. ²² Orze' despuees bloom Sauul nunu bicy mi nu byac Dabi rey ni dey. Ñgyoozh bzat mi Dabi ornu nam: “Ya bzaaca nu mod nu na Dabi i'ñ Isaí nañ lardooy, nde' mod nu tona' la yet lagya. Yu ze' gyicy yu dela coz nu rlagya”, nam. ²³ Ñgyoozh bicy mi nu Jesuuz, biñ nu bruu lat famil ni Dabi, byac mi biñ nu co mbañ de mbecy Israeel. Gulas mnii Ñgyoozh nu segur la ni gyicy mi. ²⁴ Anzir nu cyid Jesuuz, Waa pshaal yu de coz ni Ñgyoozh lo de mbecy Israeel. Mniiy nu ne' dey dela coz cyi nu ricy yu, nunu zu nis dey. ²⁵ Ornu sñuu ga lazh

de riiñ nu briic Ñgyoozh nu gyicy Waa, orze' nay rab yu de mbecy: “Yā a' naca biñ nu rnii too de ru nu naca, tees ornu lazh de coz nu ricya, orze' cyid tuuba' mbecy. Ni gyid lab mi wangyapa loo”, nay.

²⁶ Der bicy na nu nac nez Abraham, nunu de ru mbecy nu rca lagy lo Ñgyoozh nu yu' lat ii, par de ub na bzeed Ñgyoozh riidz nu lac mod co mbañ mi den. ²⁷ Tees de yu nu yu' Jerusaleeng nu de yu nu riib ic dey wangad lagy dey cyu nac Jesuuz. Ni' zi'l wangyet lag dey cuen de riidz nu bzeed de mbecy nu mnii por cuen ni Ñgyoozh, de riidz nu rlab dey de sab la, dzi nu rzu lagy mbecy Israeel, nañ yu' nu rsysa' de mbecy Israeel riidz ni Ñgyoozh. Nde' nu mnii dey nu gat mi par nu byu' niñ gal nu pcaa de yu nu mnii por cuen ni Ñgyoozh ornu mnii dey nu rlagy ñi gat mi. ²⁸ Mas wangyap dey ni tub la falt nim nu gyicy ñi nu gat mi, tees mnishbaa dey lo Pilato nu gyicy yu mandaar lo de mbecy nu cut dey mi. ²⁹ Orze' bicy nu dey mi dela coz nu bi cañ nu gyicy nu dey mi, gal nu rniiñ lat de riidz ni Ñgyoozh. Gaze' nu pshet dey mi lo cruuz. Orze' pcach dey mi nañ tub blyuu. ³⁰ Tees Ñgyoozh bicy mi nu byabañ mi. ³¹ Orze' zañ dzi bruu zac mi lo de yu nu gusa num ornu bruum Galilea guam par Jerusaleeng. Na de yu ze' mnii dey lo de mbecy Israeel nu bzaac dey nu byabañ mi.

³² Orze' de ya yap nee de lo de ru tub riidz nu tona' la cyit na. Riidz ze', nde' coz nu mnii Ñgyoozh lo de gyitoo bel ni den nu segur la gyicy mi. ³³ Coz ze' bicy mi nu byu' niñ par de ub na, gun laab nez den de gyitoo bel ze'. Ni bicy mi ornu bicy mi

nu byabañ Jesuuz. Ni rniiñ lo salmo cyup ornu
 Ñgyoozh nam: “Ru nac ru l'ña. Dzi na ya gyicya
 nu cui mbañ ru”, nam. ³⁴ Ni' zi'l mnii Ñgyoozh lat
 de riidz nim, ornu mniim nu gyicy mi nu gyabañ
 Jesuuz, nunu wazaan mi nu gadz cuerp nim. Orze'
 nam rab mi biñ nu pcuim: “Ya tona' la nap gyicy
 dū ru gal nu mnee lo Dabi nu segur la gyicya”,
 nam. ³⁵ Ze' tuuba' lugaar mnii yu nu mnii por
 cuen nim rab yum: “Ru wazaan ru nu gadz cuerp
 ni biñ Yon nir”, nay. ³⁶ Tees tiem nu pcyiiñ Dabi
 gyishlombecy, bicy yu de coz nu rlagy Ñgyoozh nu
 gyicy yu. Gaze' nu gut yu. Pcach dey yu lat de baa
 ni gyitoo bel ni den. Orze' byayu cuerp niy. ³⁷ Tees
 biñ nu bicy Ñgyoozh nu byabañ, mi ze' wangadz
 cuerp nim. ³⁸ Orze' na der bicy na, ya rnee lo der
 coz nu rlagy ñi nu gad lagy der nu Ñgyoozh gyicy
 sulagy mi ni mbecy nu nac Jesuuz. ³⁹ Nunu rlagy ñi
 gad lagy der nu dela mbecy nu gyicy cup consuel
 lo Crisht gla dey ni dela cyi. Ze' leey nu bzeen
 Moisees wancyiiñ ñi nu gyicy ñi nu la de mbecy ni
 de cyi nu ricy yu. ⁴⁰ Orze' bicy cuidad der nis zac
 ru coz nu mnii de yu nu mnii por cuen ni Ñgyoozh
 gulas, ⁴¹ ornu pcaa dey gal nu Ñgyoozh mniim:
 De ru mbecy rgubdzaa, güii der.
 Gua nu ic der, nunu gat der,
 gun coz nu gyicya tiem nu cyiiñ ru gyishlombecy
 ii,
 nde' tub coz nu rila wayeña lagy ru.
 Mas shaal mbecy coz ze' lo der, tees wayeña lagy
 ru,
 nam —na Baly rab yu de mbecy nu nguaa nañ yu'
 ze'.

⁴² Na lat nu bruu Baly nu Bernabee nañ yu' nu rsysa' de mbecy Israeel riidz ni Ñgyoozh, orze' de mbecy nu walab mbecy Israeel nese nu gul yu mniyy nu cha ga' dey nañ yu' ze' tuuba' sab, dzi nu zu lagy dey, nunu nii zir dey de coz ze' lat dey.

⁴³ Na ornu blaazh brush las de mbecy, orze' zañ mbecy Israeel, nunu zañ mbecy nu gush leey ni de mbecy Israeel guaca dey ich Baly nu Bernabee. Orze' Baly briic yu consef ni dey, nunu mniyy nu zaab gash la dey de coz nap nu rbic Ñgyoozh niy.

⁴⁴ Orze' tuuba' sab, dzi nu rzu lagy mbecy, tona' la mbecy zigy byatublaazh yu. Sñuu ga zi'l mbecy ricy falt par nu lazh dela mbecy gyedz ze'. Byatublaazh dey par nu zuub gyidag yu de riidz ni Shuaan den. ⁴⁵ Na ornu de mbecy Israeel bzaac dey de mbecy zigy ze', orze' tona' la bicy saap lagy dey ich Baly nu Bernabee. Orze' mnii dey riidz nu za contr ni riidz nu mnii Baly, nunu gugy zi dey yu.

⁴⁶ Orze' Baly nu Bernabee fert zir mnii dey. Orze' na dey:

—Rlagy ñi nu nu loga la shaal de riidz ni Ñgyoozh lo de ru. Tees como de ru rzu chu der de riidz ze', nunu como de ru ricy der ub ru par mbecy nu wangyap nu cui mbañ tub la, orze' de ya zaan de de ru. Na cha de lat de mbecy nu walab mbecy Israeel, ⁴⁷ gun ni bicy Shuaan den mandaar ornu nam:

Ya bicya nu nar gal nu na tub yaa

par nu zac de mbecy nu walab mbecy Israeel.

Ya gyicya nu dela mbecy nu yu' gal nu blaazha' zir ze' nu zet ni gyishlombecy

cui mbañ dey nu nac ru,

nam —na dey.

⁴⁸ Na ornu güeñ de mbecy nu walab mbecy Israeel de riidz ze', orze' tona' la bet lagy dey, nunu bicy zily dey riidz ni Ñgyoozh. Nunu de yu nu bi pcui Ñgyoozh par nu cui mbañ yu tub la, brugyi' ricy cup dey consuel lom. ⁴⁹ Orze' brush las riidz ni Ñgyoozh par dutuub la lugaar gaab ga ni Antioquía ni Pisidia. ⁵⁰ Tees de mbecy Israeel pcha' dey ic de mbecy zub lo gyedz ze', nunu pcha' dey ic de biñ mñaalily nu walab mbecy Israeel, de biñ mñaal nu driib zily Ñgyoozh. Orze' de mbecy ze' brugyi' ricy dey nu rsheed zi dey Baly nu Bernabee. Orze' pcyuu nu dey yu lo de yu ni dey. ⁵¹ Orze' Baly nu Bernabee bdib dey gyid lab yu par tub muesht nu gabe nu wangash de mbecy gyedz ze' dey. Orze' bruu dey lugaar ze', zay tub gyedz nu la Iconio. ⁵² Tees de mbecy Antioquía ni Pisidia nu ricy cup consuel lo Crisht tona' la zu cyit lagy dey, nunu riib ic za' la Espiriit Yon ni Ñgyoozh nañ lardoo dey.

14

Baly nu Bernabee pshaal yu riidz ni Ñgyoozh Iconio

¹ Na Iconio tublaazh la gua Baly nu Bernabee nañ yu' nu rsya' de mbecy Israeel riidz ni Ñgyoozh. Tona' la nap mnii dey. Nde' nu tona' la mbecy zigy bicy cup dey consuel lo Crisht. Yu' mbecy Israeel bicy cup yu consuel lo Crisht, nunu yu' ga' mbecy nu walab mbecy Israeel bicy cup yu consuel lom. ² Tees de mbecy Israeel nu wangyicy cup consuel lo Crisht bicy dey nu pcha' ic mbecy nu walab mbecy Israeel, nunu bicy dey nu bish cya dey ich

de bicy na. ³ Tees Baly nu Bernabee tuñ pcyiñ deya lugaar ze'. Wanchib la deya pshaal yu riidz ni Shuaan den. Mnii deya nu tona' la nap ricy num mbecy, nunu mi ze' bicy mi nu gud lagy de mbecy nu de riidz nu rnii deya, nde' coz nu laab ñi. De mbecy gud lagy deya nu riidz ze' rishli, gun Shuaan den briic mi mod nu gyicy deya nusuriidz gal nu de coz nu ricy nu za nu ic mbecy. ⁴ Orze' dela mbecy gyedz ze' byac cup shcab ni deya. Tub nac yu guc nuy de mbecy Israeel, tub naca'y guc nuy Bernabee nu Baly. ⁵ Orze' de mbecy nu walab mbecy Israeel, nu de mbecy Israeel, nu de yu nu riib ic ni deya, laab de yu ze' mnii too deya nu shiñ gyicy nu deya Baly nu Bernabee. Orze' mnii too deya nu goow gyita'y Baly nu Bernabee gashtal gat la deya. ⁶ Na ornu gud lagy Baly nu Bernabee, orze' bruu chu deya. Zay par lo de yu ni Listra nu Derbe, cyup gyedz nu ri lo de yu nu la Licaonia. ⁷ Ze' pshaal deya de riidz nu sac ni Jesuuz.

Baly nu Bernabee pshaal yu riidz ni Ñgyoozh Listra

⁸ Listra zu tub mbecy coj. Yu ze' zub zi'l yu, gun gaal zi'l nu gul yu rila wagac zay. ⁹ Ze' güeñ yu riidz nu rnii Baly. Orze' Baly gud lagy yu nu ricy cup yu ze' consuel lo Crisht, nunu nde' nu gac gyac yu. Orze' Baly mbi la bgüiiy loy. ¹⁰ Orze' ye la brish tiy. Orze' nay:

—¡Wes su nunu li bzu! —nay.

Orze' rzab lay wes suy. Nunu brugyi' lay rzay.

¹¹ Na ornu de mbecy zigy bzaac deya nu ni bicy Baly, orze' brugyi' nu rbish ti deya. Orze' na deya nu riidz yu, riidz Licaonia:

—¡De ñgyoozh gush dem mod nu na mbecy, nunu bet dem gashtal lo la den ii! —na dey.

¹² Mnii dey nu Bernabee nac yu tub ñgyoozh nu la Júpiter. Ze' Baly mnii dey nu nac yu tub ñgyoozh nu la Mercurio, gun yu ze' yu nu rnii. ¹³ Orze' de uz nu zu riiñ nañ yu' ni ñgyoozh Júpiter, yu' nu zub ru' gyedz, orze' uz ze' gua nuy la be tor nu gyee. Yu ze' nu de mbecy ngulagy dey ñgyuut yu chigud ze' nu cuic dey tub gun lo Baly, gal nu lo Bernabee.

¹⁴ Na ornu Baly nu Bernabee güeñ dey de coz nu rlagy de yu ze' nu gyicy yu, orze' pshaa la dey shab yu, nunu gush dey carer gu'y lat de mbecy zigy ze'. Orze' brish ti dey.

¹⁵ Orze' nay:

—Der mbecy, ¿lagu ni ricy der? De ya nac de mbecy gal nu na' zi'l de ru. Nunu de ya yap de ii par nu rica nu gad lagy der nu laa yaa der de coz nu rila wacyiiñ ii, nunu “O” nii der ni Ñgyoozh mbañ, biñ nu psa' lagy gyibaa, nu gyishlombecy, nu nisyudoo, nu dela coz nu yu' de lugaar ze'.

¹⁶ Gulas Ñgyoozh bzaan mi nu gyicy mbecy la zi'l coz nu rlagy ub yu gyicy yu. ¹⁷ Tees dub laa tiem rlyuum cyu nac mi ornu ricy mi coz nap. Ricy mi nu yet gyey, nunu rbic mi cosech. Rbic mi coz nu gow der, nunu ricy mi nu zu cyit lagy der —na dey.

¹⁸ Mas nu de riidz ze', tees tona' la biigy par nu cay ni dey nu cue' cut dey de tor ze' par tub gun nu cha lo dey.

¹⁹ Orze' la be mbecy Israeel bruu dey Antioquía ni Pisidia, nunu bruu ga' dey Iconio. Orze' za dey par Listra. Ze' bdu' dey lagy de mbecy zigy nu cha dey contr ni Baly. Orze' de mbecy pshet dey

gyita' Baly nu ñgyut dey yu. Orze' bgayu tuñ la dey yu par ru' gyedz, gun psa' lagy dey nu gut yu. ²⁰ Tees ornu de mbecy nu ricy cup consuello Crisht byatublaazh dey lo Baly, orze' weshtey. Orze' gu' ga'y lat gyedz tuuba' tir. Na tuuba' dzi Baly nu Bernabee bruu dey Listra za dey par Derbe.

²¹ Orze' Baly nu Bernabee pshaal dey riidz nu sac ni Crisht Derbe, nunu pshet gras dey lardoo zañ mbecy par nu gyicy cup dey consuel lo Crisht. Orze' bish cya dey. Bruu dey Derbe za'y par Listra. Orze' bruu dey Listra. Zay par Iconio. Orze' bruu dey Iconio. Za dey par Antioquía ni Pisidia. ²² Nez nu za dey, gua zaab lo dey de mbecy ni Crisht nu yu' de lugaar ze'. Bicy dey nu byafert dey nu nac de coz ni Crisht, nunu mnii dey nu gyicy paa dey nu de riidz nim nu bi güeñ dey. Blyuu dey ni dey. Orze' na dey:

—Zañ coz deet rlagy ñi nu zac na par nu chu'n lo gyl gubier ni Ñgyoozh —na dey.

²³ Baly nu Bernabee bloo su dey yu bel ni tub nac ga de mbecy ni Crisht. Orze' mnii nu dey Ñgyoozh, nunu pca dey ni ub yu nu cue' goy gyit. Orze' bzeñ dey de yu bel ze' yaa Ñgyoozh, biñ nu ricy cup dey consuel lo, par nu güim dey.

Baly nu Bernabee cush cya dey par Antioquía ni Siria

²⁴ Na ornu bded dey lo de yu ni Pisidia, orze' bru'ña dey lo yu ni Panfilia. ²⁵ Orze' za dey tub gyedz nu la Perge. Ze' pshaal dey de riidz ni Crisht. Orze' bruu dey Perge, za dey par Atalia. ²⁶ Ze' gush dey tub barc. Orze' za dey par Antioquía, ze' nu bgu' mbecy dey yaa Ñgyoozh par nu locyuub mi

dey nunu par nu güim dey lat nu gyicy yu riiñ nim, riiñ ze' nu bi bza' lo dey na.

²⁷ Na ornu bru'ña dey Antioquía, orze' bicy tublaazh dey de mbecy ni Crisht. Orze' pshaal dey lo de mbecy ze' dela coz nu bicy nu Ñgyoozh dey. Pshaal dey nu lac mod bicy Ñgyoozh par nu byaal nez nu cha dey lo de mbecy nu walab mbecy Israeel, gun orze' de yu ze' gac gyicy cup dey consuel lo Crisht. ²⁸ Orze' tuñ tiem byeeñ dey lugaar ze' nu de mbecy ni Crisht.

15

De mbecy ni Crisht yu' tublaazh dey Jerusaleeng

¹ Orze' la be mbecy bruu dey lo de yu ni Judea guay Antioquía. Orze' blyuu dey ni de bicy na. Orze' na dey:

—Wac ruu mbañ den benu waca beey sircun-sision cuerp ni den gal nu rniiñ lo leey nu bzeen Moisees —na dey.

² Orze' Baly nu Bernabee fert la mnii dey nu walab ni. Orze' zi ga la bee nu dey yu riidz. Orze' de mbecy mnii too dey nu Baly nu Bernabee nu la be mbecy nu yu' Antioquía, de yu ze' rlagy ñi cha dey par Jerusaleeng par nu cha güii dey de aposht nu de yu bel, gun orze' cugyi' dey nu nac de coz ze'.

³ Orze' de mbecy ni Crisht ze' bzuu nez yu dey zay. Lat nu za dey lo yu ni Fenicia gal nu lo yu ni Samaria, orze' bdzeel dey de mbecy ni Crisht. Orze' byoo dey rishlo dey lac mod guc. Orze' mnii dey nu de mbecy nu walab mbecy Israeel byac dey mbecy ni Ñgyoozh. Ornu güeñ de mbecy nu yu' lugaar ze' nde', orze' tona' la bet lagy dey.

⁴ Na ornu bri dey Jerusaleeng, orze' de mbecy ni Crisht, nu de aposht, nu de yu bel, de yu ze' gua nii nu dey yu ñgyoozh. Orze' Baly nu Bernabee byoo dey rishlo dey nu lac mod bicy nu Ñgyoozh dey. ⁵ Orze' la be mbecy nu ricy cup consuel lo Crisht, yu nu gunash leey ni de mbecy fariseo, orze' wes su dey. Orze' na dey:

—Rlagy ñi caan de mbecy ni Crisht nu walab mbecy Israeel nu caa dey beey sircunsision cuerp ni dey, nunu rlagy ñi caan dey nu gyicy yac yu nu leey nu bzeen Moisees —na dey.

⁶ Orze' de aposht nu de yu bel byatublaazh dey par nu go dey riidz nu nac de coz ze'. ⁷ Na ornu blazh bee dey riidz, orze' wes su Bed. Orze' nay:

—Der bicy na, de ru rad lagy der nu tona' la gulas pcui Ñgyoozh ya lat de ru par nu shaala de riidz ni Crisht lo de mbecy nu walab mbecy Israeel, gun orze' gyeñ dey, nunu gyicy cup dey consuel lom. ⁸ Ñgyoozh, biñ nu rad lagy la na lardoo mbecy, bicy mi nu rad lagy den nu cyiiñ de mbecy nu walab mbecy Israeel nu gac dey mbecy ni Crisht. Ni bicy mi ornu briic mi Espiriit Yon nim ni dey gal nu bicy nu'm de ub na. ⁹ Mod nu bicy num de ub na laab ni' zi'l mod bicy num dey. Bicy sulagy mi de cyi nu bicy dey, gun ricy cup dey consuel lo Crisht. ¹⁰ Orze' na ¿lagu rlagy der gyicy ru preb Ñgyoozh ornu ricy der nu deet rzac de mbecy nu ricy cup consuel lo Crisht? Coz nu rnii der nu gyicy dey, nde' coz nu wagyee den, gal nu de gyitoo bel ni den wangagyee dey. ¹¹ Ze' de ub na rzeña lagy den nu gruu mbañ na nu nac faboor

nu ricy nu Shuaan den Jesuuz. Ni' zi'l de yu ze' —na Bed.

¹² Dela mbecy gucua ri dey ornu güeñ dey nu rnii Baly nu Bernabee, ornu bzeed cuen dey lo dey dela coz ily nu bicy Ñgyoozh, nunu dela nusuriidz nu bicy mi lat de mbecy nu walab mbecy Israeel lat de riiñ nu bicy dey. ¹³ Na or blazh nu mnii Baly nu Bernabee, orze' na Santiag rab yu de mbecy:

—Bzuub gyidag der, bicy na. ¹⁴ Simo Bed bi byoo ga'y rishlon mod nu bicy Ñgyoozh num de mbecy nu walab mbecy Israeel ornu nap bicy num dey tir loga la. Bloo sum tub nac mbecy nu gac nim lat dey. ¹⁵ Ni' zi'l yaruu riidz nu pcaa de yu nu mnii por cuen ni Ñgyoozh.

¹⁶ Orze' na Ñgyoozh: Or lazh nde', orze' ya cush cyā locyuuba de nez Dabi, gun mnu nez Dabi, tees ya zu napa ñii.

¹⁷ Gun orze' dela de' zir mbecy yub dey Shuaan yu. De lo la mbecy nu ya pcui nu gac ne yub dey ya.

¹⁸ Ni na Ñgyoozh, biñ nu bi gulas briic nu gad lagy de mbecy de nde', rniñ.

¹⁹ Ni' ya rsa' lagya nu walagy ñi nu gyicy deet den nu de mbecy nu walab mbecy Israeel, de yu nu yac mbecy ni Ñgyoozh. ²⁰ Tees rlagy ñi caan tub gyicy zeed na lo dey. Rlagy ñi niin lo dey nu cue' gow dey de coz nu a' yad ñi nu gow yu. Cue' gow dey de gun nu briic mbecy lo nab. Rlagy ñi niin nu cue' gal dey de mbecy nu wanchelaay, nunu cue' gow dey bañcyug nu psii mbecy yeñ, nunu cue' gow dey reñ. ²¹ Gun nese gulas nu gashtal dzi

na rlab mbecy leey nu bzeen Moisees nañ de yu' nu rsysa' de losa'n riidz ni Ñgyoozh. De sab la, dzi nu rzu lagy mbecy, rlab dey riidz nim, nunu dela gyedz rshaal mbecy riidz ze' nim —nay.

Gyicy nu bzeed de aposht lo de mbecy nu walab mbecy Israeel

²² Orze' de aposht, nu de yu bel byatublaazh dey, nu dela mbecy ni Crisht. Orze' mnii too dey nu co su dey la be mbecy lat dey, par nu cha nu dey Baly nu Bernabee par Antioquía. Orze' bloo su dey Judas, laab yu ze' yu nu la Barsabás, nunu ni' zi'l bloo su ga' dey Silas. De yu ze' mbecy nu rca lagy de bicy na lo. ²³ Orze' briic dey tub gyicy za nu dey. Gyicy ze' rniin:

“De ya, nu de aposht, nu de yu bel, nu de bicy na, zeed de ñgyoozh ni de ru bicy na nu walab nez de mbecy Israeel. Zeed de ñgyoozh ni de ru mbecy nu yu' Antioquía, nunu ni' zi'l ni de ru mbecy nu yu' lo yu ni Siria, nunu ni' zi'l ni de ru mbecy nu yu' lo de yu ni Cilicia. ²⁴ Bi güen de nu la be mbecy nu bruu lat de bru'ña dey lat der nu bicy dey nu rac deet nañ shcab ni der nu nac de coz nu rnii dey. Tees de ya wannee de lo dey nu ni gyicy yu. ²⁵ Nde' nu na byatublaazh de, nunu bicy de tub zi'l shcab nu pcui de la be mbecy nu cyid tooy rishlo der. Orze' bzuu nez de yu cyid yu lo der. Yad nu dey Bernabee nu Baly, de yu nu dzi rca den. ²⁶ De yu ze' mas rlagy mbecy cut yu dey, tees ricy paa dey nu coz nu rlagy Shuaan den Jesucrisht. ²⁷ Orze' gzuu nez de Judas, nu Silas nu cyid yu lo der, gun orze' nii dey lo der par nu gyeñ gyidag la der dela coz nu caa de lo gyicy ii. ²⁸ Gun Espiriit Yon ni

Ñgyoozh nu de ya rzee nu walagy ñi caa de reña' coz nu gyicy der, sinu de coz nu rlagy ñi gyicy der, de coz nu zat de lo gyicy ii. ²⁹ Cue' gow der coz nu rbic mbecy lo nab. Cue' gow der reñ, nunu cue' gow der bañcyug nu gut nu psii mbecy yeñ. Cue' gal der de mbecy nu wanchelaar. Tona' la nap gyicy der benu cue' la gyicy der de coz ze'. Bi nii ga'n." Ni cañ lo gyicy ze'.

³⁰ Orze' bzuu nez dey de mbecy ze' za dey par Antioquía. Na ornu bri dey Antioquía, orze' byatublaazh dela mbecy nu ricy cup consuel lo Crisht. Orze' briic dey gyicy ze' nu sya' dey. ³¹ Na ornu psya' de mbecy gyicy ze', orze' riidz nu ta' loñ bicy ñi nu tona' la bet lagy dey. ³² Judas nu Silas, como nac dey mbecy nu rnii por cuen ni Ñgyoozh, chi ñuu mniiy lo de bicy na. Briic yu baloor ni dey, nunu bicy fert yu dey nu nac de coz ni Crisht. ³³ Na ornu bi rac la be tiem nu rcyiiiñ dey lugaar ze', orze' de bicy na mnii nu dey yu ñgyoozh. Orze' bruu dey yay lo de mbecy nu bzuu nez yu. ³⁴ Tees Silas mnii tooy nu gyiyeeñ gay. ³⁵ Ni' Baly nu Bernabee byeeñ dey Antioquía. Bicy dey riiñ tublaazh nu ziggy de' zir mbecy. Blyuu dey ni de mbecy, nunu pshaal dey riidz ni Shuaan den lo de mbecy.

Baly bla' losa'y nu Bernabee

³⁶ Despuees, or gules, orze' na Baly rab yu Bernabee:

—Yaa chan cha güiin de bicy na nu yu' dela gyedz ze' nu pshaal na de riidz ni Shuaan na. Cha güiin la ricy dey —nay.

³⁷ Tees Bernabee rlagy yu cha nuy Waa. Laab yu ze' yu nu la Marc. ³⁸ Ze' Baly psa' lagy yu nu a' nap nu cha nu Waa dey, gun bzeen gay riiñ nu bicy dey ornu pcyiiñ dey Panfilia, nunu wangyicya'y riiñ nuy dey. ³⁹ Orze' bee zi dey riidz nu losa'y. Orze' bicy zet lagy dey lo losa'y. Orze' Bernabee za nuy Marc. Orze' gush dey tub barc nu za par Chipre. ⁴⁰ Ze' Baly bloo suy Silas par nu gac losa'y. Orze' de mbecy bzeen dey Baly yaa Ñgyoozh par nu locyuub mi yu, nunu güim yu. Orze' bruuy Antioquía zay. ⁴¹ Orze' bded yu lo yu ni Siria, nunu bdeda'y lo yu ni Cilicia. Lat nu gua zaab loy de mbecy ni Crisht, orze' bicy fert yu dey nu nac coz nim.

16

Timoteo rded nuy Baly nu Silas

¹ Orze' Baly zay par Derbe nu Listra. Ze' bdzeel yu tub mbecy nu ricy cup consuel lo Crisht nu la Timoteo. Yu ze' i'ñ tub biñ mña Israel. Ze' uz yu nac yu mbecy griego. Ñaay laab mbecy ni Crisht. ² Orze' dela bicy na nu yu' Listra, nunu dela bicy na nu yu' Iconio nap mnii dey niy. ³ Baly rlagy yu cha nuy Timoteo, nde' nu pcaay beey sircunsision cuerp niy. Ni bicy Baly, gun dela mbecy Israel nu yu' de lugaar ze' gud lagy yu nu uz Timoteo nac yu tub mbecy griego. ⁴ Orze' lat nu gusa dey dela gyedz, blyuu dey ni de mbecy gal nu mnii de aposht nu de yu bel nu yu' Jerusaleeng ornu byatublaazh dey. ⁵ Orze' dela mbecy ni Crisht fert zir guc nu dey de coz nim, nunu tub dzi ga ryañ zir dey.

Bde' tub mbecy Macedonia lo Baly

⁶ Espiriit Yon ni Ñgyoozh wansaan mi nu shaal dey riidz ni Crisht lo de mbecy Asia, nde' nu bded dey dub tuuñ la ze' nu ñgyiid ru' yu ni Frigia nu Galacia. ⁷ Na ornu bri dey ru' bzaa ni Misia, orze' bicy pee dey ñgyay lo de yu nu la Bitinia. Tees Espiriit ni Jesuuz wansaan mi nu ñgya dey lugaar ze'. ⁸ Orze' bded nez zi'l dey lo yu ni Misia. Gaze' nu za dey par Troas. ⁹ Na ornu bri dey Troas, orze' rel bde' lo Baly. Bzaac yu tub mbecy Macedonia mod ni pcaal. Orze' mnishbaay lo Baly. Orze' nay: “Cyid ru par Macedonia nu locyuub ru de ya”, nay.

¹⁰ Orze' cuanzir bzaac Baly nde', orze' bzu lily de nu cha de par Macedonia, gun mnii too de nu Ñgyoozh bredz mi de ya par nu shaal de de riidz nap ni Crisht lo de mbecy nu yu' ze'.

Baly nu Silas zay Filipos

¹¹ Orze' Troas brush de tub barc. Za de par lo tub nac yu nu ri lo nisyudoo nu la Samotracia. Orze' bruu de ze'. Orze' tuba' dzi bri de tub gyedz nu la Neápolis. ¹² Orze' bruu de ze'. Za de gyedz nu la Filipos. Filipos, nde' tub gyedz nu bzaa de mbecy Rom, nunu nde' gyedz nu ricy ñi presis ni de lugaar ni Macedonia ze'. Orze' ze' byeeñ de la be dzi. ¹³ Orze' sab, dzi nu rzu lagy mbecy Israeel, orze' bruu de par ru' gyedz. Za de par ru' gyooow, ze' nu psa' lagy de nu gyatublaazh mbecy nu nii nu dey Ñgyoozh. Orze' gucuu de ze' rdo de de riidz nu sac ni Crisht nu de biñ mñaan nu byatublaazh ze'. ¹⁴ Ze' tub biñ mñaan nu güeñ riidz nu rdo de, mi ze' lam Lidia. Mi ze' mbecy Tiatira nunu ricy mi daljez nu rut mi negy bizat. Nac mi tub mbecy nu rca Ñgyoozh, nunu Shuaan den pshaal mi shcab

nim par nu gyet lag mi cuen de riidz nu mnii Baly.
¹⁵ Orze' briib nis dey mi, nunu briib nis dey dela famil nim. Orze' mnishbaam lo de. Orze' nam:

—Yaa gyan cyiĩn der yu' benu rash der shcab nu ya rishli ricy cupa consuel lo Shuaan na —nam.

Orze' pcuugy mi lardoo de nu gya de yu'm.

¹⁶ Orze' tub dzi ornu za de ze' nu ryatublaazh mbecy par nu rnii nu dey Ńgyoozh, orze' bdzeel de tub fiĩ feĩ nu nac moz por fers la ni mbecy. Tub nuras bicy niy fiĩ ze', nunu rboon cuen par nu nac nuras ze'. Tona' la sheĩ tiĩ rad ni patroo ñiĩ nu nac nu rboon cuen. ¹⁷ Tees biid caĩ ich de nu Baly, orze' brugi' ye la rbish tiĩ. Orze' naĩ:

—¡De mbecy re ricy mi coz nu rnii Ńgyoozh biĩ nu zily zir nac! ¡Rbic mi nu gad lagy der lac mod ruu mbaĩ ru! —naaĩ.

¹⁸ Zaĩ dzi ni bicy ñi gashtal ornu bdza' Baly niĩ. Orze' bish cyay bgüiĩ loĩ. Orze' nay rab yu nuras ze':

—Par nu nac rishbeey ni Jesucrisht, ya rnee lor nu ruu chur lo fiĩ ii —nay.

Orze' lueg la bruu nuras ze'.

¹⁹ Na ornu de patroo ni fiĩ feĩ ze' gud lagy dey nu wada' mod nu gyicy dey gan tiĩ nu nac ñii, orze' bdu' yaa dey Baly nu Silas. Gua nu dey yu lo de fushtiz loli' ze' nu rgua de yu zu riĩ. ²⁰ Na ornu bru'ña dey lo de fushtiz, orze' na dey:

—De mbecy ii nac dey mbecy Israeel, nunu ricy dey coz deet ledz na. ²¹ Rlyuu dey nu gyicy na coz nu cha contr ni leey. Como de ub na nac na mbecy Rom, nde' nu wac nii den nu nap de coz nu rnii dey. Ni wac gyicy den gal nu rlagy dey —na dey.

²² Orze' ni' de mbecy zigy bish cya dey ich dey. Orze' de fushtiz por fers la bloo dey shab dey. Orze' pcaa dey mbecy nu gaaz dey yu nu laspeed. ²³ Na despuees ornu dzi bi bgaaz dey yu, orze' mne' dey yu nañ yu' gyiib. Orze' pcaa dey de yu nu riib ic yu' gyiib ze' nu nap gyicy segur yu dey. ²⁴ Na ornu bi gu' riiñ ze' yaa yu nu riib ic ze', orze' mne'y de yu ze' gal ze' nu gyi zir ni nañ yu' gyiib ze'. Orze' briy gyi' de yu ze' nañ gyeegy nu zub gazel cyup ya gyibag. Gaze' nu bicy nicy dey ñi.

²⁵ Orze' tub guzeel rel, Baly nu Silas rnii nu dey Ñgyoozh, nunu rul dey lom. Nunu reñ dela de pres. ²⁶ Orze' derepent la briib tub duru ily. Orze' pcueñ yu' gyiib gashtal ze' nu zu laa simient niñ. Orze' lueg la byaal dela ro', nunu bet lag dela caden nu pcacuuñ dey de pres. ²⁷ Orze' yu nu riib ic yu' gyiib ze' brish yu yaa. Na ornu bzaac yu nu naal dela ro' ni yu' gyiib, orze' psa' lagy yu nu briib dze dela pres. Orze' blooy mandzicy niy nañ gyid yu'ñ, nunu bicy peey nu ñgyuut yu ub yu. ²⁸ Orze' brish ti Baly. Gaze' nu nay:

—¡Cue' shiñ gyicy nur ub ru gun ii yu' dela de!
—nay.

²⁹ Orze' yu nu riib ic ze' bredz yu mbecy nu cha nuy gyi. Orze' carer la gu'y nañ yu' ze'. Nunu rash la bis yu nu tanta' gudzib yu. Orze' wes saa lay yeñ gyi' Baly nu Silas. ³⁰ Orze' blooy de yu ze' lugaar ze'. Gaze' nu nay rab yu dey:

—¿La ñuu coz rlagy ñi nu gyicya par nu ruu mbaña? —nay.

³¹ Orze' na Baly nu Silas:

—Bicy cup consuel lo Shuaan den, Jesucrisht. Orze' ruu mbañ ru nu dela famil nir —na dey.

³² Orze' pshaal dey riidz ni Shuaan den loy nu lo dela mbecy nu rcyiñ loy. ³³ Na laab or ze' yu nu riib ic ze' za nuy dey nu bdiib yu ze' nu guud güii ni dey. Orze' lueg la wi nis yu nu dela famil niy. ³⁴ Orze' ya nuy Baly nu Silas. Gup yu par nañ yu'y nuy dey. Ze' briic yu coz nu gow dey. Orze' mbecy nu riib ic ze' nu dela famil niy tona' la gucyit lagy dey gun bi ricy cup dey consuel lo Crisht.

³⁵ Na tuuba' dzi or napor, orze' de fushtiz bzuu nez dey ayudant ni dey lo yu nu riib ic ze'. Orze' na dey rab yuy:

—Blaa de mbecy ze' —na dey.

³⁶ Orze' yu riib ic ze' gua mniy lo Baly. Orze' nay:

—De fushtiz bzeed dey rasoo nu laa ru nu Silas. Orze' na ruu der. Gac gya der dub gusht la —nay.

³⁷ Orze' na Baly rab yu ayudant ze':

—Pshet dey yag ich de lo rgüii la de mbecy zigy, nunu ii nigul ri bee dey de. Nunu de ya nac de mbecy Rom. Ze' ii mne' dey de ya nañ yu' gyiib. Orze' na rlagy dey coy de ya dze ga. Rila wac. Ub la de fushtiz rlagy ñi nu cyid dey coy de ya —nay.

³⁸ Na de ayudant gua niy lo de fushtiz de riidz nu mnii Baly. Na ornu güeñ de fushtiz nu Baly nu Silas nac dey mbecy Rom, orze' tona' la gudzib dey. ³⁹ Orze' za dey lo Baly nu lo Silas, nunu bdiñ dey rishsulagy lo dey. Orze' gua nu dey de yu ze' par ich yu' gyiib nunu mnishbaa dey loy nu ruu dey gyedz ze'. ⁴⁰ Orze' Baly nu Silas bruuy nañ yu' gyiib zay par yu' Lidia. Ze' bdzeel dey dela bicy na,

nunu briic dey consuel ni de yu ze'. Orze' bruu dey yu' Lidia za dey.

17

Baly nu Silas zay Tesalónica

¹Nez nu za dey bded yu tub gyedz nu la Anfípolis, nunu bded dey tuuba' gyedz nu la Apolonia. Orze' bru'ña dey tub gyedz nu la Tesalónica. Orze' ze' zub tub yu' ze' nu rsya' mbecy Israeel riidz ni Ñgyoozh. ²Orze' Baly zay nañ yu' ze' como nil rzay. Orze' chon sab, dzi nu rzu lagy mbecy Israeel, orze' Baly bee nuy de mbecy riidz. Bzat yu de riidz nu bzeen Ñgyoozh. ³Orze' mniiy tub mod par nu gyet gras lardoo de mbecy ze', nunu pshaal yu lo dey nu Mesías, bin nu ca lo cuen nu co mbañ mbecy, rlagy ñi nu gzac zim, nunu despuees ornu gat mi rlagy ñi nu gyabañ mi, nay. Orze' na ga'y rab yu dey:

—Laab Jesuuz, biñ nu ya rzatā lo der, laab mi ze' nac mi Mesías, biñ nu ca lo cuen nu co mbañ mbecy —nay.

⁴Orze' guña lagy la be mbecy riidz nu rnii Baly, nunu guc nu dey Baly nu Silas. Ni' zi'l guña lagy zigy mbecy griego, de yu nu rca Ñgyoozh, nunu guña lagy zigy biñ mñaaz zub lo.

⁵Na de mbecy Israeel gusaap lagy dey. Orze' bicy tublaazh dey la be mbecy a' nap, gal nu mbecy gur rded. Orze' bicy dey nu pcha' ic dela mbecy gyedz ze'. Orze' por fers la gu' dey nañ yu' Jasón. Byub dey Baly nu Silas nu cha nu dey yu lo de mbecy zigy. ⁶Na ornu wangyad yu, orze' bgayu tuñ la dey Jasón nu de' zir de bicy na. Gua nu dey

yu lo de fushtiz gyedz ze'. Orze' rbish ti dey. Orze' nay:

—¡De yu ii ricy deet dey dutuub la lugaar! ¡Na yada' dey gyedz ii nin! ⁷ ¡Nunu Jasón briic yu yu' nu rcyiiñ dey! ¡De yu ii za dey contr ni leey ni yu nu riib ic de nasyoong, gun rnii dey nu zu tuuba' mbecy nu riib ic, tub yu nu la Jesuuz! —na dey.

⁸ Orze' nu riidz ze' bicy dey nu pcha' ic de mbecy zigy, nunu bicy dey nu pcha' ic de fushtiz nu yu' gyedz ze'. ⁹ Orze' de fushtiz pcaa dey Jasón nu de' zir de mbecy ze' nu zeeñ dey ñuu tiñ par nu cue' grib dze dey gyedz ze'. Gaze' nu blaa dey yu.

Baly nu Silas zay Berea

¹⁰ Na ornu bi becheñ, orze' lueg la de bicy na bzuu nez dey Baly nu Silas zay Berea. Na ornu bru'ña dey Berea, orze' gua dey nañ yu' nu rsysa' mbecy Israeel riidz ni Ñgyoozh. ¹¹ De mbecy Israeel nu yu' Berea napa' zir ricy dey gaze' de mbecy Tesalónica. Orze' tona' la yet lagy dey de riidz nu rnii Baly nu Silas. Nunu tub dzi ga psya' zir dey riidz nu bzeeñ Ñgyoozh ben a rishli de coz nu rnii Baly nu Silas. ¹² Orze' zigy mbecy ze' bicy cup dey consuel lo Crisht gal nu zigy mbecy griego: tant biñ mñaazub lo, nunu tant yu gyeey. ¹³ Tees ornu de mbecy Israeel nu yu' Tesalónica güeñ dey nu ni' zi'l Baly rshaal yu riidz ni Ñgyoozh Berea, orze' za dey ze'. Orze' brugyi' ricy dey nu rcha' ic de mbecy zigy. ¹⁴ Orze' lueg la de bicy na bzuu nez dey Baly zay par ru' nisyudoo. Ze' Silas nu Timoteo rup laa dey byeeñ yu Berea. ¹⁵ De mbecy nu za nu Baly, de yu ze' za nu dey yu gashtal Atenas. Gaze' nu bish cya dey zay par Berea tuuba' tir. Za nu dey rasoo

nu bzeed Baly lo Silas nu Timoteo. Baly mniiy nu cha dey loy lueg lueg la.

Baly nu Silas pcyiñ dey Atenas

¹⁶ Lat nu Baly blez yu Silas nu Timoteo Atenas, tona' la deet guc nañ lardooy ornu bzaac yu nu dzi zañ nab nguaa gyedz ze'. ¹⁷ Nde' nu beey riidz nu de mbecy Israeel nu de' zir mbecy nu driib zily Ñgyoozh nañ yu' ze' nu rsya' dey riidz nu bzeen mi. Nunu de dzi la beey riidz nu cyu zi'l mbecy nu byap yu lat yagyi'. ¹⁸ Orze' la be mbecy nu rsya' leey nu la epicúreos nu la be mbecy nu rsya' ga' leey nu la estoicos brugyi' nu zi ro nu dey Baly riidz. Orze' na dey:

—¿La coz rnii mbecy nu dzi zaab ga ru' re? —na dey.

Orze' tub naca' mbecy nay:

—Rlyu nu rzat yu ñgyoozh nu walab ñgyoozh guledz —na dey.

Ni rnii dey, gun Baly rshaal yu riidz ni Jesuuz, nunu rshaal yu riidz nu lac byabañ mi despuees nu bi gut mi. ¹⁹ Orze' gua nu dey yu tub lugaar nu la Areópago, ze' nu ryatublaazh tub nac mbecy nu zu riiñ. Orze' na dey:

—Rlagy de gad lagya de riidz cub nu rlyuur. ²⁰ Ru rniiir reñ ga la riidz lo de, nde' nu rlagy de gad lagya lac yaruu de riidz ze' —na dey.

²¹ Ni mnii dey gun dela mbecy Atenas nu de' zir mbecy yad nu rcyiñ Atenas walagya' dey gyicy yu reña' coz, sinu se nu niy zi'l dey nunu se nu gyeñ zi'l dey ca na la de riidz cub.

²² Orze' Baly wes suy lat de mbecy nu by-atublaazh Areópago. Orze' nay:

—De ru mbecy Atenas, ya rzaca nu de mod la dzi ca ic der Ñgyoozh. ²³ Gun lat nu rdeda ledz der, bzaaca de lugaar nu driib zily der Ñgyoozh. Byapa tub mez nu driib zily der tub ñgyoozh. Lo mez ze' ca letr. Orze' ze' rniiñ: “Ñgyoozh nu a' yu' lon”, rniiñ. Ñgyoozh nu de ru driib zily ru, mas a' yu' lo der mi, mi ze' biñ nu gzata lo der na.

²⁴ Ñgyoozh, biñ nu psa' lagy gyishlombecy nu dela coz nu yu' gyishlombecy ii, mi ze' waccyiñ mi nañ yu' nu rzaa mbecy. ²⁵ Ni' mbecy wac gyicy dey ni tub la coz nu locyuub dey mi, como ub mi rbic mi gyel mbañ ni dey, nunu rbic mi dela coz nu galagy ñi ni dey.

²⁶ Ñgyoozh psa' lagy mi tub mbecy. Lo nez yu ze' bruu de lo la nez mbecy. Ñgyoozh bicy mi nu yu' dey dutuub la gyishlombecy. Anzir nu sa' lagy mi dey, bi bloo ic mi gul chu' dey gyishlombecy, nunu bi bloo ic mi ca lugaar chu' dey. ²⁷ Ni bicy mi, gun orze' yub dey mi, gun dzi ga gyad mi ni dey lat nu yub dey mi. Rishli Ñgyoozh a' zet la zum lo tub ga de ub na. ²⁸ Gun par nu nac Ñgyoozh, mbañ den, nunu rcueñ den, nunu yu' den gyishlombecy ii. Gal nu mnii tub losa' der ornu pcaay riidz cyit. Orze' nay: “Ni' de ub na nac naa i'ñ mi”, nay. ²⁹ Orze' como nac naa i'ñ Ñgyoozh walagy ñi sa' lagy na nu nam gal nu na tub nab nu ryaa nu or o nu plat o nu gyita', tub nab nu bzaa mbecy nu shcab ni ub zi'l yu. ³⁰ Gulas Ñgyoozh se la la bicy num de mbecy nu wangad lagy de coz ze'. Tees na rcaam dela mbecy nu yu' dutuub la lugaar nu ne' dey dela cyi nu ricy yu. ³¹ Gun Ñgyoozh bi bzum tub dzi nu li ri beem ni

dela mbecy nu yu' gyishlombecy. Ni gyicy mi par nu nac tub biñ nu bi bloo sum. Nunu briic mi nu gad lagy mbecy nu segur la ni gyicy mi ornu bicy mi nu byabañ mi ze' despuees nu gut mi —na Baly.

³² Na ornu güeñ dey nu mnii Baly nu byabañ tub mbecy gut, orze' yu' mbecy nu psuriidz dey yu. Yu' ga' mbecy nu mniy:

—De ya rlagya gyeña ornu zat ru de riidz ze' tuuba' tir —na dey.

³³ Orze' bruu Baly lat dey. Zay. ³⁴ La be mbecy guc nuy Baly, nunu bicy cup dey consuel lo Crisht. Dionisio, yu ze' tub mbecy nu bzu riiñ Areópago bicy cup yu consuel lo Crisht. Nu tuuba' mbecy nu bicy cup consuel lo Crisht, tub biñ mña nu la Dámaris. Nunu zañ zir dey bicy cup yu consuel lo Crisht.

18

Baly zay Corinto

¹ Na despuees ni de nu nde', bruu Baly Atenas, zay tub gyedz nu la Corinto. ² Ze' bdzeel yu tub mbecy Israeel nu la Aquila. Yu ze' tub mbecy Ponto, tees sa bruuy lo de yu ni Italia nu mñaay, tub biñ mña nu la Priscila. Bruuy Italia, gun Clau, yu nu riib ic de nasyoong, pcaay dela mbecy Israeel nu ruu dey tub gyedz ni Italia nu la Rom. Orze' Baly gua güiyy dey. ³ Orze' byeeñ nuy de yu ze', nunu tublaazh la bicy dey riiñ, gun Baly nac yu tub yu nu rzaa yu' negy. Laaba' nde' daljez nu ricy Aquila nu mñaay. ⁴ De sab, dzi nu rzu lagy de mbecy Israeel, rza Baly nañ yu' nu rsya' de mbecy Israeel riidz ni Ñgyoozh, gun rlagy yu cuugy

yu lardoo de mbecy Israeel, nunu tant mbecy nu walab mbecy Israeel.

⁵ Na ornu bruu Silas nu Timoteo Macedonia za dey par Corinto. Orze' Baly wangyicy yu reña' riiñ. Se tub lo zi'l nu rshaal yu riidz ni Crisht. Naal la blyuuy ni de mbecy Israeel nu Jesuuz laab mi ze' Mesías, biñ nu bloo su Ñgyoozh. ⁶ Tees ornu gua dey contr niy, nunu ornu shiñ mnii dey niy, orze' bdib yu shab yu par nu gabe nu wangash dey riidz ze'. Orze' nay:

—Benu de ru dune'r, laab der yu' falt nir. Yā sac falt ne. Na par lo yā chā lat de mbecy nu walab mbecy Israeel —nay.

⁷ Orze' bruuy nañ yu' nu rsya' de mbecy Israeel riidz ni Ñgyoozh ze', zay cyiiñ yu yu' tub mbecy nu la Ticio Justo, tub yu nu rca Ñgyoozh. Yu ze' rcyiiñ yu cuit yu' nu rsya' de mbecy Israeel riidz ni Ñgyoozh. ⁸ Tees Crispo, yu nu riib ic nañ yu' nu rsya' mbecy Israeel riidz ni Ñgyoozh, yu ze' nu dela famil niy bicy cup yu consuel lo Shuaan den. Nunu zigy zir mbecy Corinto güeñ dey riidz ni Crisht, nunu bicy cup dey consuel lom, nunu wi nis dey.

⁹ Na tub rel Shuaan den Jesuuz bruu zac mi lo Baly mod ni pcaal. Orze' nam rab mi yu:

—Cue' dzib ru. Zaab nii lar riidz ne. Cue' checar nu niir lo de mbecy. ¹⁰ Gun yā nac dū ru. Ni tub la mbecy wac shiñ gyicy nuy ru, gun zigy de mbecy gyedz ii nac dey mbecy ne —nam.

¹¹ Orze' byeeñ yu ze' tub ña'n nu. Orze' blyuuy riidz ni Ñgyoozh ni de mbecy.

¹² Ornu Galión bdugyiy riiñ nu riib ic yu por cuen ni gubier ni Acaya, de mbecy Israeel by-atublaazh dey nu cha dey contr ni Baly. Orze' gua nu dey yu ze' nu dri bee Galión ni de mbecy.

¹³ Orze' na dey rab yu Galión:

—Yu ii rcuugy yu lardoo de mbecy nu cay Ñgyoozh tub mod nu za contr ni leey —na dey.

¹⁴ Na ornu Baly bicy peey niyy, orze' na Galión rab yu de mbecy Israeel:

—Benu bicy yu coz nu walab se'ñ, o benu bicy yu tub cyi ily nu tona' la shiñ, orze' rlagy ñi gyicy cupa pasez du de ru mbecy Israeel. ¹⁵ Tees como rtub su der losa'r nu lac yaruu de riidz, nunu rtub su der losa'r nu nac ca na tub mbecy, nunu rtub su der losa'r nu nac leey ni ub der, orze' laab de ub ru rlagy ñi nu za' lo der gyel cha' ic ni ub ru. Ya wari bee coz nu na gal nu na nii —na Galión.

¹⁶ Orze' pcyuu nuy dey par ich yu' ze' nu dri beey ni mbecy. ¹⁷ Orze' de mbecy pshet yaa dey Sosht, yu nu riib ic nañ yu' nu rsya' mbecy Israeel riidz ni Ñgyoozh. Orze' bdi dey yu laab ro' la ze'. Nunu Galión wangyicy cuen yu de coz nu bicy dey.

Baly bish cyay zay Antioquía

¹⁸ Na despuees ni de nu nde', orze' Baly byeeñ yu zañ ru' dzi Corinto. Gaze' nu bruuy lat de bicy na za nuy Priscila nu Aquila nañ tub barc par lo de yu nu la Siria. Tub gyedz nu la Cencrea, anzir chu'y nañ barc, orze' bicy yu tub trat nu Ñgyoozh. Orze' bicy yagy yu tooy par nu gabe nu segur la gyicy paay nu trat ze'. ¹⁹ Orze' bru'ña dey Éfeso. Ze' bzeeñ Baly Priscila nu Aquila. Orze' guay nañ

yu' nu rsya' de mbecy Israeel riidz ni Ñgyoozh. Orze' bee nuy de mbecy Israeel riidz. ²⁰ Orze' mnishbaa dey loy nu tuñ tiem gyiyeeñ yu nuy dey tees wanshet ic yu. ²¹ Tees ornu bruuy lo dey, orze' nay rab yu dey:

—Benu Ñgyoozh rlagy mi, ya yap güi der tuuba' tir —nay.

Orze' gu'y nañ barc. Bruuy Éfeso zay.

²² Orze' bru'ñay Cesarea. Orze' bruu ga'y ze' yay par Jerusaleeng. Yay nu niy ñgyoozh nu de mbecy ni Crisht nu yu' ze'. Orze' bruuy Jerusaleeng zay par Antioquía. ²³ Na ornu pcyiñ yu lugaar ze' tub tiem, orze' bruuy. Gusay lo de yu ni Galacia nu lo de yu ni Frigia. Bicy yu nu byafert zir ricy cup de mbecy consuel lo Crisht.

Apolos pshaal yu riidz ni Crisht Éfeso

²⁴ Na tub mbecy Israeel nu la Apolos briy Éfeso. Yu ze' tub mbecy Alejandría. Tona' la nap za riidz nu rniy, nunu nap ñuu rad lagy yu riidz ni Ñgyoozh. ²⁵ Nap blyuu mbecy niy de coz ni Shuaan den. Nunu fert la rniy, nunu nap rlyuuy de coz ni Jesuuz. Tees par nu zu nis mbecy, tub zi la de coz nu blyuu Waa, de nde' zi'l rad lagy yu. ²⁶ Orze' brugyi' nu wachib lay rniy lat de mbecy nañ yu' nu rsya' mbecy riidz ni Ñgyoozh. Na ornu Priscila nu Aquila güeñ dey de riidz nu mniy, orze' gua nu dey yu par yu'y. Ze' nap zir pshaal dey de coz ni Ñgyoozh loy. ²⁷ Orze' Apolos mnii tooy nu chay par lo yu ni Acaya. Orze' de mbecy ni Crisht nu yu' Éfeso blocyuub dey yu, gun bzeed dey tub gyicy lo de bicy na nu yu' ze'. Mniy lo dey nu nap gyicy nu

dey Apolos ornu griy. Na ornu briy Acaya, tona' la nap blocyuub yu de yu nu brugyi' nu ricy cup consuel lo Crisht par nu nac faboor ni Ñgyoozh. ²⁸ Lat de mbecy zigy nap blyuuy nu dzi radza de riidz nu rnii de mbecy Israeel. Orze' wangaca' nii dey nu walab ni. Bzat yu riidz nu bzeen Ñgyoozh, ornu blyuuy ni dey nu Jesuuz, laab mi ze' Mesías, biñ nu ca lo cuen nu co mbañ mbecy.

19

Baly zay Éfeso

¹ Lat nu ri Apolos Corinto, Baly gusay de lugaar ni logyi'. Orze' briy Éfeso. Ze' byap yu la be mbecy nu ricy cup consuel lo Crisht. ² Orze' nay rab yu dey:

—¿A guud Espiriit Yon ni Ñgyoozh ni de ru, ornu nu loga la nu bicy cup der consuel lo Crisht? —nay.

Orze' na dey:

—Ni wangyeñ de ti yu' tub Espiriit Yon ni Ñgyoozh —na dey.

³ Orze' na Baly:

—Benu ni, orze' ¿lac yaruuñ ornu briib nis dey de ru? —nay.

Orze' na dey:

—Yaruuñ gal nu mnii Waa —na dey.

⁴ Orze' na Baly:

—Waa briib nis yu de mbecy nu bi mne' de coz cyi, nunu mniy lo de mbecy Israeel nu gyicy cup dey consuel lo biñ nu cyid despuees par lo ub yu. Mi ze' lam Jesuuz —nay.

⁵ Ornu güen dey riidz ze', orze' bzu nis dey par nu gabe nu nac dey mbecy ni Shuaan den, Jesuuz.

⁶ Orze' Baly briib yaay too dey. Orze' Espiriit Yon ni Ñgyoozh bicy nim dey. Orze' mnii dey nu riidz reña' mbecy, nunu mnii dey por cuen ni Ñgyoozh.
⁷ Lo dela dey tub trocyup yu gyeey nac yu.

⁸ Lat chon beey gua Baly nañ yu' nu rsya' de mbecy Israeel riidz ni Ñgyoozh, wanchib lay mniy lo de mbecy. Bee nuy dey riidz, nunu bicy yu nu bguugy lardoo dey nu nac riidz ni gyel gubier ni Ñgyoozh. ⁹ Tees bruu su la be mbecy ze' nu bicy cyigy lardoo dey, nunu wacheña lagy yu. Shiñ mnii dey ni de coz ni Shuaan den lat de mbecy zigy. Nde' nu Baly bruuy lat dey. Orze' za nuy de mbecy nu ricy cup consuel lo Crisht par nañ tub yu' scuel, nu la Yu' Scuel ni Shi Tirano. Ze' bee nu Baly de mbecy riidz de dzi la. ¹⁰ Ni bicy yu nuy dey nañ cyup ña'n. Nde' nu güeñ dela mbecy nu yu' lo de yu ni Asia de riidz ni Shuaan den: tant mbecy Israeel, tant mbecy nu walab mbecy Israeel.

¹¹ Nunu Ñgyoozh tona' la nusuriidz ily bicy mi par nu nac Baly. ¹² Mas tub bay ni Baly o tub shab yu nu rzuy rza nu dey lo de mbecy rat. Orze' de mbecy rat ze' ryac yu. O benu nuras bicy ras nuy dey, orze' druu chu nuras ze' lo dey.

¹³ Na yu' la be mbecy Israeel nu rded rboo nuras. Orze' yu ze' bicy peey mbooy nuras nu nac rishbeey nu rbic Jesuuz. Orze' na dey rab yu nuras:

—¡Par nu nac rishbeey ni Jesuuz, biñ nu rzat Baly, rneë de lor nu ruu chur lo mbecy ii! —na dey.

¹⁴ Ni bicy gagy i'ñ tub mbecy nu la Esceva. Yu ze' tub yu nu riib ic de uz. ¹⁵ Tees ornu ni gugy dey nuras, orze' na nuras rab yu dey:

—Ya yu' lo Jesuuz, nunu ya yu' lo cyu nu Baly. Ze' de ru ¿cyu nac ru? —nay.

¹⁶ Orze' mbecy nu bicy ni nuras ze' tona' la fert pshet yaay dey. Bicy yu gan dey. Orze' bruu dey nañ yu' ze' carer. Guud güii dey, nunu por fers la blooy dela shab dey. Gyid yaagy la dey yay. ¹⁷ Dela de mbecy Éfeso nu de mbecy Israeel gal nu mbecy nu walab mbecy Israeel, dela dey güeñ dey de coz nu guc nunu tona' la gudzib dey. Orze' tona' la briib zily mbecy Jesuuz.

¹⁸ Orze' zigy mbecy nu ricy cup consuel lo Crisht bicy caacy yu de cyi nu bicy yu lat de mbecy. ¹⁹ Zigy de mbecy nu bicy tu' losa' bicy tublaazh dey de libr ni tu' ni dey, nunu pcaa dey gyiñ lo rgüii la de mbecy zigy. Na ornu bloo dey cuen ben la be sac de libr ze', orze' pshuub ñi pres ni cyaal gaynal miily tiñ plat. ²⁰ Ni mod guc. Orze' bzu laa riidz ni Ñgyoozh, nunu bicy ñi nu byanap de mbecy.

²¹ Na despuees nu bi guc de coz ze', orze' Baly mnii tooy nu ches say lo de yu ni Macedonia nu lo de yu ni Acaya. Na ornu lazh chesay de lugaar ze', orze' mnii tooy nu gyay Jerusaleeng. Orze' nay:

—Lazh nde' rlagy ñi cha güij gyedz Rom —nay.

²² Na tub tiem, lat nu gabee riy lo yu ni Asia se tub tiem, orze' bzuu nez yu Timoteo nu Erasto nu cha ga dey par Macedonia. De yu ze' nil rlocyuub dey Baly. Orze' Baly bzuu nez yu dey zay.

Pcha' ic de mbecy Éfeso

²³ Tiem ze' tona' la deet guc par nu nac de coz ni Shuaan den Éfeso. ²⁴ Zu tub mbecy nu la Demetr. Yu ze' tub yu nu ricy nap plat. Bzaay nab ni yu'

nu driib zily mbecy tub ñgyoozh nu la Diana. Orze' tona' la sheñ tiñ rad ni de mbecy nu rzaa de nab ze'. ²⁵ Orze' bicy tublaazh yu de mbecy nu ricy laab losa' riiñ nu ricy ub yu. Orze' nay rab yu dey:

—De ru mbecy, de ru rad lagy der nu dzi gusht rcyiiñ den par nu nac riiñ nu ricy na. ²⁶ Gun de ru rzac der nunu reñ der de coz nu rnii Baly. Rniiy nu ñgyoozh nu rzaa mbecy, nde' rila walab ñgyoozh, nunu bi bicy yu gan nu pcuugy yu lardoo zañ mbecy nu laa yaa dey de ñgyoozh ze': tant Éfeso gal nu dela lugaar lo yu ni Asia. ²⁷ Orze' dzi rishdzidz walab tub lo zi'l nu nii zi mbecy ni de riiñ nu ricy na, sinu ni' zi'l gyicy dey nu se la la sac yu' ni Diana, ñgyoozh lily ni den. Orze' nit lo gyl lily nim. Nunu biñ re biñ nu driib zily dela mbecy Asia, nunu dela mbecy nu yu' gyishlombecy —nay.

²⁸ Na ornu güeñ de mbecy ze' de riidz ze', orze' tona' la guzi lagy dey. Orze' brugyi' rbish ti dey. Orze' nay:

—¡Tona' la coz ily nac Diana ni de mbecy Éfeso! —na dey.

²⁹ Orze' dutuub la lat gyedz brush las nu zu redz ze'. Orze' de mbecy zigy bdu' yaa dey Gayo nu Aristarco, cyup mbecy Macedonia nu rded nu Baly. Orze' za nu dey yu carer par nañ yu' nu ryatublaazh de mbecy. ³⁰ Baly ngulagy yu chay lo de mbecy zigy tees de mbecy ni Crisht wansaan dey. ³¹ Nunu la be de fushtiz ni Asia, de yu nu nac amig ni Baly, bzeed dey rasoo loy nu cue' chu'y nañ yu' nu ryatublaazh mbecy ze'. ³² Ze' tona' la zu redz gu' de mbecy. Tub mbecy rbish tiy tub coz. Ze' tuuba' mbecy rbish tiy reña' coz. Orze' zigy zir

de mbecy nu wangad lagy dey lagu byatublaazh yu. ³³ Yu' mbecy nu briic yu fers ni Alejandro, gun de mbecy Israeel mnii dey loy nu chay cha niy lo dela de mbecy. Orze' Alejandro bicy yaay lo dey par nu cue' gyicy dey zu redz. Bicy peey niy tub riidz par nu gabe nu sac falt ni de mbecy Israeel lo de mbecy zigy. ³⁴ Tees de mbecy zigy byu' lo dey yu nu nac yu mbecy Israeel. Orze' tublaazh la brish ti dey nañ cyup or. Orze' na dey:

—¡Tona' la coz ily nac Diana ni de mbecy Éfeso!
—na dey.

³⁵ Or guchi orze' scyerban ni gyedz ze' pcyaag yu ic de mbecy zigy. Orze' nay:

—De ru mbecy Éfeso, dela mbecy rad lagy dey nu bdugyi gyedz Éfeso ii par nu ña dey yu' ni ñgyoozh lily, yu' ni Diana, nunu par nu ña dey nab mi nu bruu gashtal gyibaa bet lag ñi. ³⁶ Nunu ni tub la mbecy wac niy nu de coz nu mnee' nde' tub coz nu walab rishli. Orze' nde' nu rlagy ñi gyag ic der nunu cue' gur gyicy la der. ³⁷ De ru biid nu der de mbecy ze' par ii mas wangyicy gubaan dey la coz nu yu' nañ de yu' nu driib zily den ñgyoozh nin. Ni wannii zi dey nim. ³⁸ Benu Demetr nu de yu nu ricy nuy riiñ rlagy dey cu'y cyi ca na mbecy, orze' par nde' yu' dzi nu yu' de fushtiz par nu ri beey ni de mbecy. Lo de yu ze' gad gyel fushtiz. ³⁹ Tees benu yu' reña' coz nu rlagy der niir, orze' rlagy ñi za' lo der ñii ii lat de junt nu cu' de fushtiz. ⁴⁰ Gun na rishdzidz nis nii mbecy nu bicy den gyel yuu lat de ub na par nu nac de coz nu guc dzi na. Wad la ru'n niin lagu ni gu' deet na ii. Ni' wac shaal den lo

mbecy lagu ni rlagy na gyicy na —na scyerban ni gyedz ze'.

⁴¹ Orze' ornu bded nu ni mniiy lo de mbecy, orze' ptush las yu dey yay.

20

Baly zay Macedonia

¹ Na ornu guca de gyel deet ze', orze' Baly bicy tublaazh yu de mbecy nu ricy cup consuel lo Crisht. Orze' briic yu consef ni dey. Orze' despuees mniiy ñgyoozh nuy dey. Orze' bruuy zay par Macedonia. ² Lat nu zay de lo yu ni Macedonia, dzi briic yu baloor ni de mbecy ni Crisht. Orze' briy Grecia. ³ Ze' pcyiiñ yu chon beey. Na ornu bzu lily yu nu chay par Siria nañ tub barc, orze' gud lagy yu nu de mbecy Israeel psaap dey riidz nu shiñ gyicy nu dey yu. Orze' mnii tooy nu cush cyay, ded yu lo de yu ni Macedonia tuuba' tir. ⁴ Sópater, tub mbecy Berea, gua nuy yu. Yu ze' i'ñ Pirro. Ni' zi'l reña' mbecy gua nu dey yu. Gush lañ: Aristarco, nu yu nu la Segundo, cyup de yu ze' mbecy Tesalónica, nu Gayo, tub yu Derbe, nu Timoteo, nu Tíquico nu Trófimo, cyup de mbecy ze' bruuy lo de yu ni Asia. ⁵ Orze' de mbecy ze' za ga la dey par lo de. Za dey tub gyedz nu la Troas. Ze' blez dey de ya. ⁶ Ze' de ya, ornu bded sa' nu row dey gyishtily nu sac lebadur, orze' gu' de nañ barc. Orze' bruu de Filipos za de. Na ornu bza' gaay dzi, orze' bri de Troas. Orze' byatublaazh de nu losa'. Ze' pcyiiñ de tub sman.

Baly pcyiiñ yu Troas

⁷ Orze' dzi loga la ni sman byatublaazh de nu losa' nu daw de gyit mod nu bzeen Jesucrisht. Orze' Baly pshaal yu riidz ni Crisht lo de mbecy. Zaab rnii lay lo dey gashtal or guzeel rel, gun tuuba' dzi gyay. ⁸ Orze' byatublaazh de nañ tub yu' nu zub gya ni tub yu' chon shily. Ze' rca gyi ni zañ candiil. ⁹ Ze' zub tub yu feñ nu la Eutico. Zub yu ru' bentan. Lat nu rnii Baly, orze' tona' la byeed pcaal yu gashtal por fii gush la pcaal yu, gun Baly dzi tuñ mniy. Orze' bruuy gal shily chon ni yu' ze'. Bet lag yu gal lo yu la. Orze' pshes nañ dey yu gut lay. ¹⁰ Orze' Baly bet yu par lo yu. Orze' gusaab tiily yu. Bdu' yaay yu. Orze' nay:

—Cue' dzib der gun gabee mbañ yu —nay.

¹¹ Orze' gupa'y laab gal gya ze' bdow nuy dey gyit mod nu bzeen Jesuuz. Despuees orze' chi bee nuy dey riidz gashtal briib la doo. Gaze' nu bruuy lo dey zay. ¹² Orze' ya nu dey yu feñ ze' par yu'y mbañ yu. Orze' guud baloor ni dey.

Baly bruuy Troas zay Mileto

¹³ Orze' bzeen Baly de ya. Gaze' nu gu' de nañ barc za ga de lo par Aso. Ze' chu' Baly nañ barc. Ni mniy nu gyicy de, gun rlagy yu chay gyi' lay par Aso. ¹⁴ Na ornu bdzeel de Baly Aso, orze' gu'y nañ barc. Orze' za de par Mitilene. ¹⁵ Orze' ze' bruuy de za. Orze' tuuba' dzi bri de Quío. Gal tuuba' dzi bri de Samos. Ze' bzu lagy de Troguilio. Orze' tuuba' dzi bri de Mileto. ¹⁶ Gun Baly bdu' ic yu nu ded nez zi'l yu Éfeso, gun orze' cue' ganday yu lo yu ni Asia, gun gyeel riy Jerusaleeng, gun dzi ga dugyi ru'y sa' ni Pentecostés.

Baly rniy lo de yu bel ni de mbecy ni Crisht Éfeso

¹⁷ Orze' lat nu ri Baly Mileto, bzeed yu rasoo za nu mbecy par Éfeso. Mniy nu cha de yu bel ni de mbecy ni Crisht nu cha cheel dey yu. ¹⁸ Na ornu bri dey, orze' nay rab yu dey:

—De ru rad lagy der la coz bicya nese dzi loga la nu bri de lo yu ni Asia. ¹⁹ Dub laa tiem nu pcyiina lat der bicya coz nu mnii Shuaan den lo. Nunu rila wangyale', sinu bicya riin ze' tiem nu deet rac. Nunu tiem ze' tona' la bicy shni par nu nac de coz a' nap nu psaap de mbecy Israeel riidz nu ngicy nuy ya. ²⁰ De ru rad lagy der nu ya rila wanchea nu nee ni tub la coz nu rlagy ni nu locyuuba der. Tees ya pshaala de riidz ni Crisht, nunu blyu ni der lat de mbecy ziggy gal nu nañ yu' ni der. ²¹ Blyu ni de mbecy Israeel, nunu tant blyu ni de mbecy nu walab mbecy Israeel. Ya mnee lo dela mbecy nu rlagy ni ne' dey de cyi nu ricy dey, nunu gyicy yu coz nu rlagy Ngyoozh. Nunu rlagy ni gyicy cup dey consuel lo Shuaan den, Jesucrisht. ²² Orze' na cha par Jerusaleeng gal nu mnii Espiriit Yon ni Ngyoozh lo nu gyicya. Ni wagad lagy ya la coz zaca re. ²³ Tub zi la coz rad lagy ya. Nu dela gyedz nu rdeda Espiriit Yon ni Ngyoozh rniim lo nu gyet laga nañ yu' gyiib, nunu zañ coz deet zaca de ze'. ²⁴ Tees ya rnii too nu se la la saca nu cyiina gyishlombecy ii, benu chi ga nde' gyicy ni nu shupa laza, nunu za' lo de riin nu briic Shuaan den Jesucrisht nu gyicya. Riin ze' nde' nu shaala de riidz nu sac nu bruu lo Ngyoozh, de riidz nu rniiñ nu dzi coz nap ricy nu Ngyoozh de ub na.

²⁵ 'Ya gusa mnee de riidz ni gyel gubier ni Ngyoozh lat der, nunu na rad lagya nu rila wazaca'

der ya. ²⁶ Nde' nu dzi na ya nee lo der, benu yu' mbecy bdune' lat der, ya sac falt ne. ²⁷ Gun ya mnee lo der dela coz nu bloo ic Ñgyoozh nu gyicy mi, nunu wancach ru' ni tub lañ. ²⁸ Bicy cuidad der ub ru, nunu bicy cuidad der nu de mbecy zigy nu bzeñ Ñgyoozh nu ña der. Ña der dela mbecy nu ricy cup consuel lo Shuaan den, biñ nu brish cyi den nu nac nu pshum reñ mi. ²⁹ Ya rad lagya nu despuees ornu ruu lat der, cyid mbecy a' nap. Gyicy yu nu laa yaa de mbecy ni Crisht de coz rishli. Na dey gal na lob dañ nu nit lo ma shily. ³⁰ Shuub dzi nu ruu la be mbecy rguu lat der. Lyuu dey coz fals, gun orze' de mbecy ni Crisht cha cay ich yu. ³¹ Cuidad der, nunu cue' nit lagy der nu dzi rel la ya blyuu ni der nu nis lo nañ chon ña'n lat nu tona' la bzac zi.

³² 'Orze' der bicy na, ya zeeña der yaa Ñgyoozh nu ñam der. Nunu ya drish lo nu de riidz nu rnii de coz ily nu ricy Ñgyoozh locyuub ñi de ru, gun gyicy fert ñi der, nunu gac cuic ñi dela coz nu bzu chum par dela mbecy nu bi pcuim nu gac nim. ³³ Ya rila wansaab lagya ni tiñ ni mbecy, ni de shab mbecy. ³⁴ Gun de ru nap rad lagy der nu ya bicya riiñ par nu gad coz nu rlagy ñi ne, nunu coz nu rlagy ñi ni de yu nu gusa nu ya. ³⁵ Dub laa tiem rlyuu ni der nu ni mod rlagy ñi gyicy den riiñ, nunu locyuub den de mbecy nu ricy falt la coz ni. Byeza' lagy der de riidz ni Shuaan den Jesuuz ornu nam: “Gacyit zir lagy mbecy ornu cuic yu coz ni losa'y gaze' ornu gash yu coz nu cuic losa'y niy”, nam —na Baly.

³⁶ Na ornu blazh mnii Baly de nde', orze' gusu tib

yu nuy dey. Mnii nuy Ñgyoozh nu dela dey. ³⁷ Orze' dela mbecy biiñ yu, nunu bdu' yaa dey yeñ Baly. Nunu bdow dey chit lo Baly. ³⁸ Tona' la bicy shni dey, gun mnii Baly nu wazaca' dey yu. Orze' za nu dey yu gashtal lo la barc.

21

Baly zay Jerusaleeng

¹ Ornu bzeen de de bicy na, orze' gu' de nañ barc. Orze' za de li laa tub lugaar nu la Cos. Orze' tuuba' dzi za de Rodas. Ze' bruu de za de Pátara. ² Pátara byap de tub barc nu za par Fenicia. Gu' de nañ barc ze' za. ³ Za de ze' nu rabee tub nac yu nu ri lo nisyudoo nu la Chipre. Orze' ze' briic de welt bzeen de Chipre par yaa reg na. Orze' za de par Siria. Orze' ze' blez barc gyedz Tiro, gun rlagy ñi gyet yuu ze'. Orze' ze' bet de par lo yu. ⁴ Orze' ze' byap de la be mbecy ni Crisht, nunu pcyiñ du de yu tub sman. Orze' nu nac Espiriit Yon ni Ñgyoozh mnii nu dey Baly nu cue' chay par Jerusaleeng. ⁵ Tees ornu blazh tub sman, bruu de za. Dela dey nu mñaay nu de yu nguzh za nu dey de ya par ru' gyedz ze'. Orze' ze' bzu tib de mnee du de Ñgyoozh. ⁶ Orze' mnee de ñgyoozh nu dey nu bi gya de. Orze' gu' de nañ barc. Ze' de mbecy ze' bish cya dey yay par yu'y.

⁷ Orze' bruu de Tiro za de. Orze' bya' lo byaj mi' ze' Tolemaida. Orze' ze' mnee de ñgyoozh nu de bicy na. Ze' pcyiñ du de yu tub dzi. ⁸ Na tuuba' dzi bruu de ze' za de par Cesarea. Orze' ze' za de yu' tub mbecy nu rshaal riidz ni Ñgyoozh, yu nu la Lip, nunu pcyiñ du de yu. Yu ze' tub yu nu

bruu lat gagy mbecy nu pcui dey Jerusaleeng par nu locyuub dey de aposht. ⁹Yu ze' zu tap i'ñ yu, fiñ mñāa nu nigul gad ñgyee. Rnii deñ de riidz nu rbic Ñgyoozh niñ. ¹⁰Ze' pcyiñ de la be dzi. Orze' bru'ña Agabo, tub mbecy nu rnii por cuen ni Ñgyoozh. Yu ze' bruu gashtal Judea. ¹¹Biid güīy de ya. Orze' gush yu sinch ni Baly, nunu pcyiig yu yaa ub yu, nunu pcyiiga'y gyi'y nu sinch ze'. Orze' nay rab yu de:

—Espiriit Yon ni Ñgyoozh nam: “Ii mod gyicy mbecy Israeel nu yu' Jerusaleeng nu shuaan sinch ii. Orze' gu' dey yu yaa de mbecy nu walab mbecy Israeel”, nam —na Agabo.

¹²Na ornu güeñ de de riidz ze', orze' de ya nu de mbecy Cesarea mnishbaa de lo Baly nu cue' gyay Jerusaleeng. ¹³Tees orze' Baly nay:

—¿Lagu dzi ruun der? Tona' la ricy der nu ricy shñi. Ya bi zu la ca na nu zu walab tub lo zi'l nu cyiig dey ya, sinu ni' zi'l bi zu la par nu gata Jerusaleeng nu nac Shuaan den Jesuuz —nay.

¹⁴Wangac cuugy de lardooy. Orze' guca de nu rnee nu cue' gyay. Orze' mnee de:

—Gal nu rlagy Shuaan den Jesuuz, ni gac —mnee de.

¹⁵Na ornu blazh la be dzi, orze' bicy nap de suu. Orze' bruu de ze' yaa par Jerusaleeng. ¹⁶Ni' la be de mbecy Cesarea nu ricy cup consuel lo Crisht ya nuy de ya. Zu tub mbecy Chipre nu la Mnasón. Yu ze' tona' la gulas bicy cup yu consuel lo Crisht. Orze' lo yu ze' br̄i de.

Baly cha güīy Santiag

¹⁷ Na ornu br̄i de Jerusaleeng, orze' tona' la bet lagy de bicy na ornu bdzeel dey de ya. ¹⁸ Orze' na tuuba' dzi Baly gua nuy de. Gua güi de Santiag, nunu ni' zi'l nguaa dela de mbecy nu zu riiñ ni de yu bel lat de mbecy ni Crisht ze'. ¹⁹ Orze' Baly mniiy ñgyoozh nuy dey, nunu pshaal yu lo dey dela coz nu ricy Ñgyoozh num de mbecy nu walab mbecy Israeel par nu nac riiñ nu ricy yu. ²⁰ Na ornu güeñ dey nde' orze' byabic dey gyel mbecy ni Ñgyoozh. Orze' na dey rab yu Baly:

—Orze' na bicy na, ru gac cu' cuen ru nu yu' bee miily mbecy Israeel nu ricy cup consuel lo Crisht. Tona' la ricy zily dey leey nu bzeen Moisees. ²¹ Na güeñ dey nu ru shiñ na riidz nu rlyuur ni de mbecy Israeel nu ricy cup consuel lo Crisht, de yu nu yu' ledz de mbecy nu walab mbecy Israeel. Güeñ dey nu rlyuur nu rlagy ñi zaan dey leey nu bzeen Moisees. Nunu mbecy rnii dey nu rlyuur nu cue' caa dey beey sircunsision cuerp ni i'ñ yu. Nunu güeñ dey nu rlyuur nu cue' gyicy paa dey nu de cushtom ni de mbecy Israeel. ²² Segur la gyeñ dey nu ru brir Jerusaleeng. Orze' ¿la coz rlagy ñi nu gyicy den? ²³ I mod gyicy ru ricy pee de. Zu tap mbecy nu rlagy ñi gyicy yac dey nu riidz nu mnii dey lo Ñgyoozh nu segur la gyicy yu. ²⁴ Cha nur dey, nunu tublaazh la gyicy der coz nu rnii leey par nu gyicy caacy mbecy ub yu par lo Ñgyoozh. Orze' rlagy ñi cyish ru gasht ni dey. Orze' despuees shi'ñ dey gyich tooy. Ni mod gad lagy de mbecy nu riidz nu zaab ze' nde' gyel rguu, gun ni' ru gyicy paar nu leey nu bzeen Moisees. ²⁵ Ze' de mbecy nu walab mbecy Israeel nu ricy cup consuel lo Crisht,

bi bzeed de gyicy lo dey. Mnee de lo dey nu cue' sug ic dey nu nac de coz ze'. Nomaas walagy ñi nu gow dey beel nu rcuaa mbecy lo nab, nunu walagy ñi nu gow dey reñ, nunu ni walagy ñi nu gow dey bañcyug nu bduzii yeñ, nunu cue' gal dey mbecy nu wanchelaay —na dey rab dey Baly.

Baly zay pres

²⁶ Orze' tuuba' dzi Baly gua nuy de mbecy ze', nunu bicy nuy dey mod nu rnii leey nu bzeen Moisees par nu gyacaacy mbecy lo Ñgyoozh. Gaze' nu gu'y loli' ni yu' nu driib zily mbecy Israeel Ñgyoozh, nunu bicy yu nu gud lagy de mbecy nu yu' ze' gul gya' lo tiem nu gyacaacy dey. Tiem ze', orze' tub ga la dey cuic yu gun lo Ñgyoozh.

²⁷ Na ornu bi rgaab lazh gagy dzi ze', orze' la be mbecy Israeel nu bruu lo de yu ni Asia bzaac dey Baly loli' ni yu' nu driib zily de mbecy Israeel Ñgyoozh. Orze' bicy dey nu pcha' ic de mbecy zigy. Orze' bdu' yaa dey Baly. ²⁸ Orze' rbish ti dey. Gaze' nu na dey:

—¡Der mbecy Israeel, blocyuub de ya! Yu ii mbecy nu rded dela lugaar nu rlyuuy ni de mbecy coz nu za contr ni mbecy Israeel, nunu coz nu za contr ni leey nu bzeen Moisees. Nunu coz ze' zañ contr ni coz ni yu' nu driib zily den Ñgyoozh ii. Orze' yeed nuy la be mbecy griego nañ yu' nu driib zily den Ñgyoozh. Na rnuy yu' yon ni den ii —na dey.

²⁹ Ni mnii dey, gun bzaac dey nu rded nu Baly tub mbecy Éfeso, yu nu la Tróximo. Orze' psa' lagy

dey nu Baly gya nuy yu ze' par loli' ni yu' nu driib zily dey Ñgyoozh.

³⁰ Orze' dutuub la lat gyedz deet guc. Orze' byatublaazh dey carer. Bdu' yaa dey Baly. Por fers la za nu dey yu. Bruu nu dey yu loli' ze'. Za nu dey yu lat cay. Rgayu tuñ la dey yu. Nunu lueg la psoow dey ro' nu rzu' dey loli' ze'. ³¹ Orze' dela mbecy zigy bicy pee dey nu ñgyut yu Baly. Orze' bzeed mbecy rasoo lo yu nu riib ic de soldad nu dutuub la lat gyedz Jerusaleeng yu' deet dey. ³² Orze' yu nu riib ic ze' lueg la gua nuy de jef ni soldad, nunu gua nuy la be soldad. Orze' tub miiñ zi'l bi bru'ñay ze' nu yu' de mbecy zigy ze'. Na ornu de mbecy bzaac dey yu nu riib ic ze' nu de soldad, orze' guca dey nu rshet yu ni Baly. ³³ Orze' mbecy nu riib ic ze' guay lo Baly. Orze' mniy lo mbecy nu cyiig dey yu nu cyup caden nu cha nu dey yu pres. Orze' nay rab yu mbecy:

—¿Cyu mbecy yu ii? ¿La coz bicy yu? —nay.

³⁴ Yu' mbecy rbish tiy tub coz. Ze' yu' ga'y rniy reña coz. Yu nu riib ic ze' wangad lagy lay la coz guc, gun tanta' ricy mbecy zu redz. Orze' pcaay mbecy nu cha nu dey Baly ze' nu yu' de soldad.

³⁵ Na ornu bru'ña nu dey yu gyi' scaler nañ ze' nu rcyiiñ de soldad ze', orze' rlagy ñi shup dey yu, gun tanta' guloc de mbecy zigy. ³⁶ De mbecy zigy zaab dey ich yu. Rbish ti dey. Orze' na dey:

—¡Biit yu! —na dey.

Baly rcay ub yu

³⁷ Orze' ornu bicy pee dey ñgya nuy Baly ze' nu yu' de soldad, orze' na Baly rab yu yu nu riib ic ze':

—¿A gac nee tub coz lor? —nay.

Orze' na yu nu riib ic ze':

—¿A gac niir riidz griego? ³⁸ Orze' ¿a walab ru mbecy Egipto, yu nu bi rac tiem ricy gyel yuu nu gubier, nunu gua nur tap miily yu nu rut mbecy par tub lugaar ub zi? —nay rab yu Baly.

³⁹ Orze' na ga' Baly:

—Ya naca mbecy Israeel. Gula Tarso, tub gyedz lily nu ri lo yu ni Cilicia. Nunu ya ricy cupa dela rishbeey nu ca lo cuen ni de mbecy gyedz ze'. Orze' bicy faboor bzaan nee du de mbecy zigy —nay.

⁴⁰ Orze' yu nu riib ic ze' briic yu rishbeey ni Baly nu niy. Orze' Baly wes suy lo escaler ze'. Bicy yaay lo de mbecy zigy nu cue' gyicy dey zu redz. Na ornu guca nu zu redz, orze' Baly mniiy lo dey nu riidz hebreo.

22

¹ Orze' nay rab yu de mbecy zigy:

—Der bicya gal nu de ru yu bel, bzuub gyidag der ornu nee lagu nu sac falt ne —nay.

² Na ornu gueñ dey nu mnii Baly nu riidz hebreo, orze' guri zir dey. Orze' na ga' Baly:

³ —Ya naca tub mbecy Israeel. Gula tub gyedz ni Cilicia nu la Tarso, tees bguul dey ya Jerusaleeng ii. Gamaliel byub ic yu de coz nu psya', nunu blyuu dey ne nu nap gyicy paa nu de leey nu bzeen Moisees. Ya fert la zaba nu rca Ngyoozh gal nu de ru rca der mi ii dzi na. ⁴ Nde' nu gulas psheed zi de mbecy nu gush nez cub ni Crisht gashtal bicya nu gut dey. Pshet laga mña gyeey la pres. Mne' dey yu' gyiib. ⁵ Orze' yu nu riib ic de uz nu dela yu nu zu riin ni yu bel ni den gac nii dey nu ya rnee coz

rishli. Briic dey tub gyicy ne nu cha du lo de bicy na, mbecy Israeel nu yu' Damasco. Orze' ze' za, gun orze' ni' du' ya de mbecy nu nac num lugaar ze' nu yap du dey pres par Jerusaleeng ii, gun orze' gad cashtig ni dey.

Baly rniiy lac mod byac yu mbecy ni Crisht

⁶ 'Na nez nu za ornu bi rgaab ri Damasco tub or wi doo, sij la bet tub yaa ryal bruuñ gashtal baa bet ñi dub yub la lo. ⁷ Orze' wes sa la lo yu, nunu güeñ ya nu zaab ti' mbecy. Orze' nam: "Saulo, Saulo, ¿lagu rsheed zir ya?" nam. ⁸ Orze' ya mnee: "¿Cyu nac ru, Shuaana?" mnee. Orze' nam: "Ya naca Jesuuz, biñ nu pcyiñ Nazaret, biñ nu ru rsheed zir", nam. ⁹ De yu nu za nu ya bzaac dey yaa ze', nunu gudzib dey tees wangyeñ dey coz nu mnii biñ nu mnii nu ya ze'. ¹⁰ Orze' ya mnee: "¿La coz rlagy ñi gyicya Shuaana?" mnee. Orze' Shuaan na nam: "Weshte nunu gua Damasco. Orze' ze' nii mbecy lor dela coz nu rlagy ñi nu gyicy ru", nam. ¹¹ Ya byaca' lo par nu nac yaa ryal ze'. Orze' de yu nu za du bdu' yaa dey ya za nu dey ya par Damasco.

¹² 'Ze' rcyiñ tub mbecy nu la Ananías. Yu ze' tub mbecy nu tona' la pcaa ic Ñgyoozh, nunu dzi bicy paay nu leey nu bzeñ Moisees, nunu dela mbecy Israeel nu yu' Damasco nap mnii dey niy. ¹³ Orze' yu ze' biid güiyy ya. Na ornu bruñay, orze' nay rab yu ya: "Bicya Saulo, na gac zac ru tuuba' tir", nay. Orze' laab or la ze' guc bzaaca tuuba' tir, nunu bgüi loy. ¹⁴ Orze' nay rab yu ya: "Ñgyoozh ni de gyitoo bel ni den pcuiim ru par nu gad lagy ru coz nu rlagy mi, nunu par nu zac ru biñ nu sac

falt ni, nunu par nu gyeñ ru de riidz nu ruu ru' ub lam. ¹⁵ Gun ru zat ru mi ze' lo de lo la mbecy nu yu' gyishlombecy. Shaal ru lo dey dela coz nu bzaac ru, nu dela coz nu güeñ ru. ¹⁶ Orze' cue' cuez ru. Weshte, nunu bzu nis, nunu bicy cup consuel lo Shuaan den, gun orze' gyecy dela cyi nu bicy ru", nay.

Baly rniiy nu bdugyiy riñ lat de mbecy nu walab mbecy Israel

¹⁷ Orze' ya bish cya ga' yapa Jerusaleeng. Orze' lat nu rnee du Ñgyoozh nañ yu' nu driib zily den mi, orze' bde' lo. ¹⁸ Orze' bzaaca Shuaan na. Orze' nam rab mi ya: "Bicy lal. Dzach ru bruu Jerusaleeng, gun de mbecy ii wayeña lagy dey de coz nu rniir nu nac ya", nam. ¹⁹ Orze' ya mnee lom nu "De mbecy ii nap rad lagy dey nu ya gua nañ dela yu' nu rsya' mbecy leey nir. Gua bdu' yaa de yu nu ricy cup consuel lor. Gua du dey nañ yu' gyiib. Nunu bdi su dey. ²⁰ Nunu ornu biit dey Shteb, yu nu bzat ru lo de mbecy, ni' ya ri lat de yu ze', nunu bicy de tub zi'l riidz nu de yu ze'. Nunu ya mña shab de yu nu biit dey ze'", mnee lom. ²¹ Orze' Shuaan den nam rab mi ya: "Char, gun ya zuu neza ru char zet lat de mbecy nu walab mbecy Israel", nam —na Baly.

Bet lag Baly yaa yu nu riib ic de Soldad

²² Orze' bee nde' zi'l bzuub gyidag dey. Gaze' nu brugyi' dub ru' la dey rbish tiy. Orze' na dey:

—¡Rlagy ñi nu gat yu! ¡Walab se'ñ benu cui mbañ yu! —na dey.

²³ Orze' rbish ti dey, nunu rboo dey shab yu brugyi' rne' dey ñi baa. Nunu rne' ga' dey yu gyedz

par baa, gun tona' la guzi lagy dey. ²⁴ Orze' yu nu riib ic de soldad pcaay de soldad nu cha nuy Baly par nañ yu' nu rcyiiñ dey ze'. Orze' mniy lo de soldad nu gaaz dey yu par nu gad lagy yu lagu rbish ti de mbecy Israeel nu nac Baly. ²⁵ Tees ornu pcyiig dey Baly par nu gaaz yuy, orze' nay rab yu jef ni soldad:

—Par lo leey, ¿a se'ñ nu gaaz der tub mbecy nu nash gyedz Rom benu nigul ri bee dey niy? —nay rab yu jef ni soldad ze'.

²⁶ Na ornu jef ni soldad güeñ yu nde', orze' guay lo yu riib ic dey. Orze' nay rab yu yu ze':

—Cuidad nu coz nu gyicy ru, gun mbecy re nash yu Rom —nay.

²⁷ Orze' yu riib ic ze' guay lo Baly. Orze' nay rab yuy:

—Mnii lo. ¿A laab nash ru Rom? —nay.

Orze' na Baly:

—Laab —nay.

²⁸ Orze' nay rab yu Baly:

—Ya sheñ tiñ brishā par nu byacā tub yu nu nash Rom —nay.

Orze' na ga' Baly:

—Tees ya nashā Rom gaal zi nese nu gula —nay.

²⁹ Orze' dela de mbecy nu bicy pee nu ngaaz Baly lueg la bruu chu dey loy. Nunū yu nu riib ic de soldad gudzib yu ornu gud lagy yu nu Baly nash yu Rom, nunu gudzib yu gyi' nu pcacuuñ dey yu nu caden.

Baly chay lat junt zub lo ni de mbecy Israeel

³⁰ Orze' yu nu riib ic de soldad ze' rlagy yu gad lagy yu ben la cyi driib de mbecy Israeel ic Baly.

Orze' tuuba' dzi, orze' pshaagy yu caden nu pcyiig dey Baly. Orze' pcaay de uz zub lo nu de yu nu zu riiñ ni junt zub lo nu gyatublaazh dey. Orze' za nuy Baly bzuy yu lo de yu ze'.

23

¹ Orze' Baly bgüiiy lo de yu nu zu riiñ ni junt zub lo ze'. Orze' nay rab yu dey:

—Der bicy na, dub laa lat nu zu gyishlombecy, nunu mas gashtal dzi na ya wagat lo lo Ñgyoozh par nu nac de coz nu bicya —nay.

² Orze' Ananías, yu nu riib ic de uz, pcaay de yu nu zu gaab ga lo Baly nu shet dey tub yaa yaru'y.

³ Orze' na Baly rab yuy:

—¡Mbacy rzuu lo, Ñgyoozh segur la shet yaam ru! Ru zub ru ze' dri beer ne mod ni leey, tees ru zar contr ni leey ornu mniir lo mbecy nu shet yu ne —nay.

⁴ Orze' yu nu zu garee lo Baly nay rab yuy:

—Ru rnii zir ni yu nu pcuii Ñgyoozh nu riib ic de uz —nay.

⁵ Orze' na ga' Baly:

—Der bicy na, ya wangad lagya nu yu ze' nac yu yu nu riib ic de uz, gun riidz ni Ñgyoozh rniiñ: “Cue' nii zir ni yu nu riib ic losa'r”, rniiñ —nay.

⁶ Na ornu Baly bzaac yu nu lat junt ze' yu' mbecy saduceo, nunu yu' ga' mbecy fariseo, orze' nay rab yu dey:

—Der bicy na, ya mbecy fariseo, nunu i'ñ mbecy fariseo naca. Nunu ii dri bee der ne gyi' nu nac nu drish lo nu ornu gat de mbecy gyabaña' dey despuees —nay.

⁷ Cuanzir nu ni mniy, orze' de mbecy fariseo nu de mbecy saduceo brugyi' zi ro dey riidz nu de losa'y. Nunu byac cyup nac de yu nu zu riiñ ni junt ze'. ⁸ Gun de mbecy saduceo rnii dey nu ornu gat mbecy wayabaña' dey, nunu rnii dey nu sac de anc, ni sac espiriit. Tees de mbecy fariseo rzeña lagy dey nu yu' anc, rzeña lagy dey nu yu' espiriit, nunu rzeña lagy dey nu gyabaña' de mbecy. ⁹ Orze' brugyi' rbish ti dey. Lat de mbecy fariseo, yu' ga' la be mbecy nu rlyuu leey nu bzeen Moisees. Orze' wes su dey. Orze' na dey:

—Mbecy ii rila wagyicy yu ni tub la coz a' nap. Benu mnii tub espiriit loy o tub anc mniy loy, nde' walab nu zañ contr ni Ñgyoozh —na dey.

¹⁰ Orze' brugyi' tona' la fert zi ro dey riidz nu losa'y. Orze' yu nu riib ic de soldad gudzib yu nu ncad güii dey Baly. Orze' pcaay de soldad nu chu' dey lat de mbecy ze' nu co dey Baly por fers la, nunu cha nu dey yu par ze' nu rcyiñ dey.

¹¹ Orze' rel ze' bruu sac Jesuuz lo Baly. Orze' nam rab mi yu:

—Cue' dzib ru, gun ru bzat ru ya Jerusaleeng ii nunu ni' zi'l rlagy ñi gyicy ru Rom —nam.

De mbecy Israeel rnii too dey lac mod cut dey Baly

¹² Orze' tuuba' dzi de mbecy Israeel bicy dey tub zi'l riidz ben lac mod cut dey Baly. Mnii dey nu segur la nu wow la dey gyit, nunu ni wo' la dey nis gashtal cut la dey Baly. Nunu mnii dey nu Ñgyoozh shiñ gyicy num dey benu wagyicy paa dey nu de coz nu mniy ze'. ¹³ Bded cyuu mbecy nu psaap dey riidz nu ni gyicy yu. ¹⁴ Orze' gua dey lo de

uz zub lo nu lo de yu nu zu riiñ ni de yu bel ni de mbecy Israeel. Orze' na dey:

—De ya mnee de lo Ñgyoozh nu shiñ gyicy num de benu daw de la zi'l coz anzir nu dut de Baly. ¹⁵ Orze' de ru nu de' zir mbecy ni de junt zub lo ii zeed der rasoo lo yu nu riib ic de soldad nu cyid nuy Baly lor ina. Gyicy ru tub mod nu rlagy ñi nu cugyi' zir ru lo Baly par nu gad lagy nap zir ru la coz bicy yu. Orze' de ya bi zu lily de nu dut de yu anzir nu ru'ñay lor —na dey.

¹⁶ Tees i'ñ zan Baly güeñ yu nu ni mnii dey ni Baly. Orze' gua niy lo Baly nañ yu' nu rcyiiñ de soldad. ¹⁷ Orze' Baly bredz yu tub jef ni soldad. Orze' nay rab yuy:

—Gua nu yu feñ ii lo yu nu riib ic der, gun rlagy yu niy tub riidz loy —nay.

¹⁸ Orze' jef ni soldad gua nuy yu feñ ze' lo yu riib ic de soldad. Orze' nay rab yuy:

—Baly, yu nu ri pres, bredz yu ya. Mniiy nu yap tu yu feñ ii lor, gun rlagy yu niy tub riidz lor —nay.

¹⁹ Orze' yu nu riib ic ze' bdu' yaay yaa yu feñ ze' gua nu reñ yuy. Na ornu bi zu reñ dey lat mbecy. Orze' nay rab yuy:

—¿La coz rlagy ru niir lo? —nay.

²⁰ Orze' yu feñ ze' nay:

—De mbecy Israeel bicy dey tub zi'l riidz nu nishbaa dey lor ina nu cha nur Shi Baly lat junt zub lo. Gyicy dey tub mod nu rlagy yu gad lagy nap zir yu nu nac de coz nu ricy Shi Baly. ²¹ Tees cue' zuub gyidag ru ni dey, gun bded cyuu mbecy nu siiñ dey ni Shi Baly nez nu chay. Bi mnii dey lo Ñgyoozh nu shiñ gyicy num dey benu gow dey la coz o benu go'

dey la zi'l coꝝ anzir nu cut dey Shi Baly. Orze' na rbez dey ben la na riidz nu niir —nay.

²² Orze' yu riib ic ze' nay:

—Cue' la niir lo ni tub la mbecy nu ni mniir lo —nay.

Orze' blaay yu feñ ze' yay.

Cha nu dey Baly lo Feely

²³ Orze' yu nu riib ic ze' bredz yu cyup jef ni soldad. Orze' nay:

—Bzu lily der cyup gaynal soldad nu rgyit nu mandzicy, nunu zu lily der setent de yu nu ryub cuay, nunu zu lily der cyup gaynal soldad nu rgyit nu yag too lyuch, nunu zu lily der dey par nu chay Cesarea, tub gyiib gaa or becheñ. ²⁴ Nunu zu lily der cuay nu gyub Baly. Nunu gri nu ruub der yu lo Feely, yu nu riib ic por cuen ni gubier —nay.

²⁵ Orze' yu riib ic de soldad ze' pcaay tub gyicy nu rniiñ:

²⁶ “Ya Clau Lisias zeeda gyicy ii lor, shi Feely, yu lily nu riib ic por cuen ni gubier. Shnu ru. ²⁷ De mbecy Israeel bdu' yaa dey mbecy nu zeeda lor ii, nunu bicy pee dey nu ñgyut dey yu. Mbecy briic yu nu gad lagya nu nash yu Rom. Orze' gua du soldad ne, nunu bloo mbañay. ²⁸ Ya ngulagya nu ñgyad lagya la cyi driib dey ic yu. Orze' gua du yu lat junt zub lo ni de mbecy Israeel. ²⁹ Orze' gud lagya nu driib dey cyi ic yu nu nac leey ni de ub zi'l dey. Par wangyicy yu coꝝ nu gyicy ñi nu cut dey yu. Nunu ni' wangyicy yu coꝝ nu gyicy ñi nu chay nañ yu' gyiib. ³⁰ Na ornu mbecy briic yu nu gad lagya nu la be mbecy Israeel mnii too dey ben lac mod cut dey yu, orze' ya mnii too nu zuu neza yu lor. Orze'

ya mnee lo de yu nu briib gyidza tooy nu cyid nii dey lor de coz nu rnii dey nu ricy yu.” Ni pcaay lo gyicy ze'.

³¹ Orze' de soldad bicy yac dey de coz nu mnii yu riib ic ze'. Gua tee dey Baly, nunu gua nu dey yu laab rel ze' gashtal tub gyedz nu la Antípatris.

³² Orze' tuuba' dzi de soldad nu rza gyi' bish cya dey yay par ze' nu rcyiiñ yu. Orze' byeeñ de soldad nu riib cuay ze'. Za nu dey Baly. ³³ Na ornu bri dey Cesarea, orze' briic dey gyicy ze' ni yu nu riib ic por cuen ni gubier, nunu bzeeñ yu Baly yaay.

³⁴ Orze' yu riib ic ze' blab yu lo gyicy ze'. Orze' bdugyi'y lo Baly ben ca ledz yu. Na ornu gud lagy yu nu ledz yu ze' riñ lo de yu ni Cilicia, ³⁵ orze' nay rab yu Baly:

—Ya gzuub gyidaga de coz nu niir ornu ri de yu nu driib cyi ic ru —nay.

Orze' pcaay de mbecy nu ña dey Baly nañ yu' ily nu bzaa Herodes.

24

De mbecy Israeel riib dey gyidza ic Baly

¹ Ornu blazh gaay dzi, Ananías, yu nu riib ic de uz zay Cesarea. Za nuy la be mbecy nu zu riiñ ni yu bel ni de mbecy Israeel. Nunu za nuy Tértulo, tub yu nu rne' ic ni de mbecy lo gubier. Orze' gua dey lo Feely, yu nu riib ic por cuen ni gubier. Orze' briib dey gyidza ic Baly. ² Orze' ornu bru'ña nu dey Baly, orze' Tértulo brugyi' driib yu gyidza ic yu. Orze' nay rab yu Feely:

—Shnu la ru Shi Feely, gun par nu nac ru, ri zu ledz de. Nunu gusht zir rcyiiñ de na gaze' gulas.

³ Tona' la yet lagy de, nunu rlagy de ric de gras

nir. ⁴ Ya walagya nit lo sheñ tiem nir. Orze' na bicy pasez bzuub gyidag de coz nu nee de lor tub miiñ. ⁵ Byap de mbecy ii tona' la ricy deet yu nu losa'y. Dutuub la gyishlombecy ricy cyup la'y de mbecy Israeel, nunu riib ic yu tub nac mbecy nu la nazarenos. ⁶ Nunu bicy pee ga'y ñgyicy bag yu nañ yu' nu driib zily de Ñgyoozh. Orze' bdu' yaa de yu za du de yu pres. Ngulagy de ri bee de niy gal mod nu rnii leey ne de. ⁷ Tees orze' Lisias, yu nu riib ic de soldad, pshet yaay de. Por fers la bloo zay yu yaa de. ⁸ Orze' mniiy nu benu ca na mbecy rlagy yu riib yu gyidza ic Baly, rlagy ñi nu cyid yu lo ru. Benu ru cugyi'r loy, orze' gad lagy ru nu rishli dela cyi nu rnee de ii —nay.

⁹ Orze' dela mbecy Israeel nu yu' lugaar ze' mnii dey nu nde' coz rishli. ¹⁰ Orze' Feely, yu nu riib ic por cuen ni gubier, bicy yaay par nu gad lagy Baly nu niiy. Orze' na Baly:

—Ya rad lagya nu guzañ ña'n ru dri beer ni de mbecy ledza. Nde' nu yet lagya nee lor lagu nu sac falt ne. ¹¹ Orze' na benu cugyi'r lo de mbecy, bi rac trocyup zi dzi nu byaa Jerusaleeng par nu riib zilya Ñgyoozh. ¹² De mbecy Israeel wansac dey nu ndoo zi riidz nu losa'. Ni wansac dey nu ñgyicya nu ncha' ic mbecy. Wansac dey nu ni ñgyicya nañ yu' nu driib zily de Ñgyoozh. Nunu ni wansac dey nu ni ñgyicya nañ yu' nu rsyā' de riidz nim. Ni wansac dey nu ni ñgyicya ni tub la lugaar lat gyedz Jerusaleeng. ¹³ De mbecy ii wagac gyicy caacy dey ti coz rishli de cyi nu driib dey icā lor. ¹⁴ Tees ya gyicy caacya nu ya rcā Ñgyoozh ni de gyitoo bel ne de ze' mod nu rnii dey nu nde' mod fals. Tees ya

zeña lagya dela coz nu ca lo leey nu bzeen Moisees. Nunu zeña lagya dela riidz nu pcaa de yu nu mnii por cuen ni Ñgyoozh. ¹⁵ Ya drish lo lo Ñgyoozh gal nu de ub yu ni' rgyish loy lom. Ya drish lo nu dela mbecy gyabañ dey: tant mbecy nap, nunu tant mbecy a' nap. ¹⁶ Nde' nu dub laa tiem ryuba mod nu cue' gyicya coz nu gyicy ñi nu gat lo lo Ñgyoozh. Nunu ryuba mod nu cue' gyicya coz nu gyicy ñi nu gat lo lo mbecy.

¹⁷ Na ornu bza' la be ña'n nu bruu Jerusaleeng, orze' yaa ga' par nu rica tiñ ni losa', nunu par nu rica gun ni Ñgyoozh. ¹⁸ Lat nu bicia nde' bzaac dey ya loli' ni yu' nu driib zily de Ñgyoozh. Saa la blazh nu bicy yaca nu dela coz nu rnii leey nu rlagy ñi gyicy mbecy par nu gyicy caacy dey ub yu. Nunu wansac dey nu rded du mbecy zigy. Ni wansac dey ya lat de gyel deet. ¹⁹ Tees ze' yu' la be mbecy Israeel nu bruu lo de yu ni Asia. Nap zir benu cyid de yu ze' lor benu ricy cup dey gyidza nu rlagy yu riib yu ica. ²⁰ O benu wancyiid dey, orze' cugyi'r lo de mbecy ii la cyi byu' bee nu bicia ornu gua lat junt zub lo. ²¹ Nomaas tub coz mnee ornu zu lat dey: “Dzi na dri bee der ne gyi' nu rzeña lagya nu ornu gat de mbecy, orze' despuees gyabañ dey tuuba' tir”, mnee —na Baly rab yu Feely.

²² Gaze' nu Feely como nap gud lagy yu de coz ni nez cub ni Crisht, orze' bzeen naat yu ni nde'. Orze' nay rab yu Baly:

—Ya ri bee nir ornu ri Lisias, yu nu riib ic de soldad —nay.

²³ Orze' pcaay soldad nu riib ic nu ñay Baly. Tees bzaan yu nu chesay, nunu zaan yu nu cyid güii de

amig niy yu, nunu zaan yu nu zu bich dey nu nac yu.

²⁴ Na ornu blazh la be dzi, orze' bru'ña ga' Feely nu mñaay Drusila. Drusila nac mi mbecy Israeel. Orze' bredz yu Baly nu zuub gyidag yu riidz nu niiy. Orze' mniiy lac yaruu nu gyicy cup den consuel lo Crisht. ²⁵ Tees ornu mnii Baly nu rlagy ñi nu gyicy na coz nu se'ñ, nunu rlagy ñi nu nap gyub ic na ub na, nunu ornu bzat yu dzi nu ri bee Ñgyoozh ni dela mbecy, orze' gudzib Feely. Orze' nay:

—Gua la ru na, tees ornu zu nata, orze' redza ru tuuba' tir —nay.

²⁶ Ni' zi'l Feely brish loy lo Baly nu cuic yu tiñ par nu ruuy. Nunu nde' nu zañ tir bredz yuy. Nunu bee nuy yu riidz. ²⁷ Ornu bza' cyup ña'n, orze' Feely bruuy riiñ nu zuy ni nu riib ic yu por cuen ni gubier. Orze' bdugyi tuuba' mbecy riiñ ze'. Orze' gu' yu nu la Porcio Festo. Orze' Feely rlagy yu nu ganap lagy de mbecy Israeel loy. Orze' bzeen yu Baly pres.

25

Baly chay lo Festo

¹ Orze' Festo briy par nu chu'y riiñ nu gyub ic yu por cuen ni gubier. Tees ornu bi bza' chon dzi, orze' bruuy Cesarea zay Jerusaleeng. ² Ze' de yu zub lo ni de uz nu de yu zub lo ni de mbecy Israeel briib dey gyidza ic Baly. Orze' mnishbaa dey lo Festo ³ nu gyicy yu faboor nu caay de mbecy nu cha nuy Baly par Jerusaleeng. Ni mnii dey gun bloo ic dey lac mod cut dey Baly nez nu chay.

⁴ Orze' na Festo rab yu dey:

—Baly riy pres Cesarea. Yā sñuu ga cha par Cesarea. ⁵ Orze' de yu nu riib ic lat der rlagy ñi nu cha nu dey yā par Cesarea. Orze' re gac riib dey cyi ic yu, benu shiñ bicy yu —nay.

⁶ Orze' Festo briy Jerusaleeng tub shuñ dzi o tub tii dzi. Gaze' nu bruuy zay par Cesarea. Orze' tuuba' dzi bi zub yu nañ yu' riiñ par nu ri beey ni de mbecy. Orze' mnii nuy de mbecy nu cyid nu dey Baly. ⁷ Ornu bru'ña Baly, orze' de mbecy Israeel nu bruu Jerusaleeng bri lo' la dey yu. Orze' brugyi' driib dey zañ gyidza ic yu tees wangac ñgyicy caacy dey ti nde' coz rishli. ⁸ Orze' Baly pcay ub yu. Gaze' nu nay:

—Yā wangyicyā ni tub la coz nu za contr ni leey ni de mbecy Israeel, ni coz nu za contr ni yu' nu driib zily de Ñgyoozh, ni coz nu za contr ni yu nu riib ic dela nasyoong —nay.

⁹ Tees Festo rlagy yu gyicy yu coz nu gyet lagy de mbecy Israeel. Orze' nay rab yu Baly:

—¿A shet ic ru char par Jerusaleeng par nu ri beē nir nu nac de coz nu rnii de mbecy ii? —nay.

¹⁰ Orze' na Baly:

—Yā zū lo ru, yu nu zu riiñ por cuen ni yu nu riib ic dela nasyoong. Ii rlagy ñi ri beer ne. Mas ru rad lagy ru nu se la la coz a' nap bicy dū de mbecy Israeel. ¹¹ Benu yā ñgyicyā coz nu za contr ni leey o benu ñgyicyā coz nu gyicy ñi nu rlagy ñi nu gata, orze' yā waneē lor nu co mbañ ru yā. Tees como de gyidza nu driib dey ica, nde' walab coz rishli, orze' ni tub la mbecy wac gu' dey yā yaa dey. Yā rdiña nu ub la yu nu riib ic de nasyoong ri beey ne —nay.

¹² Na ornu blazh bee nu Festo de yu nu rbic consef riidz, orze' nay rab yu Baly:

—Ru bdiiñ ru nu yu nu riib ic de nasyoong nu ri beey nir. Orze' lo yu ze' char —nay.

Baly chay lo rey Agripa

¹³ Orze' ornu blazh la be dzi rey Agripa nu Berenice za dey Cesarea za güiyy Festo. ¹⁴ Na ornu bi rac la be dzi rcyiiñ dey ze', orze' Festo mniyy loy de coz nu bzac Baly. Orze' nay rab yuy:

—Ri tub mbecy ii, yu nu bzeen Feely pres. ¹⁵ Ornu gua Jerusaleeng, orze' de yu zub lo ni de uz nu de yu bel ni de mbecy Israeel briib dey cyi ic yu, nunu mnii dey lo nu nee nu yu' falt niy. ¹⁶ Orze' ya mnee lo dey nu de ya gal nu de mbecy nu riib ic por cuen ni gubier Rom rila wagnee de nu yu' falt ni mbecy nu gyicy ñi nu gat yu anzir nu gac lo nu lo niy nu de mbecy nu driib cyi ic yu, gun orze' gad mod nu niyy lagu sac falt niy nu nac de cyi nu driib dey ic yu. ¹⁷ Na ornu biid dey par ii, orze' wansaana nit lo tiem. Orze' tuuba' dzi bi zuba nañ yu' riiñ. Orze' pcaa de mbecy nu cha tee dey Baly. ¹⁸ Ya psa' lagya nu de mbecy nu driib cyi ic yu zañ coz a' nap nii dey nu bicy yu. Tees walab ni. ¹⁹ Tub zi la coz nu mnii dey, nde' nu ricy yu coz nu za contr ni mod nu driib zily dey Ngyoozh, nunu bzat dey tub yu nu la Jesuuz. Gut yu tees Baly rniyy nu mbañ yu. ²⁰ Wangad lagya lac gyicya par nu gad lagya de coz nu guc. Orze' mnee lo Baly nu ben a washet ic yu gyay Jerusaleeng. Orze' ze' duri bee niy. ²¹ Tees orze' Baly bdiiñ yu nu chay lo Augusto, yu nu riib ic de nasyoong, nu ri beey niy. Orze' mnee lo de mbecy nu zeeñ dey yu pres

gashtal ornu gad mod nu zuu neza yu lo yu nu riib ic ze' —nay.

²² Orze' na Agripa rab yu Festo:

—Ni' ya rlagya gyeña coz nu nii mbecy ze' —nay.

Orze' na Festo rab yu Agripa:

—Ina gyeñ ru de coz nu gniiy —nay.

²³ Orze' tuuba' dzi rey Agripa nu Berenice bru'ña nuy de jef ni soldad nu de yu zub lo ni gyedz ze'. Na ornu gu' dey nañ yu' ze', orze' tona' la briib zily dey de yu ze'. Orze' Festo pcaay de mbecy nu cha tee dey Baly. ²⁴ Gaze' nu na Festo:

—Rey Agripa gal nu de ru mbecy nu by-atublaazh ii. Ii bi zu tub mbecy. Zigy mbecy Israeel driib dey cyi ic yu ii lo: tant mbecy nu yu' Jerusaleeng, nunu tant mbecy nu yu' Cesarea ii. Zaab rbish ti la dey nu rlagy ñi gat yu. ²⁵ Tees ya rsa' lagya nu wangyicy yu ni tub la coz nu gyicy ñi nu rlagy ñi nu gat yu. Nunu como laab yu bdiiñ yu nu chay lo Augusto nu ri beey niy, orze' ya bi mne' ica nu zeeda yu lo Augusto. ²⁶ Tees ya wagad lagya la na falt niy nu caa lo gyicy nu zeeda lo yu nu riib ic dela den. Nde' nu yap du yu lo der. Nunu ricy zir ñi presis lo ru, rey Agripa, gun ornu lazh cugyi'r loy ben a wad la ñuu coz nu caa lo gyicy. ²⁷ Gun ya rzeë nu dzi coz ton benu zuu neza tub pres lo yu nu riib ic de nasyoong benu wagac neë de falt nu yu' niy —nay.

26

Baly rniiy lo Agripa lagu sac falt niy

¹ Orze' na Agripa rab yu Baly:

—Na gac niir lagu sac falt nir —nay.

Orze' Baly bicy yaay lo dey. Gaze' nu brugyi' rniiy. Orze' nay:

² —Rey Agripa, ya ricya uba par tub mbecy nu tona' la cyit na dzi ni, gun gac nee lor dzi na lagu sac falt ne. Lo dela gyidza nu driib de mbecy Israeel ica, rila sac falt ne nu nac de coz ze'. ³ Nunu yet zir lagya, gun ru nap rad lagy ru dela cushtom ni de mbecy Israeel, nunu nap rad lagy ru dela nu la gyi' nu rtub su de losa'. Nde' nu rnee lor nu bicy pasez zuub gyidag ru de riidz nu nee lor —na Baly—.

Mod nu bzu Baly anzir nu gacyu mbecy ni Crisht

⁴ Dela mbecy Israeel rad lagy dey lac mod na lat nu pcyiina lat dey nese miiñ la: tant ledza, nunu tant Jerusaleeng. ⁵ De yu ii rad lagy dey, nunu benu rlagy dey, gac niy nu nese miiñ la bicya mod ni mbecy fariseo. Nunu de mbecy fariseo ta zir mod nu ricy dey lo Ñgyoozh gaze' de' zir mbecy Israeel. ⁶ Nunu na zu ii rduri bee ne par nu nac nu drish lo de riidz nu mnii Ñgyoozh lo de gyitoo bel ni den nu segur la gyicy mi. Riidz ze' nde' nu gyicy Ñgyoozh nu gyabañ dela mbecy nu bi gut. ⁷ Lo trocyup nac nez de drish lo de lo Ñgyoozh nu gzac de nu gyicy yac mi de riidz nu mniim. Nunu nde' nu rca dem, nunu ricy de coz nu rlagy mi dzi rel la. Nde' nu ru rey Agripa par nu nac nu laaba' de coz ze' drish lo looñ, nde' nu de mbecy Israeel driib dey gyidza ica na. ⁸ De ru mbecy Israeel lagu wagac cheña lagy der nu Ñgyoozh gyicy mi nu gyabañ dela mbecy nu bi gut?

Baly rniiy nu pshed ziy de mbecy ni Crisht

⁹ 'Tees ya laa ni' zi'l mnii too anzir nu rlagy ñi nu dzi gyicya coz nu cha contr ni Jesuuz, biñ nu pcyiñ Nazaret. ¹⁰ Ni mod bicya Jerusaleeng. De yu zub lo ni de uz briic yu rishbeey ne. Orze' pshet laga zigy mbecy nu ricy cup consuel lo Crisht nañ yu' gyiib, nunu bicya tub zi'l riidz ornu mnii mbecy nu gat dey. ¹¹ Zañ tir pcaa mbecy nu cuic yu cashtig ni de mbecy ze' ben a walaa yaa dey de coz nu ricy cup yu consuel lo. Ni bicya nañ dela yu' nu rsysa' de mbecy Israeel riidz ni Ñgyoozh, gun tona' la guzi lagya lo dey. Nde' nu gua gashtal de gyedz nu yu' lo yu nu walaba' yu ni de mbecy Israeel par nu sheed zi de mbecy ze'.

Baly rniiy tuuba' tir ornu byacyu mbecy ni Crisht

¹² 'Par nu ni bicya, nde' nu ya gua tub gyedz nu la Damasco. De yu zub lo ni de uz pcaay ya nu cha, nunu briic yu rishbeey ne. ¹³ Orze' nez nu za, tub or wi doo, bzaaca tub yaa. Bruuñ gal baa. Bet ñi dub yub la lo nu lo de yu nu za du. Tona' la ryal yaa ze'. Ryal zir ñi gaze' yaa ni doo güidz. ¹⁴ Orze' dela de wes saa lo yu. Orze' güeñ ya nu zaab ti' tub mbecy. Orze' nam rab mi ya nu riidz hebreo: "Saulo, Saulo, ¿lagu rsheed zir ya? Laab ru shiñ ricy nur ub ru gal nu ricy tor, ornu rlo ma too garoch, ornu rchiib mbecy ma", nam. ¹⁵ Orze' ya mnee: "¿Cyu ru Shuaana?" mnee. Orze' na Shuaana rab mi ya: "Ya Jesuuz, biñ nu ru rsheed zir. ¹⁶ Orze' weshte, nunu bzu gyi'r lo yu. Ya bruu zaca lor par nu du' riiñ jaar nu gac ru moz ne, nunu par nu shaal ru lo de mbecy de coz nu bzaac ru dzi na, nunu par nu shaal ru lo mbecy de coz nu lyuu nir par lo. ¹⁷ Ya wazaana nu shiñ gyicy nu de

mbecy Israeel ru, nunu wazaana nu shiñ gyicy nu mbecy nu walab mbecy Israeel ru, de mbecy nu zuu neza ru nu char lo ze'. ¹⁸ De yu ze' nay gal nu na mbecy lo ca'. Tees ru rlagy ñi nu gyicy ru nu zac dey. Gun orze' ruu dey ze' nu cow. Cha dey ze' nu yu' yaa. Orze' cue' gyub ic nuras dey, sinu Ñgyoozh gyub ic mi dey. Gun par nu nac nu gyicy cup dey consuel lo ya, gyicy sulagy Ñgyoozh dela coz cyi nu ricy dey. Nunu gyacaacy dey gal nu byacaacya' de' zir mbecy nu nac nu ricy cup dey consuel lo", nam.

Baly ricy paay nu de coz nu rnii Jesuuz

¹⁹ 'Orze' na rey Agripa, ya wangyicya nu wansuub gyidaga ni de coz nu güeña nu bruu gashtal gyibaa. ²⁰ Sinu nu loga la pshaala de riidz nu bruu lo Ñgyoozh lo de mbecy Damasco. Niga pshaala de riidz ze' lo de mbecy nu yu' Jerusaleeng. Niga pshaala ñii lo de mbecy nu yu' dutuub la lo yu ni de mbecy Israeel. Ni' zi'l pshaala ñii lo de mbecy nu walab mbecy Israeel. Ya mnee lo dey nu rlagy ñi nu ne' dey dela coz cyi nu ricy yu, nunu rlagy ñi nu gyicy dey coz nu rlagy Ñgyoozh, nunu rlagy ñi nu gyicy dey tub mod nu gabe nu bi mne' dey dela coz cyi nu ricy yu. ²¹ Orze' par nu nac de nu nde', orze' de mbecy Israeel bdu' yaa dey ya lat nu ri loli' ni yu' nu driib zily den Ñgyoozh, nunu bicy pee dey ñgyut yu ya. ²² Tees Ñgyoozh zaab rlocyuub lam ya. Nde' nu dzi na zu ii, nunu rzata de coz nu guc ze' lo dela der: mas lo de mbecy shni, mas lo de mbecy lily. Nde' nu rnee lor laaba' de coz nu mnii de yu nu mnii por cuen ni Ñgyoozh. Ni mnii Moisees nu de yu nu mnii por cuen nim nu ni gac. ²³ Mnii dey

nu Mesías, biñ nu ca lo cuen nu co mbañ mbecy, rlagy ñi nu gzac zim, nunu gac mi biñ nu gyabañ loga la despuees ornu bi gut mi. Orze' de riidz nu rnii mi ze' nañ gal nu na tub yaa. Riidz ze' rniiñ lo de mbecy Israeel nu gac gruu mbañ dey, nunu ni' zi'l rniiñ lo de mbecy nu walab mbecy Israeel —na Baly.

²⁴ Orze' lat nu rnii Baly nu lagu sac falt niy, orze' brish ti la Festo. Orze' nay:

—¡Nu guton ru Baly, nu nac nu dzi rsya'r gyicy, nde' nu raton ru! —nay.

²⁵ Orze' na ga' Baly:

—Ya walab nu gutona Shi Festo. Riidz nu rnee, nii coz rishli nunu coz nu nap za. ²⁶ Nunu ii zu rey Agripa. Yu ii nap rad lagy yu de coz ze'. Nde' nu ya wachiba rnee loy, nunu segur la rad lagya nu bdu' cuen yu de coz ze', gun de coz ze' rila wangac ñi tub ze' nu ngach. ²⁷ Rey Agripa, ¿a rzeña lagy ru de riidz nu mnii de yu nu mnii por cuen ni Ñgyoozh? Ya rad lagya nu ru rzeña lagy ru —na Baly.

²⁸ Orze' na ga' Agripa rab yu Baly:

—Ru rsa' lagy ru nu gac cuugy ru lardoꝝ nu gaca mbecy ni Crisht nu nac riidz gyidz ze' —na Agripa.

²⁹ Orze' na' Baly:

—Mas rnee riidz gyidz o mas rnee riidz nap tees ya rdiña lo Ñgyoozh nu walab ru zi'l, sinu dela de mbecy nu rzuub gyidag de riidz nu rnee dzi na, nu gzu dela der mod nu ya zu, nomaas walagya nu de ru cuir pres gal nu ya ri —na Baly.

³⁰ Gaze' nu wes su Agripa nu Festo nu Berenice nu de' zir de yu nu nguaa ze'. ³¹ Orze' bruu dey nañ yu' ze'. Orze' na dey rab yu losa'y:

—Yu re wangyicy yu ni tub la coz nu gyicy ñi nu gat yu o nu gyicy ñi nu chay nañ yu' gyiib —na dey.

³² Orze' na Agripa rab yu Festo:

—Benu cue' ñgyiñ yu nu ri bee yu nu riib ic de nasyoong niy, orze' ñgyac ndulaay i ga la —nay.

27

Baly zay Rom

¹ Na ornu mnii too Festo nu zeed yu de Italia nañ tub barc, orze' bgu' dey Baly nu la be de' zir pres yaa tub jef ni de soldad, yu nu la Julio. Yu ze' riib ic yu tub nac soldad nu bloo la dey De Soldad ni Augusto. ² Orze' gu' de nañ tub barc ni tub mbecy gyedz Adramitio. Barc ze' bi zu lily ñii par nu ruuñ chañ par de gyedz ni Asia nu yu' ru' nisyudoo. Orze' bruu barc ze'. Orze' za de. Aristarco, tub mbecy Tesalónica, tub gyedz nu ri lo yu ni Macedonia, yu ze' za nuy de. ³ Orze' na tuuba' dzi bri de Sidón. Julio dzi nap bicy nuy Baly. Bzaan yu nu cha güiyy de amig niy, nunu bzaañ yu nu cuic de amig niy dela coz nu cyiñ niy. ⁴ Orze' bruu de Sidón za. Bzeeñ de Chipre, tub nac yu nu ri lo nisyudoo, par yaa reg na, gun tona' la druu bi par ze' nu za de. ⁵ Orze' bded de lo nisyudoo ru' yu ni Cilicia nu Panfilia. Orze' bri de Mira, tub gyedz nu ri lo de yu ni Licia.

⁶ Orze' lugaar ze' jef ni soldad ze' byap yu tub barc ni de mbecy gyedz Alejandría. Barc ze' chañ par Italia. Orze' bgu'y de nañ barc ze'. ⁷ Orze' guly za de nañ la be dzi. Orze' dzi gyee bri de lo nis nu ri gaab ga tub gyedz nu la Gnido, gun gabee rzub bi par ze' nu za de. Orze' bded de tub gyedz nu la

Salmón. Gaze' nu bded de cuit Creta, tub nac yu nu ri lo nisyudoo. ⁸ Bded de gaab ga lo yu ze', nunu dzi gyee bded de. Orze' bru'ña de tub lugaar nu la Buenos Puertos. Ze' gaab ga ri tub gyedz nu la Lasea.

⁹ Mnit lo zañ dzi. Orze' byarishdzidz nu cha de nañ barc, gun bi rgaab tiem nu ri gyey. Orze' Baly byooy rishlo de mbecy. ¹⁰ Orze' nay:

—Der mbecy, ya rzeē nu dzi rishdzidz za den na. Tona' la coz ily nit lo. Walab barc zi'l, nunu walab yuu zi'l nit loñ, sinu gnit lo ga' mbecy —nay.

¹¹ Tees yu nu riib ic de soldad wansuub gyidag yu ni Baly. Bzuub gyidag zir yu ni yu nu riib ic barc ze', gal nu ni shuaan ñi. ¹² Nunu lugaar ze' nu byeeñ barc ze' walab lugaar nap par tiem nu gri gyey. Nde' nu sñuu ga zi'l gac dela mbecy rlagy yu ruuy lugaar ze'. Orze' cha dey ben a wariy tub gyedz ni Creta nu la Fenice. Ze' tub lugaar nu dri barc, nunu druun. Nunu ornu rgüin par ze' nu rza doo, orze' nis ze' zub ro' niñ par yaa been nu par yaa reg na. Orze' ze' gac cyiin de lascyey.

Dzi zu gyey

¹³ Orze' brugyi' nu yagugy druun bi par yaa reg na ornu rgüin par ze' nu rza doo. Orze' de mbecy psa' lagy dey nu gyicy yu gan gal mod nu mnii tooy. Gaze' nu bruu dey lugaar ze', za dey gaab ga lo de yu ni Creta. ¹⁴ Tees ornu sa zi'l bruu dey ze' zay, orze' brugyi' druun tub bi ily rdugyiñ par lo barc nu yu de ze'. Bi ze' bloo la dey ñi Bi nu Druun Par Yaa Reg Na Ornu Güin Par Ze' nu Rza Doo. ¹⁵ Bi ze' tona' la bicy nuñ barc, nunu wangaca' saa dey barc ze' par ze' nu rdugyiñ. Orze' blaa yaa dey ñi.

Orze' za nu biñ. ¹⁶ Orze' za de cuit tub nac yu mi' nu ri lo nisyudoo nu la Cauda. Za de tub lo nis ze' nu beñ ricy bi. Orze' ze' gyee bzu nap de barc mi' nu zaab par ich ze'. ¹⁷ Despuees ornu bi pshup de barc mi' ze', orze' bgu' dey ñi nañ barc ily. Gaze' nu ptiish dey duu cacy nañ barc par nu gyafert ñi. Orze' rdzib dey nu ches ti barc lo tub nac yu uzhu ri par iñ nis gaab ga lo yu ni Libia. Gaze' nu pshet te dey negy nu zaab too barc ze'. Orze' bzaan dey nu za nu biñ. ¹⁸ Orze' tuuba' dzi, como ni zi'l dzi ricy bi, orze' brugyi' rne' dey de yuu nu yu' nañ barc ze' lo nis. ¹⁹ Orze' dzi chon de coz nu ricy nu barc riñ mne' dey ñi lo nis laab nu yaay. ²⁰ Zañ dzi wansaca' de doo güidz, nunu ni' zi'l wansac de bel baa. Nunu ii zaab druu la bi ily. Orze' brugyi' nu wagrish lo ga' de nu gruu mbaña.

²¹ Orze' como dela mbecy bi guzañ dzi wagowa' dey gyit, orze' Baly wes suy lat dey. Gaze' nu nay rab yu dey:

—Der mbecy, nap zir benu nzuub gyidag der ne, nunu cue' ndruun lo yu ni Creta, gun orze' cue' nnit lo de coz sheñ ze'. ²² Tees cue' dzib der, gun wat ni tub la den. Nomaas barc ii nit loñ. ²³ Gun che bruu zac tub anc ni Ñgyoozh lo, biñ nu nac nu ya, nunu biñ nu ya rca. ²⁴ Orze' nay rab yu ya: “Cue' dzib ru Baly. Rlagy ñi nu char lo mbecy nu riib ic de nasyoong. Nunu par nu nac ru, wazaan Ñgyoozh nu gat ni tub mbecy nu yu' nur nañ barc ii”, nay. ²⁵ Nde' nu cue' dzib der, gun ya ricy cupa consuel lo Ñgyoozh nu gyicy mi gal nu mnii anc ze'. ²⁶ Orze' gyet lag den lo tub nac yu nu ri lo nisyudoo —na Baly.

²⁷ Despuees ornu bza' trotap dzi nu dzi ricy bi, na or bi rel, bi bri nuñ barc lo tub nisyudoo nu la Nisyudoo Adriatico. Na or guzeel rel mnii too dey nu cyup ridz yagaab dey lo tub nac yu nu ri lo nisyudoo. ²⁸ Gaze' nu pcaa dey tub coz ye lo tub duu cacy. Orze' mne' dey ñi lo nis. Orze' gud lagy dey nu yu' tub gal rub tiñ zu tub metr nu gyi ri nis. Na ornu bzaañ sñuu miiñ, ni' zi'l bicy dey. Orze' gud lagy dey nu yu' gal rub gaay zu cyup metr nu gyi. ²⁹ Na orze' gudzib dey nis dugyi barc lo de gyita' nu yu' par iñ nis ze'. Orze' mne' dey tap duu cacy nu ca coz ye lo par ich barc, gun orze' chesab riñ lo nis. Orze' brish lo dey nu dzach za' yu. ³⁰ De yu nu rsaa barc bicy pee dey nu ndrui chuy. Orze' brugi' rshet lag dey barc mi' ze' lo nis. Bicy pee dey nu ñgya nuy tub coz ye nu ne'y par lo barc ze'. ³¹ Orze' na Baly rab yu yu nu riib ic de soldad, nu de' zir de soldad:

—Benu de yu nu rsaa barc re wabez dey nañ barc, orze' wac ruu mbañ der —na Baly.

³² Orze' de soldad pshi'ñ yu de duu cacy nu nag barc mi' ze'. Orze' bet lag ñi lo nisyudoo.

³³ Na ornu gabee cow ru', orze' Baly mnishbaay lo dela mbecy nu gow dey ñuu gyit. Gaze' nu nay rab yu dey:

—Bi bza' trotap dzi nu yu' der dzi rash ru shcab, nunu wangow der gyit. ³⁴ Nde' nu ya rnishbaa lo der nu gow ru ñuu. Gun nde' coz nu rlagy ñi par nu gagye der. Nunu wat ni tub der, nunu ni tub gyich too der wadune'ñ —nay.

³⁵ Ornu blazh mnii Baly de coz ze', orze' bdu' yaay tub gyishtily. Orze' briic yu gras ni Ñgyoozh lat dela mbecy ze'. Orze' blew yu gyishtily ze'.

Gaze' nu brugyi' row yu. ³⁶ Orze' dela mbecy guud baloor ni dey, nunu bdowa' dey ñuu gyit. ³⁷ Yu' cyup gaynal zub chon gal rub gaay zu tub mbecy nu yu' nañ barc ze'. ³⁸ Na ornu bi bdow gyel dey na, orze' mne' dey de trig lo nisyudoo par nu gyadzach barc ze'.

Mnit lo barc

³⁹ Na ornu bza' yu, orze' bzaac dey lo yu par wagyu' lo ga' dey ca lugaar ni yu ze'. Orze' bzaac dey tub nis nu ri reñ, tees ñgyiid la ru'ñ nu nisyudoo. Nunu ru' nis ze' ri tub lacy she. Gaze' nu mnii too dey benu gac cha nu dey barc par ze' nu ri lacy ze'. ⁴⁰ Gaze' nu pshi'ñ dey duu cacy nu nag barc ze' nu coz ye ze'. Orze' bzeeñ dey ñi lo nis. Nunu pshaagy dey duu cacy nu nag yag nu rlyuu ca na nez nu cha barc. Gaze' nu pshes nañ dey negy nu zaab too barc ze', gun orze' bi saañ barc ze'. Na orze' brugyi' nu rza barc par garee ga ze' nu ri yu ze'. ⁴¹ Tees orze' bdugyiñ ze' nu ri tub nac yu uz h nu ri par iñ nis. Orze' wes t̃i par loñ lat yu uz h ze'. Wangaca' ruuñ. Nunu tona' la bicy nu nis par ich ñi, gashtal brugyi' rduguz lañ.

⁴² Orze' de soldad rlagy dey cut yu de mbecy nu nac pres nis riib dze dey ornu lazh nu cub dey nis nu riy gal lo yu bigy. ⁴³ Tees yu nu riib ic de soldad rlagy yu co mbañ yu Baly. Orze' wansaan yu nu ni gyicy dey. Sinu bicy yu mandaar lo de mbecy ben ca na dey gac cub yu nis, orze' yu ze' gyet yu lo nis loga la. Orze' cub yu nis par nu riy lo yu bigy. ⁴⁴ Orze' dela de' zir mbecy za ca dey ich yu. Yu' dey zay lo tub yala. Yu' ga'y zay lo tub la' barc bla'. Ni mod bruu nap de. Br̃i de la de lo yu bigy.

28

Baly zay Malta

¹ Na ornu brī nap dē lo yu, orze' gud lagy dē nu nde' tub nac yu nu ri lo nisyudoo nu la Malta. ² De mbecy nu guledz, de yu ze' tona' la nap bicy nu dey dē ya. Bet gyey, nunu dzi rag. Gaze' nu pcuaa dey tub nac gyi ily, nunu mnii dey nu cuidz dē gyi ze'. ³ Orze' Baly bicy tublaazh yu tub nac yag wach. Orze' pcuaay ñi lo gyi ze'. Par nu nac nu dzi zig, orze' bruu tub bily lat yag ze' nu ricy pee ma cha ma. Orze' pshet la ru' ma yaa Baly. ⁴ Na ornu bzaac de mbecy guledz nu zaab gyi bily ze' yaa Baly. Orze' na dey rab yu losa'y:

—Rabee nu yu re nac yu tub mbecy nu rut losa'. Tees wasaan gyel fushtiz ni Ñgyoozh nu cui mbañ yu mas bruu nap yu lo nisyudoo —na dey.

⁵ Tees Baly bdib yaay. Orze' pshet lag yu bily ze' lo gyi. Nunu se la la bzac yu. ⁶ Dela mbecy blez yu nu chegyi Baly o nu derepent la gyes saay gat yu. Tees ornu bi guchi rbez dey, nunu rgüii dey nu se la la bzac yu, orze' reña' mod mnii too dey. Gaze' nu na dey:

—Yu re tub ñgyoozh —na dey.

⁷ Gaab ga lugaar ze' mbish yu ni tub mbecy nu la Publio, yu ze' riib ic yu yu nu ri lo nisyudoo ze'. Orze' bredz yu dē, nunu nap bicy nuy dē lat chon dzi nu pcyiñ dē loy. ⁸ Na uz Publio mbish yu nu rat yu. Rcaañ zig niy, nunu druyuuy. Orze' Baly gua güiiy yu. Na ornu blazh mnii nu Baly Ñgyoozh nu nac yu, orze' briib yaay yu. Orze' byac yu. ⁹ Na ornu bi bded nde', orze' dela mbecy rat nu yu' lo yu nu ri lo nisyudoo ze' guay lo Baly. Orze' byac

dey. ¹⁰ Orze' briic dey zañ coz gane de. Nunu ornu gu' de nañ tuuba' barc, orze' briic dey dela coz nu cyiiñ ne de nez nu cha.

Baly bruuy Malta zay Rom

¹¹ Na ornu blazh chon beey, orze' gu' de nañ tub barc ni de mbecy Alejandría. Lo barc ze' ca cyup nab ñgyoozh nu la Cástor nu Pólux. Barc ze' byeeñ ñi Malta lascyey. Gaze' nu gu' de nañ ñi za de. ¹² Orze' brı de tub gyedz nu ri ru' nisyudoo nu la Siracusa. Ze' pcyiiñ de chon dzi. ¹³ Gaze' nu bruu de ze'. Za de tub ru' yu la ni lugaar ze'. Orze' bru'ña de tub gyedz nu la Regio. Orze' tuuba' dzi brugyi' nu druu bi par yaa been ornu güiin ze' nu driib doo. Orze' za de. Na ornu bza' cyup dzi, orze' brı de tub gyedz nu la Puteoli. ¹⁴ Ze' byap de la be mbecy nu ricy cup consuel lo Crisht. De yu ze' bredz dey de ya par nu cyiiñ du de yu tub shuñ dzi. Orze' bruu de ze'. Za de par Rom. ¹⁵ De bicy na nu yu' Rom, ornu güeñ dey nu za de, orze' gua cheel dey de ya gashtal tub lugaar nu la Yagyi' ni Apio, nu tuuba' lugaar nu la Chon Posad. Ornu Baly bzaac yu de yu ze', orze' briic yu gras ni Ñgyoozh, nunu gud baloor niy. ¹⁶ Na ornu brı de Rom, orze' yu nu riib ic de soldad ze' bzeeñ yu de pres yaa tuuba' yu nu riib ic de yu nu rña laab pres. Tees bzaan dey nu cyiiñ reñ Baly nu tub soldad nu ñay yu.

Baly bzat yu Crisht Rom

¹⁷ Na ornu bi bza' chon dzi nu bri Baly Rom, orze' bredz yu de yu zub lo ni de mbecy Israeel, de yu nu yu' Rom par nu gyatublaazh dey. Na ornu bi byatublaazh dey, orze' nay rab yu dey:

—Der bicy na, ya walab nu shiñ bicy du de losa'n, nunu ni' walab nu bicya coz nu za contr ni cushtom nu bzeen de gyitoo bel ni den, tees pshet lag dey ya pres Jerusaleeng. Orze' bgu' dey ya yaa de mbecy Rom. ¹⁸ Orze' de mbecy Rom bdugyi' dey lo de coz nu guc, nunu ngulagy dey nlaay ya, gun wancyuu caacy ni tub la cyi nu briib dey too par nu gyicy ñi nu gata. ¹⁹ Tees de mbecy Israeel wangelagy dey nu ndulaa. Nde' nu ya wangac gyicya reña' mod. Orze' ya bdiña nu yu nu riib ic de nasyoong gri beey ne. Ni bicya mas sac ni tub la cyi fals nu riiba ic de losa'n. ²⁰ Nde' nu ya bredza de ru par nu zaca der, nunu par nu nee du de ru. Tub zi la nu nac biñ nu rgyish lo de mbecy Israeel lo, par nu nac mi ze', nde' nu ri pres —na Baly.

²¹ Orze' na dey rab yuy:

—De mbecy Judea wancaa dey ni tub la gyicy nu nzat dey ru lo de. Ni' de bicy na nu bruu Judea wannii dey ti bicy ru cyi. ²² Rlagy de gyeña de coz nu ru rnii toor, gun bi rad lagy de nu dela lugaar rnii dey riidz nu za contr ni leey cub ze' —na dey.

²³ Orze' bzu dey tub dzi nu gzuub gyidag dey de coz nu nii Baly. Na ornu pshuub dzi ze', orze' tona' la zigy mbecy byatublaazh dey ze' nu rcyiiñ Baly. Gaal zi'l brugyi' rniyy se or napor gashtal or bicheñ laa gabee rnii ru'y de riidz ni gyel gubier ni Ñgyoozh. Bzat yu de riidz nu bzeen Moisees, nunu bzat yu de riidz nu bzeen de yu nu mnii por cuen ni Ñgyoozh par nu gyicy ñi nu cuugy yu lardoo de mbecy nu cyu nac Jesuuz. ²⁴ Par nu nac de coz nu mniiy, orze' bguugy lardoo la be mbecy tees de' zir mbecy wancheña lagy dey. ²⁵ Orze' wangyicy dey

tub zi'l riidz nu losa'y. Orze' brugyi' rash nez dey druuy lo Baly. Orze' na Baly:

—Nap mnii Espiriit Yon ni Ñgyoozh ornu mniim lo Isaías, tub yu nu mnii por cuen ni Ñgyoozh, ornu mniiy lo de gyitoo bel ni den. Isaías nay:

²⁶ Ñgyoozh nam:

“Gua niir lo de mbecy ii.

De ru mas nap gzuub gyidag der tees wayet lag der cuen.

Mas nap güii der tees wazac der.

²⁷ Gun de mbecy ii byacyigy tooy.

Nunu psoow dey gyidag yu.

Nunu psoow dey urloy,

gun orze' wazac dey nu urloy,

nunu wagyeñ dey nu gyidag yu.

Ni wayet lag dey cuen nu shcab niy.

Nunu ni wachaa dey mod nu gyicy yu,

gun orze' yub dey ya.

Gun orze' ya gyicy napā dey”,

na Ñgyoozh,

na Isaías —na Baly.

²⁸ Orze' na ga'y:

—Ya rica nu gad lagy der nu na Ñgyoozh rlagy mi nu nee de de riidz nu gyicy nu gruu mbañ mbecy lo de mbecy nu walab mbecy Israeel. Nunu de yu ze' gzuub gyidag dey niñ —na Baly.

²⁹ Ornu blazh mnii Baly de riidz ze', orze' de mbecy zi ga la ro dey riidz nu losa'y. Orze' ya dey.

³⁰ Orze' li laa cyup ña'n pcyiñ Baly lugaar ze'. Pcyiñ yu nañ tub yu' nu rgyish yu gyi'. Nunu nap bicy nuy de mbecy nu gua güiiy. ³¹ Pshaal yu de riidz ni gyel gubier ni Ñgyoozh lo dey, nunu blyuuy

ni dey de coz ni Jesucrisht. Nunu rila wanca de mbecy niy nu cue' ni gyicy yu.

**De riidz ni trat cub nu bicy nu Ñgyoozh mbecy:
Salmos; Proverbios
New Testament, Psalms and Proverbs in Zapotec,
Texmelucan (MX:zpz:Zapotec, Texmelucan)**

copyright © 2004 Wycliffe Bible Translators, Inc.

Language: Zapotec, Texmelucan

Translation by: Wycliffe Bible Translators, Inc.

Zapoteco, Texmelucan [zpz], Mexico

Copyright Information

© 2004, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament, Psalms and Proverbs

in Zapotec, Texmelucan

© 2004, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 11 Nov 2022 from source files
dated 29 Jan 2022

f9c70e44-c99b-5c69-9f1e-e64901f95811